

萬載縣志

第十三冊

萬載縣志文徵詩徵合編

萬載文徵詩徵序

志有藝文從史例也史志以記事為主藝文乃著錄之編不列部目
皆非體例或矯而正之則以詩文分隸於本事之下亦失古人流別之意章氏
學誠言之詳矣檢閱先正所著述如辛侍郎從益之寄思齋李進士榮陞之厚
岡集辛助教紹業之周官旁求易圖存是已刊未刊十數種率可垂光典冊而
矜式後人科舉停廢入股敝倏然如陳進士池鳳之升山稿可云懸諸國門而
不能增減一字者於乎豈易言哉又如湯同知譽光之儼蘇和陶龍知州鳳祥
之夢禪詩話彭孝廉壽頤之團練新編湯進士肇熙之出山草譜亦足以資流
覽擴胸次而廣見聞焉萬載設縣以來南唐惟徐氏兄弟文章彪炳獨出冠時
固非後學所能擬議也今茲徵錄就前志已見於藝文者分門別類無火更張
前志所未載者睹聞所及博觀而約取之繆以管見操去取之權捫心清夜惟



冀不悖是非之公有能臚我親知而攻我疵類者乎以爲先器識而後文藝可也

文徵

謝封康樂侯表

宋謝靈運

昔強氏暴虐恃僭歷紀既噬五都志吞六合遂陷沒西河傾覆南漢凌藉紀鄧
跨越淮泗於時策畫惟疑地險已謝威懼若臣同泯有生無餘亡祖奉國威靈
董符戎重盡心所事克黜禍亂功參盤鼎胙土南服逮至臣身值遭大路日月
改暉榮落代運輪稅唐化生幸無已不悟天道下濟鴻鈞曲成廼眷遐績式是
興徵分虎紐龜復顯茅土鳴玉拖綬班景元勛澤洽往德恩覃來允永惟先蹤
遠感崩結豈臣阉弱所當忝承臣聞至公無私甄善則一皇恩遠被殘代可侔
是以信陵之賢簡在高祖之心望諸之道復獲隆漢之封觀史歎古欽茲盛美
豈謂榮渥近霑微躬傾宗頌元心識其會酬恩答厚罔知所由 采謝康樂集
補

劾石亨疏

明侍郎郭瑾邑進士

謹奏爲糾劾事臣忝司刑不容縱奸竊照武清公石亨者起自布衣遭逢盛世
託以股肱授以兵柄第宅富擬於王宮金帛疊出於內帑寵榮罕比際遇非常
爲石亨者正宜披肝據膽竭尺寸之微勞委身忘家圖萬一之補報豈期本官
如若謙恭而心實狡詐言似忠懇而行實乖違賄賂之門大開奔競之風盛起
無功之人妄報有功而當陞無才之徒僞舉有才而可用子姪食祿者數十餘
人親隸居官者百千餘輩布列要路擠排善良中外寒心縉紳側目潛構指揮
鄒叔彝來私宅而講論天文擅差指揮盧昭往河南而辦理家事差人出入邊
關而不敢阻擋用勢占種官田而莫敢誰何興販木植於山西而貪得無厭寄
養馬騾於邊衛而擾害多端罪惡貫盈法典難宥若朝廷不加斧鉞之誅則奸
臣益肆跋扈之心臣亦不忍同朝而坐視其奸也伏望皇上處以大公斷以大
義防微杜漸據法行刑乞將本官拏赴法司明正其罪以懲奸欺則臣民幸甚

天下幸甚

按雷禮明列卿傳有司寇本傳並載官給諫時條陳六事較諸採訪所錄尤足傳信當時辛少宰從益從京借抄寄局不知竟落誰手故仍存此

請籌兵餉疏

明巡按周 燦進士

題爲寇氛已迫敬陳兵餉急著以固疆圉事竊惟禦寇者禦之於門庭之外若待賊逼城下僅以閉門却敵外無救援內加細作鮮克久持楚省數郡之破皆中此弊前此荆襄麻黃與江右尙隔一水長江天塹猶曰有險可憑而今破武昌在西江肩項唇齒之間不啻剝膚矣此時急作門庭之計上自袁吉下自九江皆賊充斥之路九江近設總督重兵雲集可以恃而無恐袁吉一帶如萍鄉之接醴陵萬載之接瀏陽永新之接茶陵處處須防而萍鄉尤爲第一門戶賊過岳陽一步則萍鄉危矣萍鄉不守寧但西江之患南則百粵八閩東則祁門常川將有不忍言者今日守西江卽所以守閩粵守徽浙也兵單力寡決難捍

禦亟須精兵一萬分布萍鄉萬載永新三路統以遊擊二員不獨畫藩而守且與湖南彼此角犄互壯聲援賊往武昌去巢穴益遠四面受敵若大兵會約淮皖應諸兵從九江而上更調虔粵諸兵從袁州而進會合長衡永諸兵從岳陽而下水陸合湊上下夾攻滅此朝食此其時矣但兵興糧餉前此西江無事則西江之餉解京解楚總爲寇而解今日西江有事則留西江之餉養西江之兵亦爲寇而留守得西江不爲楚省之續則兵餉皆爲有用亦不至如楚省委之逝波呼吸安危可計者當不待其言之畢也臣謹會同巡撫江西右僉都御史郭某巡撫南贛右副都御史林某合詞上請伏乞勅下戶兵二部準臣等所奏或募或調湊兵一萬計哨官隊長什長教師等項每歲約食餉八萬有餘懇祈準於本省練餉內動支至於遊擊二員一切廩餼心紅紙劄與添設營房等項不敢擅動止額谷臣等與地方有司商酌另行設措庶使軍容壯而士卒鼓進足以攻退足以守西江安而閩粵徽浙五省俱安誠今日東南半壁救時之急

著也采府志

敬陳聞見疏

清侍郎辛從益邑進士時官河南道御史

爲敬陳聞見仰祈聖鑒事竊維州縣爲黎民之官官廉明則政清而民服我皇上肅清吏治慎簡賢良凡方面大員固多奉法執廉潔已率屬而州縣苟有不廉嚴防吏役勉飭胥操者臣籍隸江西職忝言官謹就告養回籍後見聞所及敬爲我聖主陳之 一書吏貸銀結交官府宜禁也查書吏中惟庫吏尤與官親近錢糧多經其手凡官未到任以前駐省既久資用必乏輒有賄吏貸與多金先行結納官感其惠到任後即令承充庫吏從此有求必應招權納賄難保其無所有一切翫法侵帑情弊必由於此 一差役橫率平民宜懲也查州縣中有差役串商家人出票挈人私押班房者往往並無原告祇係差役捏名藉賭而所挈數十人多係農人力耕起家並不解賄或乘農忙之際或當除夕之前沿村訛詐強取穀石牲畜克伊飯費及僱轎之費甚至生員亦被毆辱又有

因路斃無名男子卽借命案爲名妄挈平民輒逾數里及十里外凡小民殷實之家指爲鄰佑管押取錢者此等均宜痛懲 一保甲捕緝宜整頓也查保甲以稽察奸宄捕緝以嚴緝盜賊二者相爲表裏今州縣各鄉設有保正並不挨查烟戶至有豪猾窩藏竊匪往往農民夜失牛隻曉尋踪跡輒在其家而富戶公然苛勒事主贖錢始還原贖者鄰里畏懼不敢舉發互相容隱保甲之廢可想至於捕役一項臣回籍十年每聞各村莊屢有被竊之案並不聞有緝獲追贖之事而捕役多鮮衣肥澤其爲豪賊縱弛可知 一大員過境供應宜省也查督撫司道係入僂厚旅費一切諒能自給原不必州縣供應今州縣於他省大員過境沿途皆有傳片知會遞辦供應至大員之家眷人等分作二三次到者州縣亦一體供給取媚他境如此其在本省管轄上司尤不待言 一衙署不宜攜帶多人也查大小官員置盤自飭均宜儉以養廉若食指繁多焉能成儉今州縣署中家眷官親幕友家丁厨役人等竟有多至八九十人及百數人

者養廉所入焉能供給若非侵挪庫項必係濫取於民 一家丁挈眷外駐非宜也查外省各員隨帶家丁原宜在署服役今州縣中有聽家丁在民間租房娶妻并久住者迎親之日宴席盛設至有紳士希其與接書寫對聯具送賀儀并挈伴冠服往賀殊爲乖廉耻之風長招搖之路 一吏胥服色宜辨也臣查京城及各省衙門在官人役服色俱止用元青而江西省州縣吏胥竟多有用紅青者至宜春萬載二縣近數年來諸捕快皂班莫不狐裘黃黃袍褂均用細毛以致皮貨爲之騰貴至有周身表裏俱係綢緞此皆剝削民膏所致宜加裁抑使知斂戢以上數條皆臣見聞所及不揣冒昧伏乞皇上勅下督撫嚴飭所屬州縣凡有書吏貸銀結交官府差役橫挈平民以及保甲隱奸捕緝縱賊并州縣供應過境大吏浮費隨官人數過多家丁在外租住民房吏胥服色踰制者均嚴行禁止違者叅辦則政體益肅而閭閻益安矣再各省設立學官月課久不舉行有師生之名而無訓誨之實士習文風更難望其整飭所關非淺請

宜勅下各省學政實心董率以昭風厲而崇教化臣管窺愚見是否有當謹奏請飭查詳審以杜徇庇疏

時官掌四川道御史辛從益

爲請旨飭查詳審以杜徇庇事伏查長蘆掣鹽法碼加增斤兩滋弊一案欽奉諭旨查有圻等入網總均著解任質審其校兌法碼之工部主事黃遐年前任戶部郎中現任天津府知府張大維均著解任歸案質審欽此仰見我皇上肅清鹽政釐剔弊源務歸確實至意臣伏思此案法碼之弊無論在部在商既經奉旨審辦則工部鑄造時凡經手校兌之員俱應解任質審臣風聞大學士勒保之子現任工部虞衡司郎中英奎當鑄造法碼時伊即在工部爲司員掌印監造則英奎自應解任質審乃英奎既未經奏請解任而勒保隨同王大臣審辦此案亦未聲請迴避頗滋外議恐難保無瞻徇情事似應請旨飭查將英奎一體解任俟黃遐年張大維到案時一并交部質審并令勒保將因何不聲請迴避之處明白回奏臣又思法碼鑄造雖由工部其鑄前定式及鑄後頒發必

由戶部此次查出私增斤兩若係工部果有弊混則戶部亦不能無弊其戶部經手之員似不便深審此案自應一體迴避臣風聞派出承審司員係戶部司官瑞弼及寬寧此二人皆曾任戶部山東司查山東司係鹽課專管其法碼定式必由該司校發而寬寧於十二年鑄造法碼時郎已任山東司掌印郎中今此案即係二人承審亦難保無扶同迴護似應請旨將此案勅交王大臣另派司員秉公詳審以成信讞臣愚昧之見未知是否謹奏

請申明囤積之禁以昭平允疏

時巡視東城掌四川道辛從益

爲請申明囤積之禁以昭平允事竊惟米商固慮其居奇糧食亦資其轉運米鋪之盈虛亦閭閻生計所關也况京城爲四方士民雲集輻輳之區尤宜使米糧流衍民食充足臣伏查例載五城各鋪戶所存米麥雜糧等項每種不得過一百六十石逾數囤積居奇者照違制律治罪又載若非囤積居奇係流通糶賣者無論米石多寡俱聽其自便不在定限一百六十石之例於立限嚴防之

中竄揆情變通之意務使商民兩便法良善也竊見五月內步軍統領衙門奏拏獲私販米石及鋪戶囤積米石過多之案業經奉旨交部審訊并准將查出之米總數一萬三千餘石交五城減價糶賣仰見我皇上廣裕民食嚴抑奸商之至意臣伏思所奏各鋪戶有囤積而兼包送私運者有未包送私運而但囤積者有雖逾一百六十石之限而按之定例未可概指爲囤積者既難一律科罪况查所開各鋪戶米數有未至一百六十石亦指爲囤積者如西直門義盛之一百五十石零聚成之一百四十九石零慶長鋪之七十六石零裕源鋪之五十九石零皆米數未滿例限又並無包送情節乃一概指爲囤積奏請入官似與定例不符且京城各處米鋪甚多其存貯米數過一百六十石者正復不少何獨於廣渠西直東便三門之鋪戶米數未滿例限者轉指爲囤積概請入官糶賣若以該三門曾有包送米石及賣米山城之鋪遂將凡在三門附近者所囤米數無論多寡并無論曾否包送概請入官則玉石不分恐亦未爲平

允請旨勅下刑部訊明各鋪戶如實係包送販運米石出城及知情賣米出城者無論所存米數多少概行入官變賣以儆奸商若未經包送及知情賣米出城者仍查照百六十石定限定例訊明是否囤積現在流通糶賣與否分別辦理若既無包送情弊所存米石又不滿例限者奏請省釋免其入官庶平允昭而定例符矣臣又伏思行貨曰商居貨曰賈市賈廣國貨物勢所必然今米商既經開鋪糶賣其所儲之米原非倉卒可盡縱使存儲米數累至千百餘石固多賣少亦無不自命爲流通糶賣者其如何方爲流通而非囤積之處請旨飭交戶部詳爲區別明定規條曉諭各鋪戶使咸知警惕遵守卽審案亦易於判決臣又風聞各城門兵弁近因挈獲運米出城之案查禁甚嚴至有城外貧民入城買米不獲攜升斗以出者憊莫吹蠶未免過當請旨勅下步軍統領衙門轉飭各城守遵照十五年御史與奎奏准之例凡細米一石以內聽其出城不得禁止以仰副我皇上軫念窮黎一視同仁至意臣愚昧之見是否有當謹奏

請飭督撫勿延擱賊報疏

時掌河南道御史辛從益

爲請飭督撫勿延擱賊報事竊維邪匪猖獗固由州縣平時不能弭賊臨時又不行早報所致然亦有地方已經稟報而督撫過於持重不卽發兵掩捕者聞昔川楚邪匪滋事之前有州縣曾經稟報上司而上司斥爲不曉事體因令其留省閒住不遣回任於是州縣相率諱盜不報以致賊匪滋熾卽如今年邪匪滋事肇於山東之金鄉縣臣風聞該縣紳士於六月間以邪匪聚眾密揭教官教官詳稟學臣張鵬展其時金鄉縣令在省辦案聞風惟懼經學臣詳問該縣情形屬實卽飛咨撫臣同興比撫臣會商時猶以教官黨護秀才挾嫌捏控爲疑未肯卽行遣捕經學臣力爭以爲此事勢無兩立如果係邪匪聚眾謀逆豈可不辦倘並無此事而紳士挾嫌教官黨護則應治紳士教官以誣良之罪撫臣同興感悟乃允發吏卒掩捕因得究出首逆林清藏伏附京近地得以迅速查辦是該撫當該縣教官稟報時尙無捕賊之意反疑地方教官紳士爲誣告

若非張鵬展力爭則金鄉已難保無滑縣之事幸同興終能舍己從善耳其初見則未免過於持重也臣恐各省督撫遇地方報賊之案遲疑不決以致坐失事機者不少夫百姓食毛踐土世荷聖朝覆載生成之恩聞有邪氣孰不思告官捕緝以安桑梓惟是民望官以捕賊而官又望上司之助其捕賊若督撫聞報遲疑不發甚至斥州縣爲不曉事紳士爲挾嫌則州縣自審兵微力薄上司不爲救應恐轉誣以激變良民之罪於是雖有賊匪而不敢輕捕并不敢輕報良民知官之不肯捕賊也雖報賊而地方或指爲誣良轉恐與賊匪結讎遭其荼毒亦孰敢輕於首告乎是養癰貽患雖州縣諱盜之罪亦或由督撫有以致之臣伏思賊匪起事之初黨羽必少地方官一有所聞速行掩捕自可一網盡獲縱其中或有冤誣不難於鞫訊明分別開釋亦何必過於持重以致釀成大害如上年江西龍泉縣邪教滋事撫臣先福聞報卽帶兵立時撲滅所誅人數無多而邪匪立淨此督撫聞報速捕之效也今言事者多以諱盜爲州縣罪臣

愚以爲州縣諱盜不報上司之奏劾尙易而督撫聞報遲疑下情之仰達爲難今三省仰廬宵旰指示諸將連獲勝仗殲戮賊匪幾盡賊無蔓延誠天下蒼生之福惟是善後之策不願周詳請旨特飭督撫嗣後遇州縣有邪匪聚眾之報卽一面飭令該州縣速發吏卒或移會鄰縣掩捕一面卽帶兵相視情形馳赴策應勿得過於持重遲疑不如此則州縣易於捕賊百姓易於首報矣加以修武備嚴保甲廣教化勿有名無實毋始勤終怠化莠安良庶邪匪無所潛踪而百姓安居樂業億萬年永享昇平之福臣賦性樸忠職忝言官不能仰裨國家萬一然不敢不竭愚忱謹奏

請飭督撫詳慎甄別疏

時掌河南道御史辛從益

爲請飭督撫詳慎甄別以澄吏治事近奉上諭外任官員較之京員職守尤專著通諭各督撫先將所屬藩臬兩司詳加察核其道府州縣丞倅佐貳以及候補人員著各督撫督率藩臬兩司公同甄別仰見我皇上整飭官方至意臣竊

惟國家設立督撫卽古者咨牧分伯之義責任綦重天下廣輪之大州縣之眾吏治之賢否得失豈能一一周知故於封疆大臣寄之耳目俾藩司以下聽其舉劾以爲黜陟今欲泯汰衰庸非督撫之責而誰臣伏思外省甄別所京員不問京員雖由各堂官甄別而耳目且密稍有徇私之弊難逃皇上洞鑒至督撫所居距京師千里或數千里地方所轄遼遠文武歸其統屬司道以下平日鞠躬屏息唯唯聽命至於州縣職分卑微其中縱有枉抑下情未易上達若果係公忠爲國明政體達時務之督撫則凡所甄別自係中正無私舉一人而屬吏知勸黜一人而屬吏知儆不然者居心未淨所識又偏權勢既專操縱甚易或徇私容庇或任性乖張則必有夤緣奔競之徒請謁營求希免參革恐所謂衰庸者不果衰庸而直衰庸者反倖逃吏議也夫年力衰頹一望可知自難欺於衆目若夫才識之平庸與人品之卑庸則有未易悉者衰庸固宜黜庸尤宜黜倘其才識人品果庸或姑息養奸或遲延廢事或審斷迂謬或徇縱書役或希耽

安逸或安肆營求如此之員年雖壯盛在所必黜倘其人年力雖老而志氣不衰辦事勤敏老成練達是固不可謂之庸亦不可謂之衰原不應入汰之列總在督撫公明簡別而已且督撫之好尚各殊斯其所甄別亦異剛決者喜果銳則必視安靜之吏爲庸鈍矣明敏者喜圓通則必視慙直之士爲庸迂矣甚至以利口捷給者爲才因以厚重少文者爲庸以供應承順者爲能因以趨迎簡拙者爲庸豈知州縣有當切責之處亦有當體恤之處如案件之繁久懸不結錢糧之重宕延不交盜賊多而不勤於捕緝胥吏擾而不嚴於約束保甲廢弛奸宄潛滋此宜加切責者也江浙多民欠而官墊爲難漳泉多械鬪而官辦不易江蘇有慣鬧之漕收福建有難銷之鹽課倉庫之虧或由前任軍需之藏豈無分攤此宜存體恤者也一刀民上控而本官逮訊弁人證牽連委員轉轅催提供億連月案未審而官已困矣加以大員過境餽送爲勞家丁陋規婪索未免又或上司代人託銷書籍書未到而價先付囑薦幕友幕雖劣而俸必捐若

此之類不可勝舉其應命者爲能員不能者則爲庸吏矣倘以此而令加甄別其徇私任性不問可知其或自恃公正過爲刻覈接見屬員動加呵叱卽縣震恐駭汗詢以公事或不敢出聲倘一概目之曰庸亦恐下情未通而所謂庸者非眞庸也臣愚以爲督撫大吏必先有公忠體國之心持廉法之大綱畧趨於之末節務辦事之勤能責安民之實效揣時地之難易量才分之優絀而又常存敬慎之心然後可以甄別人才恭惟我皇上肅清吏治慎簡大僚各省督撫久在聖明睿照之中諒無不公正廉明勉圖報稱惟是敬慎之心刻不可忘故書稱克艱孔子言爲臣不易倘督撫自恃公正廉明而不加以敬慎則甄別之際必有流爲徇私任性而不自覺者其在藩臬司道於督撫雖係屬員而接見常親已難保無愛憎之偏至於州縣以下微員尊卑濶絕甄別之際尤易任性夫能爲天下生民黜庸吏者亦能爲天下惜人才請旨飭下各省督撫甄別大小官員務存詳慎則吏治清而官無曠職亦無廢才國家長收臂指之效海宇

永享安謐之庥矣臣愚昧之見未知是否謹奏

時官吏科給事中辛從益

爲敬陳管見仰祈聖鑒事近日凱撤兵丁帶有幼孩來京仰蒙聖恩令大臣查訊如係逆犯子孫交部查辦若平民子女合原帶回之官兵妥爲收養仰見我皇上仁至義盡體恤周摯之意臣伏思從逆子孫必須查明按律辦理以彰國憲而快人心且使梟獍餘孽不致留遺近地以清首善之區典至肅也至平民子女當兵燹之後蹂躪餘生經官兵招呼有情願跟隨託命者有迫於勢而不敢不從者即使官兵大員紀律嚴明兵丁不致橫拏平民亦必有此二種若管兵大員相距稍遠兵丁等搜索村莊強拏平民子女恐難保其必無臣思此等幼孩尚非無著流民不過因兵馬匆促父母兄弟不能相保以致流離散失大兵已過各有村落宗黨可歸若地方安靜之後皇上撫恤難民而此等幼孩之父母生歸故里思念子女不無悽惻可憫卽或此等子女之父母兄弟俱已不

存而伊祖宗廟墓僅賴此一綫之延又不能歸里繼守亦屬可矜且幼孩年穉無知跟隨倖生長成不無後悔况倥傯之際玉石難分其中或有仕宦子孫逃散相從至於不延血食亦未可定臣仰體皇上訓諭周詳軫恤幼孩之心再四思維若查明非從逆子孫並懇天恩飭各詢明居址村落發交該地方官送歸本宗以延嗣續亦可不致失所現在陝省軍功告竣若照此辦理亦免兵丁藉口收養強掣平民子女之弊是否可行敬陳愚昧謹奏

請嚴搜檢正文體疏

時官吏科給事中辛從益

爲請嚴搜檢以別真才禁浮雜以正文體仰祈聖鑒事竊惟科目憑文取士文章之醇疵真偽卽人才得失所關也是以軋苗必刪而懷挾有禁近年以來京闈及外省辦考各官未免意存寬厚不肯認真搜檢臣風聞各省鄉闈俱多懷挾之弊士子有潛帶蠅頭細字小卷或場前預囑執事人等帶藏闈中臨時密付並未經搜出者雖考官閱文至公而此等懷挾之徒徼倖獲中亦難保其必

無至於三場疊試用覘學養三場中尤重頭場四書文功令以清真雅正爲歸近來士子希圖詭遇往往摻摻僻書字句以炫新奇不顧題義如去年鄉試各省取中之文其平正無疵者固多而浮詭者亦不少如隱居以求其志三句題文有乘麟以理駕龍而游及金策書聖銀策書賢玉策書功等語於題殊爲廓落又如再有曰既庶矣兩節題文抄用鬻子東門曰虛南門曰墮西門曰疵北門曰側又用漢書郡國志注引帝王世紀夏禹之時民千三百五十五萬三千九百有二十三周成之時民千三百七十一萬四千九百七十三等語雖出古書究於本題富教之義不切文體亦屬支離又如使天下之人齊明盛服三句題文云昔武王克殷使閔夭進招華之桂於太廟使伯邑考進陽木之薑於羣廟使南宮适進九江之茵於桃廟按之題義俱爲漫溢且此數語未見所出惟近人所刻典制文琳註釋中有之稱係山尙書大傳臣查尙書大傳並無此語至於編造字句如山佩幾宮水佩幾羽詳深衣之度臣按公侯佩山元王大夫

佩水蒼玉見於玉藻非深衣所有且左徵角右宮羽凡佩玉皆然不牙山佩水佩又如哲相滌山裳臣按哲山滌裳古無此事古者山龍繡於衣并不在裳若斯之類不勝枚舉此臣所見閣墨刊行之文也又如易經垂衣裳而天下治題文用東都賦盛三雍之上儀一段查三雍宮名自漢朝黃帝堯舜時無之且原賦云盛三雍之上儀修衣龍之法服鋪鴻藻信景鑠揚世廟正雅樂而此文抄用因坊本注釋服字下有音韻二字連作爲韻遂誤認爲正文書爲韻鋪鴻藻信景鑠揚將世廟五字截去又如禮記莊曰豐本題抄用多識於鳥獸草木之名題文俱經臣簽出此巨磨勘分卷所見之文也又近來士子爭效王廣心尤侗之文臣查王尤文體最爲浮靡其運用故實往往換字縮脚幾如唐人鷗閣此戶之澀體費人猜想究其意義實爲膚淺是以欽定本朝四書文概不收錄今乃復取而誦習摹倣之科名既掇效尤燕多遂成風尙於是有慕其浮藻腹笥不足以至如臣所云剽取子史字句抄成蠅頭小本希圖懷挾或托人藏帶

倖中者臣思言爲心聲若故爲浮詭以希速售文體不正心術可知矧又出於懷挾乎現屆會試之期天下人才萃於京師請旨預飭典試分校各官嚴裁僞體務歸清真雅正其穿貫經史書卷紛綸者固宜取中亦必文從字順於題義實有發明至於二三場體裁雖無妨稍寬然微引經傳總期於本題有關并請旨預飭搜檢大臣於入場士子衣服器用嚴搜外凡場中一切先進器具并運送夫役及書吏執事人等逐名搜檢又各考官及監試提調副都統內外簾各官之跟役鋪陳等項均照定例逐一驗明放入以免士子轉託藏帶之弊庶真才可得文體正而士習端矣再向例鄉會試之年不准條陳科場事務臣爲檢才剔弊起見合併聲明謹奏

請飭查書吏婪索解員銀兩疏

時官吏科給事中辛從益

爲請嚴書吏濫索解員銀兩恭摺奏聞仰祈聖鑒事伏查本年三月間欽奉上諭各省鞘銀解部自應隨到隨交若輾轉拖延難保不致滋弊竇著步軍統領

隨時密查餉幣一經解到派員押送赴部呈報勿令稽遲欽此乃近來餉銀到京雖經押送赴部而該部書吏必向解員勒索多金方准交收近有福建詔安知縣鍾師唐領解餉銀十萬兩來京於五月二十五日到部投文該部書吏不肯收文謂每餉銀萬兩除應給飯銀及隨解常例外須給伊私銀四百兩今官餉十萬兩除常例外應給伊私銀四千兩方准交收鍾師唐無奈因臣係同鄉向臣告知臣聞不勝詫異竊意餉銀既經到部耳目眾多書吏豈能久行延擱乃迄今日久該解員自派夫役晝夜守護不惟餉銀未經兌交并投文亦未肯收是雖經押送到部而吏不准收仍不能隨到隨交且須晝夜防護刻刻不敢疏懈若非書吏人等實有勒索情弊何延至十餘日之人並不收納該解員鍾師唐之言似爲可信鍾師唐又云除伊解餉外尚有惠安知縣鄭銓領解頭批餉銀十萬兩於五月十六日到部在伊前十日迄今亦未收交亦因爭論私銀之故是該部書吏拖延濫索尤屬顯然臣伏思解員領解餉銀水陸數千里搬

運照護一切人夫供贍所費不貲到部時諒無不急公投交以卸專責豈能復堪書吏稽延婪索至四千兩之多除臣所知之鍾師唐鄭銓外并聞有江西廣東解到餉銀亦久未收交恐書吏向解員似此刁難詭索者正復不少殊爲大干法紀請旨飭下該部嚴行查問如果屬實即將該書吏奏交刑部究辦以懲貪詐臣又伏查收餉之事前經御史臣富勒禮奏准令該部於收餉時知會江南道御史協同監收在案惟是餉銀到部與否御史豈能刻刻訪查若但俟收餉時有戶部監收知會始行稽查則未收之先該部書吏向解員一切婪索舞弊之處何由周知故事前則無從覺察事發則與有處分臣愚昧之見請旨飭令各省嗣後解餉來京除備文送部外并備文送江南道御史令解餉官同時分投庶幾御史得以確知餉到日期行文查問稍有延擱即行糾參則書吏人等不敢延緩需索即臣思解員所以多被書吏訛詐者惟恐兌銀時伊等能高下其手捏報虛欠也查解員例有本省帶來部頒之法碼請勅令監收各官兌

銀時務必親自秉公校兌庶書吏人等不敢藉以恐嚇取財矣臣爲慎重帑項起見是否有當謹奏

劾章邱知縣掌責生監疏

時官山東學政辛從益

爲知縣掌責生監上司久延不結恭摺奏仰祈聖鑒事伏查學政全書地方官擅責生員聽學政糾參又載有司撻責生員視同齊民殊非恤士之意今後生員如果犯事情重地方官先報學政俟斥革後治以應得之罪又載生員所犯有應戒飭者地方官會同教官將事由具詳學臣酌斷批准然後扑責如有任意呵叱擅自飭責者聽學臣查參又載應戒飭之生員地方官擅自叱責者降二級留任等語臣推原立法之意優待士子正所以厚責士子使知自重也夫不詳學臣擅自叱責尙干吏議何況掌責詎有章邱知縣竇琛者專以掌責生監爲能狃不悛改臣於嘉慶二十二年十二月由青州回省路過章邱有生員周世儒劉紹宗監生李樹富馬化龍等先後呈控該縣浮收錢糧無論新漕

帶征概令每斗折交京錢一千四百文伊等因求減舊漕折數被縣官濫刑掌責百餘並鎖項銬手等語臣恐該生等包漕捏控面加盤詰同聲呼冤臣旋接見該令詢以曾否掌責據稱因伊等抗糧不服鎖押反出言頂撞故加掌責是該縣掌責生監業已自認不諱該縣旋以該生等抗欠錢糧辱罵官長補文稟知臣以州縣浮收生監抗糧罵官均干法禁但俱係一面之詞而擅責生監已屬不合當經批交濟南府嚴訊乃該府並不審結惟將生員周世儒等押學至不得回籍過年而所控浮收之書役人等俱逍遙事外臣旋行文章邱學令查該生等錢糧曾否交清該學據縣牒稟覆周世儒等新舊錢糧俱於正月間完訖臣續據該生等呈稱新漕先完固不是抗舊漕懇減亦並非包今新舊糧米俱經如折數通完而宛不雪等語是該生等尙非敢於抗糧而此案至今二年未結經臣行文催審總以人證不齊爲詞臣思該生等身遭凌辱方疊求申雪豈反憚於赴審至書役等係在官人役一呼可至何難集訊顯係因所控浮收

事情重大藉詞掩案而該令璽琛掌實手滑旋於去年十二月有武生郭予燕赴臣衙門具控稱因遞呈違式值該令醉怒喝役用牛皮掌責二十該令旋亦以該武生酒醉遞呈肆口頂撞當卽掌責二十等情具稟是該令之掌責武生又已自認不諱亦經臣移交臬司委員審理至今未據詳覆臣伏思生員縱有不法亦應詳明學臣先革衣頂然後可施敲扑若所犯不至斥革亦當會同教官稟明戒飭今該縣並不詳稟輒擅自掌責待同盜賊一之謂甚乃至於再其毫無顧忌概可想見臣又伏思士爲四民之首所當養其廉恥加以禮貌則士亦顧名思義知自愛惜而不敢爲苟且之行以自別於齊民民知士之足重自用與慕效勉爲君子然後風俗之厚可不期而成夫爵位名器朝廷所以勸獎天下也生監雖微名器所關如係因罪被革則所責者罪人非責生監也若未經斥革動加掌責尋同盜賊則衣頂不足爲榮學校亦不足重何以服士心而伸士氣乎臣奉命來東就兢以整頓士習爲務凡實係包漕開漕滋事健

訟者經地方官詳到俱立行批革從不敢稍存姑息近年以來士習較前尙爲安靜而地方官待士如此其虐使皆相習成風則武健嚴酷之吏皆以凌辱紳矜爲能殊非國家優待士子之意請旨勅下山東巡撫將署章邱縣璽琛掌責生員及是否浮收并該生監等有無辱罵官長一并提審速結按律嚴究毋任聽原委之員因循拖緩以清塵牘事關州縣浮收擅責矜士臣今按試已周正在清釐積案不敢再容延緩謹奏

論官理穀當流弊疏

時官內閣學士辛從益

爲敬陳管見事竊查江西撫臣毓岱近有籌議民間質借穀石章程一摺奉硃批細心妥爲之總期有益於民貧富兩便方爲至善也欽此仰見我皇上聖慮周詳惟恐撫臣有未諳民情土俗者以愛民之意而或成累民因期以貧富兩益臣恭讀之餘誠忤誠服臣伏查撫臣原奏以推廣社會成法爲名因民間向有私開穀押者貧民得以物質穀以穀與錢其事甚便遂欲令官爲經理步乃

徒不得訛詐貧民不敢擱搶是其說雖曰調劑貧富其意實專爲防護富民也然如其法不惟於貧民無益且於富民有害大凡官多一令卽民多一累民間買賣典質緩急相通日用常行相安已久無論貧富皆知自計盈縮自趨便利惟其不關涉官吏所以相與無爲也今無故官爲經理欲照當舖之例勢必糾紛給帖則吏胥門丁紙筆飯食之費州縣年節之規名色疊出則利富戶所取必多縱使州縣自守清廉尙知約束安能保後任之不踵事增索彼富民積穀雖多亦欲自圖安靜豈肯以富戶有居坐受官府之擾累其必不樂領帖者情也然官府既有給帖之令事在必行則不領官帖者吏胥刀徒必加禁制必不准其典賣穀石則必有土豪市僧勾串書役慨然領帖以遂其壟斷之私官費既多索債必倍攬利必專轉使良善富民有穀而不敢典賣此其爲富民害者一也江西各州縣倉庫豈能盡實往時有借買補倉穀爲名向富民短價勒買者既而并不給其領富民顧恤身家往往入銀代穀以求解脫今若使富民承

領押帖則凡官倉虧穀必惟該富戶是求此其爲富民害者二也往時貧民乏穀向富民典買東家講價不定尙可求之西家典買之途甚寬故貧民便之今乃惟給有官帖者始可交易則其途甚狹轉使市僧領帖得以居奇坐制民食民以物質穀則昂其質價與買貴無殊民以錢贖穀則多方刀勒使不能如限取贖此其爲富民害而固爲貧民害者三也撫臣又曰農民於新穀既登賤價售入迨春夏米貴所儲早罄欲令農民於有穀時赴富家質當其意蓋欲民毋賣穀而祇許其當以爲穀尙可取贖也此又不達民情矣夫農民當有穀時孰不思量入爲出除計口受食外昏嫁日用一切亦欲賣錢使用凡典價祇可及賣價之半譬如時價每石可賣入百文如需錢八千使用則祇賣十石已足今若禁賣使典則祇得半價勢須出典二十石方足應用是使民無故而耗去二十石也將何以資朝夕又須按月加利則何如徑賣十石之爲省乎向來民間典穀三年不贖則沒入其本其取息亦不過一分至二分而止無多至三分者

今乃欲定爲以衣物典穀則每石加息穀三斗以穀典錢則每月加利二分五釐而又不得過一年之限過則沒入其本取息既苛限期又促斷難取贖是以二十石之穀止得半價甫及一年而盡沒之也其累貧民實甚臣所謂貧富交困者此也臣又思撫臣所以必給官帖之意爲恐穀押家被人訛詐及米貴時貧民阻米出境乘機攔搶也臣查此二者皆不常有之事遇荒歉之歲富民肯出穀典賣價縱稍昂貧民亦皆咸悅惟其貪利無厭開糴長價貧民求食不得始而羣起怨署甚至搶奪者有之若夫歉歲阻米出境原貧民不得已之計蓋江西諸郡山多水少產米既稀西隔大庾諸嶺川廣之米不通一遇荒歉惟藉本地之米以資生活若富商圖利裝運出境貧民羣起攔阻者有之蓋欲其賣與本地耳此二者皆因有穀之家爲富不仁所致非因賣穀而致然也總在良有司善爲勸導俾富戶毋閉糴苛索毋越境牟利并出官穀糴賑嚴禁強搶則米直自平民情自安並不關官之給帖否也若富戶藉有官給行帖居奇長價強行運米出境以致眾心不服激而生變則尤爲可慮臣竊意州縣中必有貪圖添設當行可多收陋規者遂託言調劑民食懇懇撫臣入奏抑或有地方豪猾勾串吏胥希圖給帖開行盤踞重利州縣受其朦蔽亦未可知要皆病民之事也臣愚以爲封疆大吏爲治宜總大綱因民所利去民所害買賣一切宜聽其自便況現在民間典賣穀石本屬相安譬人本無病而投以藥劑必轉滋其害臣竊隸江西仰體我皇上勤求民隱安富恤貧之至意見聞所及不敢不竭其愚忱謹奏

論江蘇收漕章程疏

時官江蘇學政辛從益

爲奏明遵旨查辦情形并陳管見仰祈聖鑒事近日江蘇撫臣陶澍奏請嚴禁衿棍包漕橫索漕規一摺奉旨諭江蘇漕務疲敝已久閭閻每苦浮收而各州縣用度浩繁不能不藉資津貼抗玩者卽因此挾制以爲控端必應力加整頓務令兩得其平固不使不肖官吏婪索病民亦不容衿棍把持藉端訐告著該

撫移咨學政查察若拖欠較多實係有心抗糧停其考試倘有仍前縱恣者該學政亦即查明斥革移咨該撫審辦不得稍涉徇縱等因欽此仰見我皇上慎重漕政肅清吏治整頓士習之至意臣伏思國課理應早完凡食毛踐土皆所共知况生監諸聖賢出尤應輸忠效順首先完納爲四民倡乃至包漕抗糧勒索白規士風頹敗至此良可痛恨臣向聞江蘇有此陋習莅任之初卽出示嚴禁并於赴學講書及每郡發落諸生時逐加剴切訓誨其有鬧漕滋事者經地方官詳到無不批革發審茲復欽奉諭旨彌切敬懷現在出示嚴飭各府生監俾知警惕并札飭各學教官查明欠糧抗糧之徒據實詳報分別停考交地方官押追甚者斥革審辦斷不敢稍存姑息惟是江蘇糧額本重豈堪浮收照節雖州縣之津貼自應調劑而閭閻之拮据尤宜體恤久予定額尙肆苛求竟准浮收必滋流弊况以偏重行之其弊將何底止臣莅任以來控漕者紛紛如蘇松等屬所呈除淋尖踢斛外每米一石浮收自四五斗至六七斗不等改收折

色石自四千八百文至五千八百五十文不等查各屬米價每石不過二兩數錢誠如所控浮收已甚其中固有刁生劣監因包漕不遂希圖挾制索規然豈無良民正身糧戶因無力浮交情急上控冀稍減其數者今撫臣奏稱數年以來控漕之案無歲不有積習相沿藉控爲抗仗認分肥各等語意謂控漕之人卽包漕之人臣竊以爲未必盡然官之收漕必用書役官欲浮收勒折尤必委其權於書役書役性多貪狠自浮折全數交官外又必圖肥己橐不滿所欲必不給與印串官既授以權柄勢不得不聽其所爲是官既浮收吏又朘削不獨爲富良小戶之害卽富良生監亦受其累累之不堪遂致上控亦有不得已者撫臣又稱告漕之人如漕米未交亦當飭令完漕再予審辦此乃該省大吏現在辦漕章程凡遇控漕必先押回本州縣勒追其意自爲清漕起見然此法一行在矜棍固宜警知所懼特恐善良之戶橫被抑勒永無申雪之日夫交漕已清誰肯上控其未清者非盡糧戶有心拖欠蓋亦有不肖官吏未滿貪囊多

方留難使不能清交者所賴地方大吏細核情形催令解收實在頑抗乃予押追庶幾不致已甚今一例發回押追地方官操縱在手恨其上控未免加倍抑勒既滿其苛浮之數又逼令具結自誣方給糧串否則竟不解收仍科以抗糧之罪蓋至糧清串給原告受困已深新漕又至豈能復求申雪是徒逼糧戶以浮交而無審辦之實也撫臣又稱因生監需索漕規地方官費無所出因取償於貧良之小戶爲牽長補短之計臣伏思書役貪得無厭遇事婪索小民是其常態縱無此等生監小民之被苛徵亦斷不能爲之稍減總在州縣得人能戢吏安民而已臣查近日太倉鎮洋青浦紳士各有公呈稱漕書蓄養打手專毆控漕之人各等語雖一面之詞豈盡無因今縱不能設法裁禁豈可張之轉令盛也夫生監身列膠庠其有包漕開漕儘可革辦不獨學政卽督撫皆得徑行斥革惟書役爲州縣收漕倚官爲庇印串在其掌握倘違例加倍浮收無人敢控獨何法以懲治之臣在任兩年生監因漕案被革者多矣卒未聞書役有因

浮收獲咎者則書役之權重可知撫臣又稱州縣果有浮收入已情事必當執法嚴懲等語臣以爲此說未必能行該撫既知州縣不得不浮收而許其浮收矣若又罪其浮收而加以叅辦此必無之事且州縣所浮收入已與否督撫又何從查知臣竊惟立法貴得其中誠有如聖諭必兩持其平者且國課本有定額而浮收并無窮期今如該撫所奏凡告漕者卽謂之包漕是既予地方官以浮收之權又絕眾糧戶上控之路誠恐不肖官吏恃有此奏將來肆意橫徵逐年增長閭閻受害日深其流弊有不可勝言者夫劣紳固律所不宥苛政亦法所必裁伏乞皇上飭下該督撫妥立章程毋使偏重務期矜棍蠹吏各有懲創庶幾漕政可清而貧良小民得沾實惠至臣職司訓士自當嚴切教誨隨時整頓斷不敢稍涉徇縱致貽地方官掣肘之嫌惟思矯枉勢必過正而創法宜防流弊管見所及不敢不以上陳謹奏

題旌義門本

清巡撫伊星阿滿洲

爲秉公舉義懇詳請題以獎善良以廣旣聞事據署在西布政使司布政使李承鄴詳請據州袁府知府高芝詳請萬載縣知縣謝衣詳准儒學教諭彭振東訓導李平查看得里民周繼德同居傳及六世丁口蕃至百餘姜家之被常溫田氏之荆不瘁由茲九世同處將造企乎張公抑或入葉同堂堪追芳於陳室一門雍和萬邑景仰紳士既同詞而請敝學合遵例以聞並據查取世系事實理合造具清冊同族鄰甘結詳轉到縣卑職確查周繼德六世同堂委係屬實核對丁口亦屬相符並無虛捏合將送到冊結詳請本府等情據此該袁州府高芝看得萬載縣民周繼德同居業經六世共爨已逾百人式好無尤雍睦之風足尙人言無間鄉里之頌堪憑於以徵聖治之感興實可爲人倫之矜式旣符旌典宜協輿情茲據該縣學查取冊結加具印結詳送前來理合具文詳請轉詳到司據該署布政使李承鄴查看得聖治光昌海宇仰鄧隆之盛皇仁周浹閭閻稱樂利之休惟朝廷之涵濡已深斯草野之雍和克著茲有萬載縣民周繼德者六世同居一門敦睦合炊煙於累代食德飲和聚丁口者百餘型仁講讓兄弟則睦怡有序孫曾更繁衍多賢宜邀旌表以樹風聲茲據該府縣學取造冊結具詳前來本署司查與例符相應詳請具題請旌等情呈詳到臣據此該臣看得會典內載旌表義門有累世同居和睦無間者建坊里門題名忠義孝悌祠內等語茲據署布政使李承鄴詳稱有萬載縣民周繼德者六世同居一門敦睦合炊煙於累代食德飲和聚丁口者百餘型仁講讓宜邀旌典以樹風聲造具冊結請題前來臣覆查無異除將冊結揭送禮部外理合具題伏乞皇上睿鑒勅部議覆施行

送教巡檢序

元危 素金谿

天歷至順之間海南黎母山 在瓊州安定縣卽五指山 寇作出師討之時主將募勇悍無賴子弟爲之前驅謂之各刺罕軍答刺罕軍者縱恣無禁也於是盡斬刈黎人無遺種其後主將者官廣西用其法亦募勇悍無賴子弟以制

莫猶獐人之爲寇者初亦頗立禦寇功久則習知官府事體仍潛與寇通寇山
則有司必使之逐寇寇既不可得乃盜財貨牛豕斬馘良民以要賞其民罹荼
毒者二十年去天萬里無所控訴歲復仰給縣官耗費亡藝言者熟知其爲粵
害請罷其所給一旦發憤相呼起爲劇盜元帥府莫能制因上聞於朝數調行
省兵擊之多不利殺湖廣省臣及諸將佐連撤數城震動南粵盜所未至者其
民供給餽饗富完之家立致窮乏天子哀矜遠人降詔書諭降此羣盜束手請
命之秋也予嘗攷國朝初取南粵功狀惟靜江堅壁難下他郡縣望風送款當
此之時得之敵國之手猶若是易易耳今海內既平十一年而兵連禍結賊殺
王官鼠竊狗偷上煩當宁之慮是必有其故矣識時務之俊傑豈能坐視而不
開口一吐其胸中之奇乎宜春教遂初 按梁孟敬先生居隱園記稱家萬戰
此云宜春蓋舉古郡名言之 嘗從軍廣西論功授烏程管界巡檢昔蘇文忠
公守徐州以沂多盜乞兼兵馬巡檢今遂初專居是職乃蘇公之願爲者國家
之待遂初亦云不薄遂初早用於兵間深知所以設施之宜辨止戈不殺之意
知無不言臣子之義益歷舉陳於闕下方侍從文臣聞語訥言無患其言之不
達於天聽也余與遂初未嘗有一目之雅太史周君以聲素稱其淳愿因其赴
官而及廣西之事不諱以予言爲然否 采說學齋稿補

陳侯述職遷任序

涂 觀豐城

述職臣子之大節也內而王畿外而藩臬以至要荒凡服命守土食祿者皆三
載修觀天庭重臣節也既至京師胥集於天官冢宰暨臺憲考其善最品其賢
否以定其黜陟其賢善功最有足徵者合章上聞特頒璽書俾之復任而安民
也於時吾江萬載陳侯實在其列介行間其交游春官周君宗智等請余言
爲贈予惟臣子之禮述職爲重而朝廷重在安民則又有黜陟之典近者會同
考覈以善最無聞黜罷者十餘人厥選精矣陳侯賢善功最足稱奉天章擬脂
車以慰父老引領之望予將何言爲之贈予聞侯以東廣雋才發身科目出宰

於袁律已傳事興利除害廉幹目著歲己丑九旱甲午霖雨害苗律特甚時又
猛虎當道噬人侯爲禱於城隍之神旱則雨降霖則晴應虎則他逸鄰邑利爲
三異民有頑狂梗化肆毒於鄉侯聞而檄召之明正其罪而竄逐之又有盜賊
若干人出沒山谷爲害滋蔓侯募鄉之勇健者設法畧緝捕未幾俱獲之良善
以安遠近復有除害之譽其他政事率多類此夫牧民之職興利除害爲先興
利而利生除害而害去非特其才之敏也其忠信誠懇之心必有素孚於神人
者是宜守郡者稱之爲藩臬者稱之茲述職來京蒙宰臺憲亦合章稱之璽書
褒嘉俾之復往安民則所以修臣子之禮副民社之託上下之間交盡其道矣
是行也不亦榮且重矣哉雖然古人贈言不以頌而以規傳曰官怠於官成既
盡其已然益勉其未然慎終如始以自圖遠大可也爲臣子者忠於所事竭
竭力以安民食君之祿固無忝於心矣然上之待下旌能舉善無所不至若某
也牧大郡某也莅藩司非昔之賢令丹乎君其勉之豐爵厚秩顯庸於時斷有

可期矣豈特交遊諸公之望哉亦區區贈言願望之意也

徐侯生祠志序

彭天補

廣洞橋者吾邑西鄉也已生祠徐侯而環鄉之民咸起而爭之曰吾眾人之母
也豈爾鄉所得私耶邑中之民復起而爭曰吾賢父母也孰不得祀之亦孰不
欲祀之而獨於爾鄉何耶乃請於今父母張侯度邑之迎春亭隙地爲通衢復
捐俸佐之不旬日祠成豐棟飛臺崇廣麗緻像而肖之以識不忘一時能言之
士述休美揚湛灑亦既爛然文矣余率邑民百拜祠下乃相與作而歎曰夫侯
也去吾萬踰一星矣而政若新吾儕不以久故逸也其瞻依之也若撫摩噢咻
之未常離不以遠故狎也是可以觀政矣侯之莅萬也百姓所安安之所愚苦
立罷之而其大者莫如平巨寇恤水災邑谷深山阻崎嶇曲折其治境之窮處
爲沂源大圍介乎寧新楚湘犬牙相制籌薄礪澗繞繞暴悍者穴匿其中閃倏
跳警而殲除之令急於郵傳侯談笑樽俎默授方略遂探穴俘之林攫壑薙醜

類一空且置壘設鎮增銅鼓石守禦之兵以絕亂源而食棧之鴟化為好音歲
丙子淫雨爲虐漂虛舍圯城堞莽莽巨浸民不得耕食侯出帑餘餼庾羨粟便
宜從事蹈文法之所禁而不以爲嫌予之粟以活餓者其稍有食而將餓者與
之金躬自行鄉落間以口計其貧弱而賑貸之不使負載襁褓者相屬於道其
他葺津梁以資利涉營高閭以奠宇宇緩徵輸以甦積逋諸所借注一出於純
心精慮絕無鬻恩要譽之私程難仆伯於昔牧而計效倍之是豈貌取聲襲爲
哉夫衝狼牙之石者非巨流無力破胥髀之骨者非大鉞無斷微侯則雀符之
眾孰與肅清沮洳之區孰與安輯民幸脫鋒鏑之警而得享更生之慶是侯之
大有造於吾萬也故構而亭未已也復祀而鄉祀而鄉未已也復祀而邑冠裳
赫奕俎豆森嚴衢歌巷謠朝尸暮祝稽古勿剪之棠墮淚之碑類皆得之身後
未有若侯今日之過而化生而榮者也昔韓昌黎公以潮刺史量移吾袁及召
還赴闕欲推放免備隸之政施之天下而袁人廟祀至今儼然潮於海內爲名
郡卽以侯才方昌黎潮亦不能竟侯才而卓軌循聲已跬步於袁之下邑昌黎
公有德於袁歷於茲而民不能忘今吾民去侯僅十餘稔其能不依依者豈人
情哉所居民富所去民思侯今之昌黎公也誦斯道太原仰瞻孔卓之詩卽侯
已心任之矣余不佞敬綴言於末簡

送四川都司經歷彭宗殷之任序

蜀爲坤維大都會其南則屏蔽獠獠東西殆數千里其西控制番羌南北亦數
千里邊烽之警蓋無虛歲而頭者松潘諸夷之抄掠邊邑成都西北爲之駭然
是以兵政不可不飭而在蜀尤爲急務大抵天下承平日久諸位武職多懶且
玩隊伍不練兵革不犀屯餉不給士卒之逃相半卒有急難罔知攸措如此者在
在然也萬載彭銘字宗殷擢爲四川都司經歷其同鄉諸友屬言送之四川都
司所領爲衛者十爲所者八軍兵指揮司一招討司一其綱領掣於都司而凡
軍政之自上達下軍情之由下訴上者其案牘出納皆綜理於經歷苟非獨之

明而稽之審則其弊甚繁而其患甚大矣銘由鄉校階職凡簿書所載必用詳察以告諸帥使軍政之隆者以酬敵者以補軍情之鬱者以暢紓者以解武卒由是而練武備由是而理則內可以除寇敵外可以固邊圉豈不克勝厥任也耶若曰俎豆之事嘗聞軍旅之事未學則非予所望也成化十四年戊戌三月賜進士及第嘉謨大夫禮部右侍郎翰林侍讀學士南京國子祭酒西川周洪謨謹贈序

贈鄉兵都統耆英彭君本道功成序

昔子游爲武城宰夫子以得人爲問則知爲政當以人才爲先也人才非一類或德行或文學或武勇或智謀凡可以裨益治理皆爲政者所當敬重而器使之也否則偏智獨力處無事可也一旦遇事變幾何能安戢而平定之哉袁爲南昌大郡其屬邑萬載西抵瀏陽北接寧州深山峻谷居人稀少距治遼遠東連上高新昌邊鄙之地奸惡互相隱匿故古今多盜賊或時而治或時而亂顧

畏人者之賢否何如耳嘉靖初年邑之東鄉羅城有惡少兄弟周其姓者聚數夥羣不逞之徒負羅城高村環溪嶺厲公陂諸險爲固潛伏往來劫掠鄉村殺虜奸汙燒燬民居莫敢誰何上高新昌新喻分宜亦多受害縣兵出則彼沒縣兵息則彼興捕之太急則易服色越境以避鋒隨復遣誘瀏陽諸賊歸劫其勢愈盛民害且亟當道諸大職深爲之懼二年秋僉憲余公按臨其邑募民兵數千併捕之擇智謀才勇之尤者爲總領時邑侯盧公賢令也有知人之明以治之東鄉小溪彭君本道薦余公欣然受之委以鄉兵都統耆老之任餞遣甚優彭君受任志圖克捷與厥弟副總本朝併子姪英銳者數十輩晨夜捕緝散遣鄉兵分屯甯瀏險隘塞其交通之路賄令各方細民密覘賊蹤有私往來者輒擒之機智百發賊力難支脅從散亡而周氏兄弟賊勢孤矣三年二月追賊兄至上高橫坑其鄉人共擒之以獻其邑長九月十六日捕賊弟至羅城四鼓就擒并獲副賊強猛者數人餘凶悉殄而民患蕩平矣方俘獻盧侯而都憲盛公

蔣長嚴公副憲查公過皆撫按同聲稱賀嘉盧侯之知人余公之善任而賚彭
若之能不負所舉也時予修譜其家亦喜沐其平安之賜贈俚言以揄揚且其
先君子宗殷抱文武經濟分閩西蜀討平松潘諸夷厥功懋著則彭君宗殷爲
國平蠻可謂能用其勇矣忠也彭君本道爲鄉平賊可謂能繼其志矣非孝乎
忠臣孝子萃於一門莫大之福也將見能聲上達必有大任加焉彭君其勉之
毋曰吾老矣不能用也明嘉靖甲申十月賜進士第前南京監察御史兼提督
直隸學校新喻縣黎鳳拜贈

貞烈傳後序

明治中葉 璽邑舉人

往余忝竊池陽謁忠烈祠則悚然歎其六烈女與黃趙雙忠爭不朽名寒如霜
雪亦可貴矣而六烈中若黃侍中翁夫人并二女俱赴溺死則尤爲嗟異嗚呼
死生亦難矣粉黛笄禪之流顧若是烈而貞耶彼冠裳鳴佩者相然信死後相
背之盤也二女同心遂與其母偕則夫忠臣烈女其義何異哉孔子曰匹夫不

可奪志蓋謂是矣乃人不欲死顧詭人曰我死弗獲死然耶初槐梟在君之自
景陵遷萬載也蓋攜妻妾一子二女以行僅六十里夜盜突劫其舟任君之妻
李與其二女忿不辱於盜遂投江而死夫槐梟君於黃侍中所遭雖不侔而李
與二女之死於翁與二女之心未嘗不同一烈也說者謂翁與二女之死爲黃
侍中身化然則槐梟君亦淵源於光祿廷尉公刑于者然耶烈哉李與二女之
得其正而死也蓋其貞心峻節既不肯爲盜所辱而又恨其力不能磔諸賊奴
徒堅其不從之志以禦之則彼不騁梟心於狼性不已也故寧以身卽沈於江
漢之廣毋寧以身俟及於盜賊之手卒之三姬沒彼凶殘者亦怛然寒膽遁去
槐梟君父子因得以保全然則黃之翁死於夫有婦道焉黃二女死於父有子
道焉李雖不死於夫而因全其夫以及其子則婦道貞矣任二女雖不死於父
而因全其父以及其兄則子道貞矣明識遠圖志不可奪赴死如歸誠知所處
豈感慨自潔其畫無復之者可同日語哉且攷翁夫人投水時引二女手結其

裙裾及覓屍得之斗門橋下母子三人引手尙一串國人異之有司用棺斂父老咸曰此黃狀元妻女云今按槐鳧君所述李與二女死節狀亦謂其母女三人齊扭下水後三日屍骸突出子母猶相連襟帶謹飭其面如生則又似乎翁與二女皆豈天所以昭其烈者固然耶景陵人士亦必曰此任邑博妻女嗚呼三姬並烈清芬不朽五葉汾滄水冽風高彼詘節而生命以延者君子且以旦暮眎夫何足云抑又聞先正有言天之報施於人莫大於其子孫之賢不肖而不知者以其身之富貴貧賤壽夭真論舛矣卽史記馮道傳見其曲顏苟活逢迎數主飴享高爵重祿視其君若傳舍過客然亦竟殄後也今觀任節婦李之履行殆有烈丈夫之所難者雖其相槐鳧君成大儒爲名師疑有未盡則將於其子義元乎驗之人亦願見養元之力學績文當有以爲節婦榮也余固壯任節婦母女之死有同於黃節婦母女之烈而深信天地之正氣人心之秉彝無間古今未嘗泯滅獨愧夫婦女鬚眉自喪其心而爲諸姬之恥者

周義門序

知縣徐曰都奉新進士

萬載黃茹周氏七世同居天子旌其家曰義門蓋國家承平日久涵濡休養和氣薰蒸至於山陬僻壤莫不欣然向化甚且累世孝謹聚順一堂視夫異宅別爨思以肥其一身一家者蔑如也豈不盛歟月臺辛君萬載文學士又周氏姻姪也知其家甚確嘗告予曰周氏之先不及詳今歷七世世推一人主家政百數十人皆受裁焉自習舉子業以至力耕任勞服賈走四方量其資之近而命之無弗從者績紡紉緘使婦女各執一事以供冬夏之布無私鬻於市者小兒女序坐飲啖寂不聞聲家故薄所食粗糲園蔬而已魚肉非歲時伏腊不設至於老者賓客未嘗或缺凡卑幼稟命拱而立莫敢坐於長者之前平居教子孫循循有禮里中識與不識望而知爲周氏子也予聞而歎曰周氏家法推之平天下可也豈特風示一鄉一邑已哉宋江州陳義門百犬同牢而食一犬不至眾犬不嘗今周氏有豚甫生母亡旁犬就豚乳之曰以爲常夫和順之氣中人

而及物不假勉強而皆出於性之自然卽此一天先後如出一轍是足膺義門之寵錫而無愧矣辛君請予文紀其盛予固樂道節義之事者遂書以爲序使歸於義門庶有以堅其志而爲天下後世法焉

高城九老齒錄序

郭大經

古者大夫退老教其鄉之子弟及興賢能鄉老鄉大夫獻其書凡以教起於鄉尙齒德厚風俗也高城古高侯鄉南唐李徵古產於斯刺袁州敕改所居曰懷舊鄉孕秀里徐舍人先聖廟記稱其炳筠州之靈可見山川秀異賢士挺生越於今雖科名不逮昔而蓄道德能文章龐眉壽考樹一鄉儀型者猶踵相接也辛氏世居其地族督瑞庵先生士林推祭酒其族蔚山公從之公並以行誼著比屋而居者爲王氏明經弼子與岐山律堂二公俱端風尙勵名檢望衡居者則余族惠軒前輩以禮法範及門多造就同族西京公亦力持名教有先民矩矱惟周靜齋明經相距約數里不時過從里之人以九老目之共矜式焉憶余

弱冠後授讀山泉書屋獲謁瑞庵惠軒兩先生而靜齋弼子蔚山諸老亦時接其言論風裁每見瑞庵先生與諸老游息也來而翩然望而幡然聚而藹然其親恭其色懌其詞簡樸而溫文盎道氣之勝豈與古香山九老爲期矣閱歲余倖售北上薄宦於外末由過其地則聞諸老構宅一區燕集有所既而後先謝世祀未至於其中以鄉之人薰德善良當必有緬溯風規不能忍置諸懷者奚啻子孫不忘云爾哉今夏四月瑞庵先生曾孫明珠姻丈謀梓諸老齒錄委序於余余作而歎曰盛矣哉斯舉也自交道之衰浮薄輕棄劉李標著論已慨乎其言之乃能於數傳而後修其祀復系以譜聯屬之思將有引於勿替者能可知諸前輩道義相結其託根也厚而後世賢子孫篤承先志其綿澤者彌遠已朋友之義孝弟之心守先待後之事悉於是乎在鄉之人觀而化焉相與崇齒讓厚風俗賢能之興若徵古其人者挺生輩出又安在今之異於古所云也是爲序

寒衣會序

辛從益

窮民無告王政必先撫而字之朝廷所望於良有司也而有司所望又在於民之相恤恤之事有二饑與寒而已饑者易爲食而寒之給衣較難天下有偶荒之歲無不寒之冬以常有之困行多費之惠宜其難也古司徒之職族使相葬黨使相救卅使相周上以是帥下以是勸所以成親睦之化也我縣土瘠產薄而民情尙近厚好義樂施之舉往往有之自歲饑公米樂助外其設公會爲窮民計者有因心堂施棺之會有育嬰堂養女之會相葬相周救與古義合而寒衣之施尙闕焉蓋以費侈人繁情僞多而喧爭易啟也邑侯錫山丁松喬蒞任之四年頻歲豐登四民安業思所以廣恩樹德求民困所未紓進父老紳士訪焉則僉以寒衣宜施對侯慨然立出金三百付之已而縣人競相傳頌以爲我公誠仁甚乃肯捐清俸爲吾縣窮民計吾儕爲同縣奈何不自相恤於是爭輸樂助不勸而集數日間得八百金而未已廼相與推廣侯惠計永侯之澤於無

窮先立輪冊登侯捐數於首邑人所輸陸續次焉弁請於侯先事酌籌製襖施襖之法及存留生息之規備具擇邑之殷實賢能者司其事官爲左右之侯既喜邑人之勇於從義也爲核定程式載於冊而屬余以序余惟賑窮恤貧俗之美政之仁也昔漢王望爲青州刺史行部閱饑民裸行以便宜出所在布作褐衣晉鎮南將軍劉宏憐持更老兵無襦給韋袍複帽並見稱史冊然皆出自官帑非由減俸今侯此舉視兩賢有過之無不及五袴之歌復見於今矣而縣人感侯之仁亦遂能踴躍捐助以此見善倡必應而政之大可爲也是冊也傳遠鄉之聞風踵捐者尙不知其幾以吾邑好義之多不患公財之不聚而特慮誤於所施誠能守侯之意而推之將來釀金所舉皆有益民生事既不惑於非義之義而民得因免饑寒而益生其廉恥禮義之心我侯衣被萬人之澤豈有涯乎於是欣然櫛管而序之嘉慶丙寅八月既望

因心堂序

嘉慶丙寅夏余攝篆萬載世家子王生本培執擘問字余愛其醇謹并知其家學有自暇出因心堂冊索序閱之知其自太父來積德深矣堂始乾隆十八年生祖寅齋邀同志七十人爲掩骼計距今五十四載銀兩不足三十而施棺無算兼修理道路有餘則買田且構堂宇焉皆寅齋經理功也事本長民者責蒞政日淺未及舉行方以爲歉生家世清貧顧毅然爲己任相因勿替豈不可敬而在堂諸君皆能因其不忍之心以行不忍之實各解私橐鳩成盛舉以視公予麥舟驛丞瘞旅相去何如風俗不既厚乎要非倡首之功不至是夫善作者須善成今堂之始寅齋既生息致羸堂之構厥弟雲亭復偕劉恬齋輩經營得法可謂善作矣歟其後者尙務所以成之當遴選老成司其出入歲有贏餘便可垂久天下事不盛則衰不消則長盈虛之數必無中立也在堂諸君其念之即不忍之心即仁之所見端也使因是心而充焉達則濟一世窮則盡其力之所能爲敦善行而不息一言可行終身以是爲修心之道可卽以是爲傳心之道亦可

聖誕碑案序

知縣江璧

夫佛門誕降猶傳香火因緣道術飛昇尙有丹砂供養矧以生民未有之聖際茲誕育之辰而可酒醴無陳牲牢不設哉然粵稽載籍崇報雖隆上下釋菜聿修簋豆之文而庚子陳經未備樽彝之祀求諸往古典尙缺如我朝重道崇儒有加無已自雍正五年始命於先聖誕辰行釋奠之禮肇行於浙遞及江右彬彬乎尊師之典邁越前朝矣萬載學宮前此年久弗治道光辛丑歲多士葺而新之鮑君鍾瑞捐錢二百千文嗣又倡捐田若干畝次則郭君如衡如盤續捐田畝及宋君鳴謙鮑君承宜捐貲敬備誕辰祭費增修祭器以垂永久厥功懋焉夫自二龍繞室五老降庭嘉祥兆於尼山靈異鍾於泗水在聖人與天無極遠待介壽於編氓而斯民率土同登竊願薦馨以祝嘏六經尊俎豆敦水源木本之思萬古仰衣冠在秋報春祈而外率行罔替式禮無愆迨丁未之冬鮑君

復於聖廟塹外度隙地爲土地祠輪奐聿新有美畢備歲在丁卯予來宰是邦適當先聖誕辰修歲祀之典先期致齋肅恭將事祭之日率諸生登堂謁聖見夫棟宇森列鐘簴燦陳百度具修儀物備舉竊幸都人士雍容有禮因相與嘆聖教之昌明而人文之所由蔚起也是爲序

建義學序

古者家有塾黨有庠州有序國有學自公卿大夫與凡民子弟皆得入其中教之以聖賢之書申之以孝弟之義開之以功名之門廣教化美風俗育真才端必由此後世不然是以學校無真儒名教多敗類風俗日澆人心日僞而莫知所止萬載土瘠民貧亂踵有定數年以來講習多輟居官者謂讀書爲人自己事何煩上責也夫邑令爲民父母父母於子養之教之其心始慰坐視昏愚不爲省憂乎知縣常維楨於康熙十七年冬來吏茲土時滿城荆棘居民鮮少多方招撫次年方漸歸集鳩形鵠面何能從事詩書雖欲興起造就無由也而與

人爲善慊慊不忘至十九年民氣稍舒卽立義學於關帝殿延生員汪映極爲師招致生童一十餘人肄業其中所需薪米束修禮物皆捐貲以時饋給每年約費五六十金公暇親詣督課勉勤戒惰諄諄以正心術勵廉隅敦倫紀興禮讓爲先朔望發題作文精通者賞之疎謬者正之告諭條目詳列嚴謹足年冬學憲詹試袁取義學員生何士傑郭邦泰優等錄科童生辛勤學宋啟連辛受道廷邑庠二十二年學憲高進童生辛如璟郭鍾羅辛金聲辛受位宋廷御易首乾辛邦榮鄧上朱文光宋希震汪有耀十一名補弟子員由是文風士習亦自彬彬儒雅較之往昔日新月盛後之居官者慎勿視此爲迂務也

金生兄成均入都送行序

邑歲貢喻大同

昔袁有芑山張氏當其貢入成均也躬詣京師購書數萬卷以有關於性理經濟者則列其篇目藏之閣中而甲乙之其搜羅之廣研鍊之精可謂至矣夫以學術之宜辨異同也自明之中葉以後多以宋儒爲支離謬欲直決其藩而吾

郡芑山之所遜志者攷學術源流之故則以性理書目統之攷治術源流之故則以經濟書目統之其不以內聖外王之學爲易知而惟孜孜焉循循焉求諸內而務明性理求諸外而務達經濟蓋全體大用之規模在是矣此所以當日在京師是以傾動名公卿賢士於一時也逮我純皇帝詔求遺書凡內京外直省諸臣工務以闡明性學治法關係世道人心者方准採訪而進呈之與芑山購書之法若合符節是求書之法卽求學之方矣金生積學既久邇年來於國朝先正可入名儒傳文苑傳名臣傳循吏傳者莫不備爲搜討而決別之今又躬詣京師徧觀諸王公巨卿本學術以措安天下者以擴其識而壯其懷豈徒著錄成均爲儒學中秉鐸一方之士也金生勉乎哉所學之規模既大有挈諸天下而裕如者矣抑自世之溺於濫時文也卽釐正文體者尙不易得況講明學術扶樹道教乎余與金生於風雨晦明之際言之屢矣然則此一行也內必嬰諸正學之防外必要諸正朝廷正百官正萬民之防余烏得不爲舊學者告之告之維何曰成均者所以成其平均天下之學也於祖道時宜以脩鵬庶登車攬轡無不酬之壯志矣彼僅以行色之愉快相美者要不足以知天下士光緒己卯春月

東洲敬教堂序

蔣芳南昌舉人

康樂大橋之東洲書院於多士肄業而外復建敬教堂凡小試所需悉取給於堂既歲事首事諸君子臚列其樂輸之成數終歲之出入爲一冊而屬余序余自維固陋然絀茲盛舉其曷敢辭在虞書曰敬敷五教蓋以五品爲教而敷布之欲民以有義有親有序有別有信爲務而盡倫以幾於成德也左氏傳載衛文公敬教勸學則知教與學相資教隆而學亦隆也夫人其父生而師教之故學記曰師嚴而後道尊道尊而後民知敬學蓋以道之寄存乎教而教之施賴乎師然則言敬教而尊師之意在焉師尊而道尊是堂之名其意亦至深遠矣堂去書院僅數十步讀書者得以朝夕至游斯堂者庶幾深思敬教之義而紬

繹之凡爲教者則勤思夫長善救失之訓而善誘以時教之正業退息居學凡爲學者亦恪守夫大學敬道之意以馴致於知類通達強立不反則是堂之建豈獨區區財用之微實有以探古人化民成俗之本原而與書院之設相與有成也請以質之首事諸君子是爲序

連城集序

明知府汪哲冰

海內文章家毋慮數十百然大率根乎性術淵靜沖恬者其文醇以典豪宕瑰瑋者其文奇以邁生平表樹亦多稱是曠樂崑崙張先生雅負奇才起家高第佐南司馬曹海內想望風采迨秉憲分藩若而年尉旋西粵我與之人日祝其出擁節鉞入筦樞衡以究經濟之用不謂年不滿德位不匹才未究萬分之一至今尙論者往往於翰楮間窺見一斑令嗣汝梅彙先生遺稿若干首爲一集而問序於余不佞業從鄉父老沐先生膏澤迨入貢而先生抱疴山中僅一望見顏色然高風朗韻自得於警歎指顧之餘當粵之多事也高夷外訃山寇內煽而歲且稔甚先生不難以其身爲保障擘畫方略動中機宜宜論一檄賢於十萬師湯陸晏然家室安堵誰之力也庶幾當八面而制百蠻者哉彼妒口篋書先生不顧求幾朝論白尋補滇藩乙巳入賀遂高卧不復起則先生之能已見於天下所爲履蹈固自有不朽者區區文章特賸技耳今觀序記之鋪敘詳核檄劄之縱橫曲折駢語莊麗翰東委婉叩之泠然金石之音咀之冲然五味之和所謂神氣英發而德器沖恬蓋兼之也以故矢口成詞不事刻畫而文采自工卽以登古作者之塲吾未知所低昂也豈與夫說鈴和鼓工顰幌以見奇者同日語哉不佞鄙俚不爛古文詞而叨守名郡竊嚮慕乎先生之德因及其言之文也不辭而爲之序

四書理解序

學政湯聘

崑山徐氏初學辨體一書本老泉評孟子疊山評檀弓及有明郭鍾之徒評諸經遺意而集其成然於四子書則缺而未備也庠州楊廣文維鑑好古勤學迴

絕時趨晚年取四子書悉以文法評之大意與徐氏辨體相等不可謂非卓然成一家言者竊維朱子讀書之法第教人虛心涵泳切已體察不可橫生意見妄爲穿鑿若徒以文求是則周子所譏爲陋者矣今觀易序因辭通意之說則沿流溯源甯與航斷港絕潢而求至於海者同類而共笑也哉余悼士習文勝急欲進以實學而慮難遽轉並因其素所沒溺者而姑爲之因勢利導焉按試諸郡輒用辨體一書爲多士訓揚廣文適以四書理解問序於予予嘉其能補徐氏之所未及也於是乎書

李厚岡集序

大學士費 瀋浙江進士

李明府厚岡予癸未同年也爲人樸誠端謹篤學勵行居家孝友鄉人化之其爲文宏深肅括高出輩流不懈而及於古登第後因需次尙遠授徒鄉里陶冶羣材著作益富銓期既屆先選湖南永興今年餘以憂去服闋挑發雲南任督我呈貢令十餘年勤心撫字治行有聲予兩任滇藩均得共勤吏事且以同譜

故益契治焉既而沒於進取引年乞休挽留弗獲又以官囊蕭然暫延爲大理書院師明年始僦裝歸里自是以後不遇音問者十餘載矣壬戌夏予防河清江嗣君光宰來謁始知厚岡已於庚申冬月朔化去並捧其所著經義攷四書細論地理考古今體詩文若干帙就正於予予細加繙閱竊歎其闢發書旨折衷醇正考訂山川見聞精確形諸吟咏抒寫性靈均足以信今而傳後者惜予防河公冗不及作序緣書此以貽之嘉慶七年壬戌七月既望

最秀園文稿序

宜春令黃河清臨海進士

文必載道翼經而後其言立三代下如賈生達於禮董子深於春秋韓子約六經之旨以成文比比皆是予嘗有志於學未能自力惟所至必事賢士大夫冀同志有以扶進之比來宜春於萬載得兩人一爲厚岡李先生湛深經義著述等身爲余所事者先生則以友遇之一爲朝岳辛子爲予所友者而辛子顧執禮甚恭凡予撰學堂集詩文辛子並爲定而序之茲復其最秀園稿自家走南

昌欲予一言予能無本其志而畧道其所以爲文者乎夫江河之大且深也皆有重源長流不息而又匯納百川之水故能經南北數千里沛然而達於海以斯文論之六經非其重源乎辛子初見時曾以所著春秋申議相質予因知其潛心經學自後予有所作必屬是正辛子於予亦然嘉慶初就館樊副總戎益相與切劘無間而余之獲奉教於李先生亦自此始方其時公暇輒理舊業先生數郵示辨明經古之作歲率四五通而辛子時出所爲文皆本古誦扶名教殷殷求益之意溢於書間每燭跋更關心目開朗恍乎至道在前誠不知上有公府之趨承下有簿書之鞅掌也以予於道無所聞於文無所得而李先生與辛子共信其不敢自是不能自己之志有同焉者故往復相深直諒多聞之助日受之而不自知而辛子之所自爲亦從可識矣今徵序於余又屬審其作惡淵淵乎不敢自是循循然不能自己之志歷久不變過此以往又烏能測其所至乎韓子云無迷其途無絕其源終其身而已矣辛子勉乎哉江之越離

堆下注豫（卽澆瀕之轉音）河之冒積石出龍門激蕩成奇不可方物惟其來之有本故遇境斯成瓌觀也辛子其益勉乎哉今厚而離不復作矣而辛氏多賢融初孝廉暨進士敬堂嘗相與肆力古學敬堂遠宦都門而融初近在里間可效切磋獨余匏繫章門回思昔年師友之益滋不可再此又因序辛子稿而悵然增感者也

瞻思堂賦并序

徐一唯

余讀七篇至端木公築室於場獨居三年事嘗撫卷日賜於尼父心喪者也尙依依不舍如是况親喪回所自盡者乎近世學者執漢儒墓非中之說遂視此事若有所託而逃不知事固依乎中庸尤當觀其誠僞洵根於一念之誠則古人友于兄弟者固有以身代之以痛分之者矣又安得以屬父母之墓爲迂耶余今茲邦三易歲矣採風問俗令有責焉龍生以仁孝行久勒口碑值公暇披閱瞻思堂集玩諸名公載筆而龍生之瞻思誠所謂常目在

之中心藏之者也車溪之廬誠身與之依而神與之游久龍生賢矣哉因託
意命詞作爲茲賦以附風人之旨而事之印證固反之此心而自得云

夫何怙恃之蚤逝兮方週期而予遺製芰荷之無從兮誠弱質之易迷長夜徂
以難旦兮慨甯氏之栖栖倚北極以延佇兮慕梁公之與歸悼嚴慈之不復起
兮歎此離幸有母姨可以想像兮刻木者誰盼彼車溪兮若天漢之流漸有岡
可眠兮寔窆者其在茲諒天路之豈遐兮不可階而升隨感四序之迭運兮惟
野閒之淒其惟予懷之弗渝兮知造次必於是曾參養智兮羊棗之不忍嗜親
未及養兮徒絕粒以興悲築室於墳兮賜慕師尼昊天罔極兮舍親之坵墓何
依景曜末照兮苦奔歎之疾趨岸谷岑寥兮聽蟋蟀之鳴時少發憤於下帷兮
念書香之不可燼畢集於採芹兮何皇於衡門之棲遲誦梁甫之吟兮九野鼎
鑪笑荷鍾之過兮埋也何爲奄大塊之飄塵兮駟馬末追冥宮之難再啟兮孰
是靈衣有塞可廬兮踐履不遺思親而不見兮見親之壤卽若與親而相依嗟
有生之必化兮胡庸彼蠅飛而蚊聚寄光景於逆旅兮顧堂與於薛荔祖榮華
於朝露兮繚蓬寶於辛夷嗟夫邈無內顧兮刑于寡妻牛眠遙迤兮以續以似
檄論褒嘉兮帝命且至天理之在人心兮孝子承錫兩類

質平詩稿序

大學士戴均元大吏進士

萬載辛君元展緘其尊甫質平公詩稿寓書問序於予公與予同舉於鄉歷官
於蜀所至有聲內擢部曹未幾引疾去曩予視學川中校士之暇與公剪燭論
詩妙契元匠心折雅深宦轍分馳駒光若駛每當花朝月夕未嘗不想見撫髭
點筆時也論語言授政不違誦詩奚爲良以詩本人情該物理苟明手溫柔敦
厚之旨卽達乎弛張損益之宜公以孝友之性高潔之操仁厚之心淹雅之學
措諸事業形爲咏歌儼然超出流俗蓋有存乎作詩之先者矣晨星易落宿草
方滋展閱遺編不勝今昔之感率書數語郵歸元展以志誼誼於勿忘云

敬堂文稿序

知府鄧傳安浮梁進士

張堂辛君治經先於予而邃於予予曩疑周禮何以有姜嫄廟而無帝嚳廟及得交君乃知禘所自出之確爲感生帝舍鄭氏說別無可從也又疑馬融俱傳古文尙書何以古文至東晉始出及聞君言乃知孔冲遠正義所列舜典汨作九共諸篇名實西漢之真古文因博求閭閻顧兩家書以證之嘗念予與君同受知於發覃溪先生予治經未卒業而君著冬官旁求易圖存是已成書予自壬戌後不見君者逾十年比歲在丁丑予謁選來都而君卽世已四年矣志術與同年命之不可恃如此豈獨故舊交遊之可傷悼也君子僕奉所刊敬堂文稿求序於先生與予先生已諾之矣未及作而卒予覽君說經文字則余所歎服及蓄疑而未遽以爲然者皆在其中又覃溪先生表君墓文云所與校勘注疏說文諸條俱存予篋中而稿中無之余嘗見先生說文校本有君所辨畀爲卑隸體之說知君精於小學發明古音古義者尙多惜所存先生篋中者無從搜羅以補遺佚也當先生未卒時余屢以說經文字質於函丈先生輒手筆題識謂今日能以考訂助我者無第二人蓋誘余以學而歎君之不存也使君尙存則予今日之游京師君必有以益余矣今執筆而序君文益不勝情隨事遷之感云

四書日知記序

龔士範

自宋伊洛大儒出有功於六經不少顧言論孟而或遺學庸言學庸而或遺論孟未有知四子之爲全書者惟朱子號集大成定學庸論孟爲四書爲之章句集註稿經數易而後定垂沒猶修改其用功較他經尤深厥後如眞氏德秀之四書集編趙氏順孫之四書纂疏劉氏因之四書集義精要胡氏炳文之四書通義氏道傳之四書纂箋等書皆宗主章句集註而心得所抒亦有足匡其不逮者未始不爲功於朱子也萬載郭明經復齋先生績學士也余甫莅斯土卽訪知其研覃經訓老至不倦竊景仰之今年春先生手其所著四書日知記九卷來示予并乞弁言余惟四子書習自童年而其理終身玩之不能盡惟善讀

者舊學勤商新知日啟其所講明而切究者功匪淺歟也今讀先生是編見其彙參諸先儒說解而得其異同復博證羣書以折衷於一是凡一章之體要與一句一字之神理以及書中天文地理制度名物無不領會融澈辨識詳明朱子云讀書玩理外考證又是一種工夫是編兼而有之洵足拓士林之見聞而羽翼紫陽也夫

春秋內外傳類文疏義序

江西巡撫張 芾

咸豐元年三月歲試饒州浮梁教諭辛君以是編見示余閱其書輯左氏內外傳文分類而疏解之內傳分六十四類編爲二十卷外傳分三十九類編爲十卷合成三十卷凡古人文章之體例具備而訓之形聲悉明誠善於說經可以別樹一幟者也夫書無注讀者不能了然未讀羣書不可注一書欲注一書者必合羣書而會其通乃能曲暢其指是書有不注者固不贅一詞有不得不注者必苦心分明考據精核足補服杜諸家所未詳其於古音今音之同異正義俗義之是非本義借義之可通與否無不剖析入微至於糾正舊說有所折衷或叅議論於注釋之中亦皆切中情事講小學者莫能出其範圍習古文者皆可尋其涯涘其有功於學者豈淺歟哉君著述甚富此特僅見一斑吾知不脛而走海內矣

春秋異文考證序

孫丙章

說經之學易與春秋爲尤難易經劉向校於前郭京正於後中間鄭康成王輔嗣以翼附經篇第不無移置然文字之間其有異焉者亦寡矣春秋則三家各守師承片言之歧動生義例故春秋之難治視易尤甚萬載辛同叔先生家世以績學著尊甫助教公纂述詩書三禮三傳凡數百卷尤精於易所著易圖存是學者稱之蓋先生研精六經皆有心得其治春秋功尤遂嘗病一字褒貶之說未能盡合經旨乃撰異文考證二十二卷微示其意其按而不斷若不欲與諸家爭者然諸家當之未有不悅然而自失焉美哉淵乎不獨先生之學問見

而性情亦見矣我朝經學昌明漢學末學並臻極盛其治易春秋者則安溪李氏桐城方氏予尤心折焉乃今復得君家父子蓋文貞公之於易象助教公之於易圖皆能啟千秋未啟之鑰必傳無疑方望溪之解春秋也謂經之所書孰爲春秋之文孰爲聖人所作必辨之不惑然後經旨可見而先生則謂三家之經文各異三家之傳說各異必經文定而後傳說可得而折衷其於望文立說之弊廓清尤力昔助教公易圖存是序云一圖之成必求有據一義之立求爲可通先生實師其意凡治經者所宜取法也獨易也哉獨春秋也哉

丹山文稿序

新建進士侍講熊爲霖

客有抱父癸之盃康侯之鼎犧象之尊薄遊五都之市者過者見之見者亦過之或笑而摩挲之或強之客亦卒無一言祇自莞爾而已既而有詫嘆者曰之人也之器也曷殷紅隱碧如是耶中互靈紘雷黼其研丹飛翠塗乙以爲是者則客亦弗言又於獨人喧騰中有一凝神而諦觀者曰客從何來乃抱此絕世

法物也惜哉恐識者之希也古有之知希道乃貴吾子假欲邀鑒賞於大地也胡不綴之以夜光之珠荆山之玉星屑而錯以乳金之跌紉乃徒抱爾土花苔觴之餘留數千年真舊寶耶君子曰皆非也世豈有父癸之盃康侯之鼎犧象之尊尙於稠人喧騰中求知己耶知者自知不知者自不知見可過亦可吾自存吾寶焉風雨有靈天與相深耳丙申初夏陳子丹山從袁山來鹿洞從子遊稍憩息出其存課以視予因有感夫此情此地書跋以歸之未審亦相眎而笑莫逆於心否耶

又章文集序

分宜進士林有席

萬載龍江水古名蜀水其源發於錫杖山流入瑞河不與袁江匯然水極清潔無異於袁江也辛又章先生產龍江以歲貢授石城學諭石人士佩其教爲立主祀義學中生平科舉藝數十首皆其族祖殿開孝廉所評騰者吾選錄一帙附於江右諸名家後因憶昔人論文每取水以喻茲帙也殆所謂風水相遭自

然成文者與

環碧山房詩集序

東鄉進士艾 暢

詩失古久矣世之爲詩者非其衷萬不容已也不過藉以致悅於人以取名於世耳此孔子所謂巧言令色鮮仁者也就其彼善於此則惟莊而不佻麗而有則無戾於立言之旨者爲差近焉予曩在京師與士大夫論詩嘗持此說羣病其苛蓋古學不明於天下士不知守已務道以自全其性命惟溺其心於詞章以相媚悅積習難返亦無怪其然也吾同年友辛君德生嗜奇好古而性狷介雖屢空常泊然於世無所營其爲學誠未知其於道何如然固知守已自守不以人爲悅故其爲詩亦祇自寫其天趣無悅世取名之心今歿已十餘年其子曇挹其遺集屬予序而傳之嗚呼德生晚得一科卒不遇以死其平日艱苦自守縱使不能詩予尙思有以傳其人况其詩莊而不佻麗而有則與予所謂與古差近者爲有合哉德生畫工古梅瘦竹老松怪石蒼鬱蕭遠絕俗千尋然頗

自矜重遇所當意卽累幅不惜否雖豪貴人齎重金不能強其品可知也
存心軒稿序

上邑舉人李祖陶

序心軒稿萬載盧翰坡太守所著其子清沆昆仲於居喪之次從篋中檢出得時文一百篇試帖詩若干首雜詩若干首分爲四卷以書牋予屬爲校勘且云古文不多作間有所需多倩人代草惟稟覆林文忠公一札實出已手亦附其內予先取其札閱之則粵西土俗民情分別綦析中陳買補倉穀清理盜源二策亦切中機宜末爲管梧關者言情尤款款動聽文亦有條有理不蔓不支嘆曰此真古文手亦濟時才也次閱時文試帖及雜詩五七律佳者綦多但貴精不貴多因乙其中之平平無奇及題之有名作在前者四十篇詩之涉於應酬者若干首試帖亦略爲刪存而以稟稿附於其末詢之清沆昆仲僉以爲然且屬爲序予惟世之論文者多謂年少早達之士類皆天分優人功細其學不能遂其文亦不能精况時文爲敲門磚既得藉以進身矣則高者求功求名次者

圖富圖貴其精力皆別有所用而不暇屑屑於文卽偶有以詩古文自豪者亦稗販以爲應酬餽釘以爲羔雁豈復能原本性情按據時勢卓卓然爲有用文哉大守未冠已遊於庠甫冠卽舉於鄉逾二年成進士以卽用縣分發浙江歷任臨安石門海鹽三縣政聲卓著行取入京成皇帝以同知陞用浙憲謂海塘工鉅非君莫可留磨此任首尾三年濟險出艱心力交瘁而目爲之傷暨之粵西任則隻身遠邁窮極西南邕容兩管馳驅殆遍又前後三辦兵事餐宿於蠻烟瘴雨之中暨守桂林遂以勞瘁卒於任其於文墨真昔人所云一行作吏此事便廢者也乃大守於服官後始作雜詩仍復不廢時文文旣明暢和平與世之艱澁其詞纖仄其體者有別詩亦清真刻露與俗之矯飾其情藻繪其采者迥殊是何早達服官政之人而猶與憔悴專一者之能以文采見也孔子曰仕而優則學學而優則仕大守筮仕時學猶未優旣仕則循分盡職之餘不營情於富貴不紛心於博奕性無他嗜畧有餘閒購書數萬卷暇卽坐臥其間以優其學旣遂而發之於文遂不但詩工時文工并稟覆之詞之出於官文書者亦如菽粟之可以充饑藥石之可以已病仕而優則學學而優則仕夫豈一朝一夕之故哉吾聞大守之在浙也卽以政事見賞於程月川中丞其在粵也始見知於林次穆先生繼見重於周敬修先生使得承其年知功名亦不在諸公後矣讀此稿者甚無僅僅以文士目大守也

不負軒文稿序

學政蒲城進士王鼎

爲文之道本乎學學之旣裕而以文達之必能合乎聖賢立言之意而不苟爲藻績艱深之詞以求勝於人蓋其所以爲學者於四子書六經之義往復尋繹深得其旨趣之所歸而又博求秦漢以來典籍證以先儒論說與夫日用行習之宜本不徒以文見也卽以之爲文亦必充然沛然使人見其文而知其學之底於成東坡所云博觀而約取厚積而薄發流於旣溢之餘而發於持滿之末者正謂此也予嘗持此說以論文自有明王唐歸胡以及金陳章羅輩與清熊

劉以下諸家雖所入之途不一所造之域亦殊而其所言之理皆純粹精當而非俗儒意計之所及者學之有餘而不可以襲取爲也嘉慶壬申視學西江日與諸生論文其文之佳者固可卽文以驗學其文之未卽作者勉以爲學之道而其後文亦蔚然可觀充積既深發越自茂必然之理也萬載宋生理暨姪廷英持其先祖不負軒文稿請序於予予觀其根柢盤深枝葉峻茂才力闔肆而一歸醇雅不悖乎王唐歸胡以來所傳之法誠非尋常操觚所可及以爲其故不徒在文也其必肆力於經史博覽乎古今而於文發之也劉彥和有言積學以儲寶酌理以富才其斯爲善於文者乎其斯爲不負所學者乎

滄螺集序

萍邑進士蕭玉銓

同叔先生玉銓年好友也以所著滄螺集就質於銓而屬爲序銓與公別久不獲接風雨作促膝設得一讀其近作殆不覺肝膈之傾寫如飄然相遇於燈紅酒綠間也先生種學積文浸淫於古韶髦時卽揮藻震齊輩弱冠遂提賢書踰

厲風發雖干將莫邪之鋒不足方也晚乃困春明屈志於新平學博靡史枕經益閱以肆其爲文高簡堅栗間溢其餘波兼及應制錯采鏤金皆蔚然可觀非屑屑墮人窠臼者夫試帖權輿李唐至清而極盛作者林立類皆自關閩輿出新意於法度之外確然足以信今而傳後先生登其堂而咀其裁由此益引商刻羽含英吮膏知他日和其聲以鳴大庭之盛者將於是乎在銓不敏不敢自謂牙曠之知音竊於公而窺其崖畧爰弁數語而歸之

出山草詩序

瑞安孫衣言

萬載湯侯來宰平陽不數月威惠盛行循良之頌達乎四境予聞而心慕之既而邑之人士哀其所爲條教文字數十百篇寄以示余既受而卒讀之竊歎侯之爲政所謂誠乎爲民者也昔在宋時平陽號爲難治與枯之松陽婺之東陽有三陽之稱作邑者頗患苦之蔡任季重平陽人也而宰松陽初至官輒大署其門曰我與斯民爲一體誰言此邑號三陽夫官之與民苟不知其實爲一體

則其聰明知慮之所及政教號令之所施必不能深察乎民之微適符乎民之志况於秦越之相視哉今之平陽異法而知義其易治固異於宋之時而侯之與民一體其用心乃無異於季重將見平之民變而至道侯之美政日盛月新久而不可勝書矣此尤予所深慕也光緒甲申序

小同詩鈔序

邑訓導盧 謨

己丑春與萬載辛同叔先生相見都下談理鋒發知其學有淵源其尊甫助教公號敬堂者以經述著聲翁覃溪學使歎為絕羣同叔先生其嗣響也相淵十有八年余方司訓萬邑先生謝學博家居遂得重追風歎宴談之下若怛然有不自得者一日冒雨相遇出小同試律遺稿屬余校定且問序小同為先生令嗣高才博學不幸蚤世不忍付之湮沒也遺稿凡八十四首詞華之茂紀律之森神韻之綿渺一一見於其間當其得意忘言冥情物表心精所蘊發竄開微有老師宿儒所不能詣者而英年詣之優優乎有餘暇此豈淺近才耶萬邑山

高水駛人士類多杰特辛氏族運尤盛振鐸科登臚仕者相續也小同以助教公為祖以同叔先生為父從兄子兼復以鄉薦領解天若假之以年俾得從父兄後馳騁名場必能大有表見即不然鍵戶著書續緝前人遺緒亦就亦未可量而乃芳蘭其質朝菌其年石火電光歟然一現誠不知天之因材為何胡篋之而又促之也昔覃溪學使哭助教公詩云老屋青燈淚誰能贖敬之其感悼如此使其得見小同其感悼又當何如矧其為我同叔耶雖然王勃李賀詩人之後也亦高才亦蚤世同時富貴壽考者不知幾千百人迄今勃與賀傳幾千百人者悉皆木枯而草腐得無壽夭之所關在此不在彼耶特此語同叔先生亦可無庸怛然也

勞守金谿道叅政彭公平叛碑

明御史保山進士潘一桂

粵稽雲南實漢郡縣慨唐政不經封疆之吏弗諳遠略始而滋萌既乃憤機一挫弗振遂舉職方版圖委而棄之自唐終宋蒙段竊據元興再拓我明高皇帝

蕩以神武漸以文教平寧熙治二百年於茲爾者雲龍州逆寇畏進忠故段首
別部恃其強固敢加凌暴旋謀篡奪驟襲嘉龍殺之殘裂肢體僭據命寬之
勿誅猶勿俟弗戢反謀益急治械儲餽劫戮橫肆颺來颺去爲大永諸郡憂萬
慮庚申歲我萬載彭公以叅知銜命守金洮兼攝分巡密受指畫於今撫軍吳
興沈公微煥前直指南海潘公潛既抵鎮廣詢熟諮聚米畫地得其險扼所在
進兵所由計非五萬眾不可公曰么虜狡寇急之則困獸必且爲逸虎惟計致
之則一籠鳥耳廉諸郡僚得其精練警敏威信素著者永昌陳郡丞大理陸司
理麗江陳倅雲龍州牧各授方畧或揚我皇威或昭我大信或攜其腹心或離
其僞黨左提右挈前擒後角舉逆寇所恃爲常策而萬無一危者我盡得其要
領而殲其神魄賊遂進退齟齬應援道絕乃僞托起怨希騁譴辨冀緩須臾且
以跋扈故態擁衛強兵逼城而陣名爲待命將出於不意以得志因率逆眾由
永平間道驟抵大理乃公之分布已定賊適入穀中命薛中軍陳周二揮使一

鼓擒縛諸脅從罔治諭而遣之不遺一寇不俟一人隨往撫餘民則鍾崖滑壑
險厯百盤猿攀猱接窮其巢窟搜獲藏鏃數斗儲械無數議者乃服公成算云
竊惟滇徼諸彝世以箭土爲我外藩巨數深山易於伏莽所貴犄角犢牙得機
早制弧張阱設相地施防則搏噬之兇自勿反熾乃蠶爾小醜寬以恩而勿格
倒以柄而愈恣若養癰疔不忍割決尤而效者觀望踵起非公沈幾妙算及諸
大夫宣勞運奇必勤大舉滇西諸郡雲龍生靈豈能安枕乎夫張吾三軍以斬
馘奏功未始非聲罪致討之宜也然在仁人不忍言而智者尤有萬全之慮焉
若天寶故事可鑒已孰有兵不試而威震費不殫而功全殄積年之大憝貽列
郡以永謐斯民之爰止是土者食平定生全之福其祠廟尸祝當億萬禩何紀
極耶周守首奉公密計躬履危險備極勞瘁知公功最詳載及德最厚謂不可
無紀以貽後世乃屬爲之頌其敢以不文辭謹志其略如此公名自新號祖銘
壬辰進士江西萬載縣人繫以詩曰西南郡縣自漢元封固以外藩界收雲龍

黑水爲池表鐘崇峯唐治不經浮驥作凶赫赫天璽盡界蠻貊明德開天統一區宇北掃炎氣漸以干羽眷茲歸正世作藩輔詎謂異孽種有獬豸戕類賊貌恣睢跋扈弗治彝狄大我皇仁德不可懷兇頑弗悛負彼狡穴治械備國劫眾張威慘戮邊民襲酋篡奪奄有蘭津虜我牧伯赫斯震怒爰整戎旅尅期師度彭公至止淵慮卻顧諒茲小醜跳梁魚鮒但叩囊底甯煩搜捕乃諮庶尹藉以前籌虛受轉圜才智兼收上策攻心乃亂乃謀進趨超超狼狽而投伏奔升陵險譎深幽螳臂猶恣適罹兇累一鼓盡縛不試戈矛反首接足斷領懸體封豕既殪萬口騰謳誰其貽安方岳列侯祠貌社稷報祀千秋欣爲王民耘耔田疇薄賦輕徭化日優游凡爾百彝共戴天庥逆族殄除順則懷柔恪保乃世毋爲後羞 采滇南文略補

何侯去思碑 名錫命

清邑舉人宋希陳

我萬載無公署官無倉厩學無義館也蓋數十餘年矣歲丁丑何侯適來甫下

車見舊治傾圮毅然曰是誠在我當是時以數十年之蔓草荒煙而欲復興於一旦鮮不以爲難侯捐貲經營百堵皆作麗譙有樓胥吏有次錢糧有庫內外秩然而後四民有所仰重邑積貯多至數萬石按籍則實視倉則虛侯詳請上憲因按察司行衙改爲常平倉而後積貯有所備復於學宮旁建立義館珍聘西席課會生徒擇其尤者陶成之無力從師者並收之適館授餐旁來備至而後英才有所振慨萬自寇變而後荒絕者多是以節年錢糧尾欠盈千我侯罄囊罄解而且飾學宮建二門師生有次絃誦盈耳嗣是萬之人文蔚起謂非我侯興賢育士之效歟至其操守壁立絕暮夜之金聽訟明斷無含冤之獄省刑罰免徭役禁取辦秉仁慈之性宅寬洪之量氣度溫潤中兼具卓犖灝衍之概令人挹之不盡其敷歷新喻宜春二縣民爭誦之凡萬民食德飲和八年於茲可無甘棠之頌以誌弗諼乎陳走筆記之壽諸石以俟誌乘者采焉

蓮溪石橋碑

邑令海寧舉人朱有成

古人之爲政也有當然之務必因自然之勢故矯強厝注之勞有所不用而卒底於成蓮溪者縣北六區羅城鄉之支流也濫觴王皮山下匯上高鎮渡其以蓮溪名橋則邑人敖遊之爲也越今歷祀久遠潰於沙泐於石阨於水於是峭岸崩迤廢址準確而往來行人且臨河興嘆矣余承乏茲邑道弗不治以尤伍保輿梁未興以詎羸老有薦紳宿儒偕一二耆耆踵門告曰願有啟吁此獨諸君子之責哉余曷敢止乃察天時寒燠不愆於序乃權年穀蜡腊不置於釀乃觀人情貧富不睽於慮因首爲之疏而粟者米者錢者金者于于然輸而斲者鑿者甃者捨者甃甃然奮矣工興於乾隆戊申六月告竣於庚戌臘月廣丈有六尺袤二十六丈二尺釀水五道有階有級翼以兩欄如其袤之數凡用工五萬石奇用銀九千兩有奇於鑠哉毫倪驩騰輪躡交集首事乃請文以記實余謂一邑之政有關利濟上卽不爲之倡下必竭蹶以圖茲舉也地方好義者眾余數篤責課察之勤用藉手以觀厥成爰樂綴以文而徇眾望焉至襄事勞勩

者例得載碑陰其來請記之士則邑廩生盧爾洛貢生李珽生員高起鳳周書高世亨鄺日輝也與垂不朽矣載爲之銘曰疊石衡從適我園方趾越起履我發爾出爾入勿之越王道蕩蕩民所活視我斯碣毋抹殺乾隆五十六年辛亥季夏

故鎮南節度左廂兵馬使檢校工部尙書前守潭州都督府長史兼御史大夫上柱國潁川陳節公墓志銘

唐姓闕 彥龍

粵天地晦明故冰燠之運行人倫修短彼生沒之定數夫儼彝裾於聖代食祿於名邦勲赫著聲公忠立事實職古罕矣故尙書諱節先福本建鄴之人躋昔帝霸先之緒裔也自隋末中原鼎沸四海狼奔伊五世祖去浙右遷居於洪都因爲茲境之名家盛族迄今不泯者歟曾祖秋祖恒俱隣巢許之隴樂煙霞之性退隱畝谷偃仰唐竟究曠道深碩儒羣彥靡不欽重追贈贊部大夫榮臨幽壤慶及子孫豈弗謂軒冕承家朱紫繼世皇妣鄒氏德齊孟女禮過姜夷秉志

懷仁而有令嗣尚書幼敦禮樂夙慕顯光於尊卑必孝悌溫恭處鄉黨能儉遜謙敬同親理人之政常施濟物之心果膺禎瑞奄列班寮值壬寅載當府頴川鍾相公上應元機下安庶俗布條化則入郡肅清震英雄則萬方瞻駭搜賢選士攻敵練兵貴翊佐得人權謀可託因任公充白沙都鎮討過使并特奏署潭州長史兼御史大夫撫綏疲羸擗捍奸慝致農桑有序編戶譟仁展戍旗而匪讓安西攻戰勝而欲輕燕北尋相國藉其忠勇委以腹心命赴府庭重加祿秩將專殷務更綰劇司后至大順元年府相請充使人奏蒙恩賜對獲趨紫殿而頰天顏榮臨玉案之前屹立金階之側功同寶憲禮若王商一動聖心戒頒殊寵賜工部尚書勲名盛過六印美嬌三秦既握魚鬚合居虎竹時情讚騰儕友推先頃以驛騎皇都星馳丹闕跋歷康路往返長衢調理偶乖倏中瘖疾乃輒假還西故園請尋醫求術及歸於寢寓浹變躋月千方萬藥竟無徵效凡屬遐邇日佇痊甯其奈神道晬遺斯哀釁里開傷感親族驚悲局玉彩以將昏忽

珠光而潛沒公娶南陽郡鄧氏夫人夫婦之道琴瑟諧音唯仁與賢內外和睦男四人長曰從諲鎮南觀察衙前兵馬使銀青光祿大夫檢校國子祭酒充楊林鎮副使兼御史中丞性惟端恪守職奉公排難解圍屢効雄烈次曰從訓鎮南觀察押衙銀青光祿大夫檢校國子祭酒兼御史中丞操持有自於已無私可統重任而方觀其能次曰從錯脩進士舉韞職聰悟肄業專勤期春浪以化龍指霜鷗而中鵠郊詵芳桂翁子錦衣當刻時而取次曰軍郎杞梓植林瓌琪重器善幻詩禮挺間羣流女四人長曰十七娘適安定梁宏嬌媚得宜鸞鳳雅匹女則婦禮爲世規範次曰廿三娘廿九娘三十娘皆婉婉自持性常柔順處幃帷而潛影履門牖以掩眸公疾甚逾候從諲弟妹夕仍假寐晝或忘食至夫一藥一膳必先嘗之孝養不闕憂惻寧安泊尙書寢沒泣血號擗毀瘠益甚公以乾甯四年六月十六日薨於私第享年五十九雖不至耆其榮祿孰儔擇其年八月三日龜叶吉辰祔葬高安縣萬載鄉新賢里錢田村原禮也岡巒峭秀

林麓森羅地盤龍鳳之形水落虎牛之勢彥龍詞多蹇樸學愧雕剗握牋毫而顛臂慮銘頌之奚述者哉其詞曰麟鳳呈祥惟邦之慶爵祿被身惟家之盛昭著殊能頒臨寵命莅事治民克彰厥政珪璧之器帝王之孫前朝鼎族繼代崇門長川碧泚峻岳祥雲芝蘭毓秀聲響氤氲皇天無親惟德是輔積善慶餘門興福祚佩服金璋盤纓大璐都府班僚罔不欽慕天階奏帝榮捧詔書官兼八座恩寵之初手持象簡腰佩金魚名著典籍德耀鄉閭統主雄鎮運籌五鼓劍躍匣中鐵飛天外威攝奸邪聲馳邊塞業懋功高聲芳永在

按此墓銘出於嘉慶辛未年錢田村輦下陳氏子於屋側墾土得之可知此地原屬吾邑之萬載鄉不知何時改名石裏鄉隸宜春附登於以補沿革之遺

仰山光涌長老碑銘

邑薦辟南唐楚公宋齊邱

夫眾生者晝則共一明夜則共一暗明不爲之缺暗不爲之分蓋眾生同一智而共一見也佛佛相授祖祖密傳以茲爲法實無法也仰山心偈天下詠之正爲此也然其化導大綱祖教專用傳龔源流謂石亭仰山之宗則涌公嗣其後也公法號光涌豐城縣張氏也誕生之夕神光照庭鄰人以爲珠璧之祥問而伺之生男子也七歲請學儒詩書禮樂有若素習十三請學佛經論禪智悉如生知一旦請游方求師父母器而從之於時石亭之羶風行四海乃往禮之石亭爲之剃度後就開元寺真公傳淨名經密旨十九詣襄州壽山寺戴公受大戒遂攜餅錫徧禮有德以有間斷意契無間斷心以有生滅身得無生滅體石亭有似驢之間涌公有非佛之對（石亭堂見諸方學人來便問子來作麼學人對曰禮拜和尚來石亭曰還見和尚否對曰見石亭曰見和尚何似驢學人無對石亭將此語每問折倒學人未有能對者石亭乃問涌公對曰某甲見和尚亦不似佛石亭曰既不似佛似箇甚麼對曰若更有所似與驢何別石亭曰凡聖兩亡情盡體露吾有此語來近三十年無人決了境子大利根常自保任

吾不能盡標子異日可知而自行矣。嘗大奇之謂之肉佛可以化人矣石亭歸寂公然第三指以報法又然第四指以報親皆不羣之事也仍歸止於仰之棲隱寺紹祖風也洪帥南平鍾士聞其名若禪師家麟鳳無有肩其威德者遂遣使迎止於府下使者至師不起於是州牧邑尹至亦不起已而士民皆來又不起乃共訴之曰師知不起貽郡縣之咎由是不得已而後從之既至復館師於石亭繼美名也是時爲人說法明色空一相人佛同種使士者捨書劍農者棄耒耜工者忘糾纏貴者散金玉萬務失緒官不能禁師之教化明白也如是天祐十四年秋還如舊隱昇元二年夏順化於禪寢僧臘七十俗齡八十有九門人具梵禮塔於山之西南隅表至德也嗚呼涓公王者固召不就囚慈悲而復就之真天人也將來者多方求知猶有弗獲足見涓公不泯其能蓋力救末法之弊爾入室弟子彥新執古之士也任彼肉耳聆余廣譽不遠千里自貢而來以行狀授余請銘殊不知人不勝名文不勝德然哀其誠懇強而應之其辭

曰佛佛乃真物自迷悟無得失曹溪歿仰山出曹溪髓仰山骨曹溪虛仰山實佛兮涓涓兮佛 采袁州唐集補

龍長史墓志銘

明甘泉

龍鍾公字德剛萬載人狀貌魁偉氣岸孤騫髫遊鄉校卽穎敏不羣出入經史尤長於詩文草隸所與師友者梁公寅黃公子潛年十九選入南宮時髦俊蜩集惟公才識過人曹國李公司成宋公選以國士薦之高皇帝召對稱旨命同貢士張宗潛等隨春坊官分班入直講悉民間利害田里稼穡陳古今孝弟忠信文學諸史遂詔治水於泰州視軍於遼東川雲隨試輒效所經軍民利弊當興革者悉以聞高皇帝覽而奇之引對右順門嘉異其能特授首省按察使司其屬繁劇甲天下前此以罪去公下車振飭綱紀修明德教民翕然向化道不拾遺幾致刑措正己率百司悉尙廉潔頃歲薦饑俸贖悉捐廣濟各郡尤嘉與士大夫敦崇行誼有不軌者白簡不避權貴以故多爲朝士所忌下遷公于蘇

之長洲令文到離任兩浙士民歸德攀轅卧轍遮道送相率於公所植桃李處碑而亭之以誌棠恩歸鄉宦橐蕭然無數畝負郭自矢惟以清白貽世不辱爲榮家府君亦喜其清潔不問家人產雅嗜山水急爲親卜佳城菽水承歡侍養年餘適晉府恭王薨世子尚幼上難其傅都御史袁公泰刑部侍郎張公思恭以公對起爲晉之左長史遂辭親就職託弟以家事公至任輔導嗣王不激不阿王禮重之委以督兵重權克承付託時西戎寇大原公率諸軍禦之水陸戰於河汾有功赫然作一面長城時皇太孫嗣統患宗藩強盛太常卿黃公予澄進漢削平七國之計周代齊湘岷五宗王相繼竄流時文皇帝方奉燕於燕上書求諸王過狀不報師起北平檄至晉徵兵靖難公泣曰高皇帝封建諸王設置護衛所以奠安宗社今北藩日昌倉卒調兵非先帝意也固拒之文皇帝親引兵至城下諭招賢王王推之曰兵權出長史司旋諭鍾曰借兵進香鍾對皇上無肯兵豈可借督軍士堅壁不出文皇帝力攻之不克竟趨金陵入正

大統飛詔檄鍾下錦衣獄鍾不屈癸未歲十月九日公死焉有收其骸骨得其衣帶中自作血書有曰捐生固煩弗事二主別父與男忍慟肝膽盡忠爲臣盡孝爲子二端於我歸於一所公生於元朝甲辰卒於永樂癸未年僅四十娶易氏有懿德生男二人叔馳叔驥方三齡卜以乙酉年二月十八日葬於祖塋葛家窰之原將葬屬余以行狀誌銘予與公束髮結盟同朝共事予不能辭也於戲父事子幼公行不來求仁得仁抑又何怨銘曰祐命方新篤生豪傑早擅文儒備殫勞瘁總持外臺憲節以植勳亮藩孤執兵抗志氣作山河允矣臣極誥贈奉直大夫易君墓銘

明大學士楊

溥

貴州左布政使易節奉厥考子謙君行狀以書抵京師告予曰先君子棄養三十九年不肖孤溶膺顯宦食厚祿荷朝廷特恩贈二親爰立墓碑請紀先德以昭不忘予雅重節乃叙其事而銘之君諱復亭子謙字也先世居宜春宋禮部尚書被徙潭州尚書孫筠州錄事遂卿徙上高錄事孫興國司戶仁川徙萬載

今爲萬載人仁則君高祖也曾祖理祖後父谷珍世以賢善相承母彭氏克宜其家君爲人恭慎重厚自幼好讀書及長克勤問學以求要領感物興懷則形之歌咏以見志元季板蕩偕兄秦亨震亨奉父母逃難山谷間君爲羣盜所獲脅之不從乘間脫去及江湘平定谷珍甫已歿君兄弟奉母還萬載復修舊業孟兄以茂才薦仲兄起爲江西行省掾君日以敬養爲事嘗於邑東烏溪之上爲別業構堂奉親圖曰壽萱旁作書舍儲經史詢子弟時有司舉孝廉以親老固辭不就母有疾君侍湯藥恒朝夕未嘗解帶夜則焚香籲神以求母安果得康健壽九十有餘君居第列嘗念二兄坐事沒謫所遺孤七人皆撫育成人君治家勤儉常節贏餘以贖不足鄉人德之邑令待以賓禮年六十有四永樂乙酉五月十三日以疾終於正寢十月八日葬徐山之原宣德壬子贈奉直大夫禮部祠祭司員外郎配龍氏名家子安靜慈惠族里稱賢後十有二年四月十日卒享年如君附葬君之墓贈宜人子男三曰鑑曰鐔節其季也永樂乙未

進士由行人升禮部祠祭司員外郎以薦知成都有政績拜今官女二人孫男三人孫女六人銘曰粵稽易氏自周始由漢而宋世有據宜春上高遷旣屢尙書錄事及司戶君生未訖而穎悟長以詩書繼家緒遭時板蕩越鄉土秉義抗逃遠豺虎奉親育孤適我所德器昂藏遽前武歛而弗施澤則裕令子維時顯宗府保佑自天申錫嘏恩光丕燭泉臺下徐山之原安靈爽子孫繩繩享厥祚國子監博士郭公宗器墓志銘

明布政使邑進士易節

國子監博士郭公諱瓊字宗器太父彥正嘗置廩穀於邑之各鄉歲饑出貸貧困不責償父孟暉有孝行俱以德隱生公於洪武乙丑正月廿日甫數歲出就傅塾師授以大學輒能悟其解及冠補弟子員旋食餽公益發憤讀書搜尋經史與肯諸子百家言靡不吸其精液以故一時爲文章者率皆詣公公爲之口講指畫悉有法度可觀屢艱於選九試棘闈而公無愠容也正統二年詔徵四方碩彥公應召擢國子監博士比入館公守聖賢遺教循循然舉格致誠正目

爲六館諸生訓諸生如獲異解往往私相慶以爲得賢師久之同朝諸大夫亦莫不嘖嘖敬服當是時公賢聲方盛使少戀功名淹留京師將必有薦起而用之者乃念先塋遠隔弗克時相拂拭遂不欲以彼易此亟懇歸大學士楊公等留之不可爲請肯得許復作序以贈之蓋嘉其孝思者甚篤公抵家親詣各壟或封或樹悉遵古制歲時必躬祀其地平居嘗集忠臣孝子錄數卷天順癸未年十二月十五日以疾卒享年七十有九妻楊氏劉氏子男八人初公艱嗣買妾黃氏氏始不知爲妾至公家乃駭泣訴爲父所誣於公公憐之卽日遣還黃感泣日夕焚香禱公多男至是果生子又長洪次汶次澄次滔次澣次源次曰相曰顯孫十人擇明年某月吉葬於竹渡卧牛肋山之原以余與公同時居同邑仕同朝知公生平甚篤也遣使徵志及銘銘曰於戲宗器學成行尊爲國助教探本窮源格致誠正日夕諄諄諸生曰善收我愚昏乃先塋之念切倏返駕於故村思著書以娛日豈知造物者之不可與而悲松菊兮徒存竹渡之野卧

牛之原既固既安允錫祿於後昆

刑部左侍郎郭公瑾墓志銘

明修撰臨江習嘉言

公郭姓諱瑾字邦器其先吉之廬陵人至處士世興始遷袁州之宜春逾數年擇居萬載城西遂世其籍焉曾祖壽軒生彥正彥正生孟庸俱有隱德庸以公貴贈給事中公生穎異得祖父歡心爲構書屋於絳陰池上延宗工多鬻書籍以誨之公展卷輒記憶每讀名臣孝子諸書疊疊不倦及暨古今奸佞事輒變色以筆抹其簡爲文嚴謹有骨力髫齡就試學使者見而奇之謂異目必且名世拔補弟子員永樂癸卯以書經領鄉薦明年捷春官時太宗皇帝詔諸進士造鄉以俟召用公歸逾月太夫人韓氏遺疾公親侍湯藥目不交睫者月餘及辛亥泣逾常格每歲時薦雞黍潛然涕下宣德三年詔諸進士三十以上才識絕倫授給事中公赴銓曹擢刑科凡有關民命者往往直言奏聞時軍政久弊奸黠匿籍詔公及郎中厲思溫清理金陵各處衛所公按籍覈逃匿汰老廢軍無

隱躬復命稱上旨誥勅褒之且贈及二親公欣喜感激念雖未能祿養而焚黃展敬亦聊慰先人於地下特以展祭告歸學士王行儉贈其室曰志喜堂蓋榮之也比還朝九載考績晉本科都給事中適英廟注意元元慮民橫遭重獄命刑部侍郎向文淵與大理卿王文審錄在京刑獄命公與巡撫周忱錄南京等處罪囚公訊鞠詳慎常欲於死中求生求生而不得則鬱鬱靡遑是役也垂死而活者盈數百人又命賑浙江湖廣饑所至沾實惠晉陞刑部右侍郎時中官王振方用事人無敢斥其非者公屢直言致忤譴廣西潯州太守嗾乎權貴人所趨也即稍知自好不阿諛之曲從之以奔走其門下而一動念身家非榮辱繫於中即生死動於念熒惑煇燦有莫能自主者雖欲不相與安之不能也公當忤王振時豈不知此蓋榮祿生死之念不設於心也久矣即幸而見謫尙非公意也公殆所謂不畏強禦者歟比至潯因其土俗爲設教禁州人順賴景泰朝蒙恩復原官未幾遷本部左侍郎公窺大將軍石亨多不道將禍及國家勝

劾之疏上不報適有數囚罪不至死爲某所忌欲文致其罪諸法司類摺撫成獄公獨不可乃止忌者因嘲之公由是乞歸及行篋中僅載詩章二十年官囊枵如也家居衣無盛服食無珍饈見者幾不知爲司寇日與兄博士公瓊及鄰友故人相邀遊於綠陰之林人遂號爲綠陰公成化二年八月三日以疾卒於家明年八十夫人李氏蘇氏龍氏俱先公歿續娶劉氏子四長潯次濟次溥次際邑庠生四年三月十日葬於紫蓋山之原遣使徵志銘於余余曰公之事固將光昭史冊無俟予言輕重顧史之知公未必若吾所知之深又況當時忌公者多所言未必盡信使余以不文辭更誰能爲公詳其實哉爰爲之誌而綴以銘銘曰紫蓋巍巍兮哲人歸藏藏焉不朽兮裕後無疆

拔貢汪朝祖墓志銘

清魯 鴻

予年十九膺選貢出仁和趙學齋先生之門明年鄉試同人公譙於百花洲推萬載汪君爲祭酒時君年已五十六矣又十五年而予教諭萬載以君與先子

故同歲生不敢執行輩若遇予尤篤有過未嘗不盡言相規也比予以俸滿入覲而君旋下世矣今其孤用匄以銘幽之文爲請嗚呼予其敢辭按狀君諱朝祖字岷山敬亭其別號也曾祖映日祖有本父必照三世皆庠生君少時愛讀有用之書不屑胥制舉業與其兄荆山先生自爲師友荆山素友愛而性微卞急每講學論文有不合輒厲聲色相加甚且不免捶楚旣而悔之凝視君則怡然無怨容年三十餘猶祖與連共牀被未嘗輕入內也君生平嚴重端謹於一切世味泊如然遇邑有大利害事輒倚君君亦未敢引嫌邑令施昭庭素造君書齋談藝之餘情事難臆決者必質之君一言而定不令人知邑修葺學宮施令得大木數十株喜甚忽水漲飄沒甚恨明年有鄉總甲以盜木被獲報者令怒甚拘其家盡入囹圄君聞之曰樹久竊必毀今如故果真盜乎訪之則水落大木自沙中出讐家誣之白其寃其人曰吾不知汪先生何如人也家立木主祀之雍正元年邑有警城中人洶洶盡逃去施令獨留君贊畫卒以無事又雍正

正年間大府檄下欲復萬載舊菽荒糧原額君奮然曰此萬載世患也不可以默乃呈於邑令而府而院司皆不許邑令汪元采屬君清理君率同志二三人冒風雨寒暑遍歷荒山窮谷中將一切水擁沙淤不可墾種者據實呈報乃免又清復學宮侵佔地基諸大興作如康樂橋崇文堰並倡修董成不自以爲功生平不妄交人旣與故久而彌篤性不能容人過然其人能改懣發如初以是忌者亦少其卒也命其子喪祭必遵家禮毋得仍鄉俗奢泰君生於康熙丙寅年十一月二十九日卒於乾隆癸未年三月二十六日享年七十有八葬一都涂泉鄉子六人孫十七人曾孫二十七人銘曰予與君別曾幾何時而遽至於斯君才足以有爲而鬱不得施唯使鄉人載其德銘詞不怍匪一人之私廣昌教諭袁君墓誌銘

李榮陞

公諱建中字致和邑西鄉白良人也爲諸生以文鳴雍正壬子舉鄉科乾隆丁巳會試得乙科選廣昌縣教諭月課諸生慎甲乙士皆感憤攻苦科各益增文

廟前臨江有沼底滯有力者屋其上以居貨而歲納其羨廟之規漸隘谷遇漲或漂民居以去公謀於守土者撤之水害乃除學使趙公按視撫建試博士置第一謂人曰袁博士文如富人擁厚貲不作一寒儉語甚喜之選期至公薦宿學魏兆龍俊童趙由議補翁子六學之人心服焉縣丹黃思亭以棄失官公倡諸生償所負而歸歲癸亥饑官廩計不給署令趙君策於公公草疏導單騎走烈日中勸士民助米得四千斛趙令就城隍祠煮粥以食民相聚益噪公溫語開道之皆謝去翌日分賑四門按丁給米終事不擾流民有死者咸葬之乙卯武闈甲子文闈應聘福建校文主考萬孺廬夜分起視公尙未寢歎其勤比揭榜所得多知名士公官廣昌久大吏廉其能丁卯冬以上考咨赴禮部公以太孺人春秋高暫謁假歸省卽力陳終養得允旋丁內憂歲壬午行取以知縣用府縣連催不出矣卒於家時年七十有一考諸生贈修職郎諱則旦祖考諸生諱秉星孺人敖氏子男四人長廷鳳國學生候選主簿次廷鼐廩膳生次廷

龍次廷驪女四人孫男三人孫女二人明年七月葬於本里之青天馬前墓諸孤授使者以狀來請銘予四兄公嫺家也故知公蹟詳然以予之不敏不宜銘辭之不獲乃序而歸之銘曰高士潛光州爰名毅齋制賊里聚寧錦山屏張溪帶縈于公高車壯其閼獨矯而飛輝序曩後嗣翼翔鵬鵬遠望松栢神杳冥達者警此作氣盈

拔貢張焜圭墓誌銘

知縣邑舉人孫馨祖

琢齋先生諱焜圭考康熙甲午舉人考授內閣中書諱明德妣辛太孺人先生生而穎異能言中書公口授二南卽成誦四歲中書公客歿武城太孺人教之讀年十八補學生食餼科歲試居第一者三一等者不計積三十二年四十八得拔貢生以乾隆辛丑疾終於家臨終命家人扶起端坐而逝遺命不用僧道曰自問可對鬼神又令葬某所可以朝夕瞻望先塋遂以九月癸卯葬於潭準肯堂團山腦享年六十有四先生篤孝友當太孺人病侍湯藥衣不解帶者

數月及終哀毀骨立予從先生遊入書見齋焚香跪而泣初不解後乃知中書公及太孺人生忌日也又嘗聞終夜讀書起而哭哭而又讀聲與淚俱聞者莫不泣下蓋中書公客病中所寄詩此後或聞先生大慟卽知檢觸先人手澤也年六十三猶赴鄉試錄其文曰得失命也以酬父母心耳嗚呼可謂孝矣平居與人交接坦白無火委曲亦無抗辭厲色談笑溫溫而介然無敢干以私故人皆樂與友而加敬焉夫人私欲感於中而矯飾其外動以孝友相稱述而行或異其所言聞先生之風其亦可以愧矣學以養性爲宗晚年猶有所得嘗書其居室聯云讀書不求甚解飲酒最喜微醺銘曰無愧於親無愧於友無愧於鬼神此爲先生嗚呼久而壽其真

雲南嶺嶠縣知縣李厚岡先生墓志銘

宜春令浙江進士黃河清

予求李先生序樸學堂集將拜使而先生之訃聞其孤光宰絨先生答予前論屈子書蓋絕筆也且以銘幽之詞屬予法然曰通儒逝矣誰兼師友銘其忍辭

謹按先生李氏諱榮陞字真基號厚岡世居萬載高村先世七代單傳祖英文公始有子六季士璉先生父也有學行兩世贈文林郎妣張祖妣郭並孺人先生幼有異資受句讀以神童稍怪康成亂易篇次欲復費氏之舊讀詩無將大車以塵底韻垂疑底爲瘡之誤信古篤學出於天性乾隆己卯鄉薦第六癸未成進士家居從遊者多所成就癸巳謁選時開四庫館纂文達曹文恪知先生宿學將保舉修書先生丐座師翁覃溪辭免尋得湖南永興迎母就養永號難浴至則絕苞苴判決無滯豪猾屏跡創試院興義學優膏火分闈得知名士謝振宇李烜等永之羅杰亦雋自是科名不絕丁內艱服闋分發雲南署雲州置土獨劉金魁於法委查普洱及大理府屬陟蒼山遊洱海訪六詔遺跡捐蒙氏鐘文自謂此行差恩旋兼緬寧通判辛丑督運銅至夔州守賑登白帝城謁少陵遺像逾年抵天津銅斤無銖兩失回補呈貢調闡分枝得李時昌羅緒等六人邑近省俗奸上控先生理寃雪枉終任無憾訴者嘗力爭猥夷輩漁夜奴拒

補之獄活十餘人縣離滇海口百五六十里五年一開濬利田先生命賁糧雇役親至海口盡限疏挑五旬之工二旬即畢巡道承公器之會以鄉約殺人誣誤丁未恩例仍發原省題署我先署恩樂地介哀牢蒙樂兩山間即唐虞崇山也雍正時改流先生至復七鄉義塾清舊租選諸生掌教每值興草笠減從巡村落察民疾苦勞毫盡以酒脯童子稍異者獎紙筆會用兵安南派夫井井有法調閱執正不阿士論翕然閭後之嶠嶠嶠我六詔三十六部之一地瘠貧仕者頑眾習驕悍先生設法行銷鹽鹽勢家一御以禮年六十六以疾乞休藩司筠園費公會榜同年也留之不得然艱治任薦掌大理書院次年又率屬臚之始得歸所攜惟書籍花木而已居家目事著述多所發明嘉慶二年輯家譜建宗祠率子弟修治先人塚越歲卒先生性嚴毅動靜持敬視不潔若浼雖登科第入仕版浚於名利自少至老孜孜力學虛公無滯見推求至理多心得嘗測五星常聚某度至嘉慶五年三月十八日五星果聚奎鳴呼通天地人曰儒若

先生者可謂通儒也矣生平著作甚富於天文則有考辨於地理則有圖說糾謬辨正於聖賢事跡則自三皇五帝文武周公孔孟各有考辨於經周易則篇第本費氏加以圖考於尚書則分今古篇第自堯典至無逸考辨尤詳於詩則國風解自邶至鄭於禮經則周禮儀禮樂記學記明堂位大小戴各有考並考西塞蕃國於春秋則正毛氏改本及四例論於四書則論孟有類學庸章句著四書細論率經分章節於諸史有竹書紀年始末考論辨家語考離騷於諸子如莊墨越絕新書說苑新序皆有量古此外遊歷有紀運銅有記釋道堪輿家並有考論詩則厚岡詩鈔古文本唐宋大家法考論辨斷爲多而傳贊墓誌應酬諸體略具以時增辨論未及手編成集也生於雍正丁未三月八日終於嘉慶庚申十一月日壽七十有四配劉氏封孺人子五人孫十六人曾孫八人葬九頂山黃岡之原銘曰高村之李乃祖始蕃隱德載鬱昌於其孫初試永興治成奉辭呈貢嶠我施宛則未其昌維何乃以斯文學貫中西講糾固欽上觀

千古下觀萬里山川性情茲焉得髓人文之大莫如六經文義圖一覽聽榮
書別古文可匹疏證詩迄鄭風已翦榛枿儀禮周官迄大小戴各有訂證並考
四塞四子細論孝經分章史志三五子甄選莊時發爲文樂樂唐宋皓首窮經
心有專用迄未手編遠嗟龍蛇晦爲發之其書滿家間有學林公亦有予我銘
公函以告千禩

撫州教授辛淑墓志銘

翰林院侍讀德濟進士蔡之定

君先世籍山西木末諱竭者避亂江右萬載縣家焉是爲萬載辛氏始祖十九
世孫鄰日卽君高太父鄰日生金澄父子俱邑諸生金澄生汝猷汝猷生樹人
汝猷起家拔貢生任湖口縣教諭樹人諸生並以從益貴贈編修樹人子三長
又甘邑諸生早卒君其仲也季卽從益乾隆庚戌翰林今官給事中君生而穎
異九歲能詩古文詞有神童目熟於左傳杜注地理人名研記精確一時夙學
有後生之畏長彌嗜學寢食坐作輿詩書俱窮冠補弟子員先後受知於曹文

敏朱文正戴文端諸公君以考贈公能文而蹇於遇伯又早世益自感奮稔知
從益才屬望尤切曰吾季必大吾宗自初學至入仕所以扶植之者不遺餘力
卒如所期丁酉君應選拔學使者爲蔣時菴侍郎棘闈屢躋乙卯甫舉於鄉又
十一年乙丑成進士出自余門經策尤爲主司嘉賞殿試前不出戶庭終日習
策字或勸以所習就正時公且願以爲先容以跡涉干謁弗之聽殿試列三甲
引見以知縣用援教老例呈改教職選撫州教授未幾以憂去服除再任撫州
其訓士先行而後文公事一無干預郡守以下咸重之遇事謹恪每常例行香
未五鼓輒公服詣公所以俟年餘無疾坐逝君名炳展字融初一字淑郵性樸
直無飾貌被言生平繩趨墨步介然有守顧見義必爲以公信不苟見推鄉里
每爲人排難解紛如建考棚置公田諸事必先君經君處分罔不悅服居家敦
孝友勤儉力學時以先澤爲念其誨人必竭誠無少厭倦惜以教職終不竟其
用卒前兩月遺給諫書有一生志事盡付東流之語亦可悲已勤於著述詩詞

雜文甚夥多所散軼給諫云行爲寬輻梓行君生於乾隆癸酉十一月十八日以嘉慶癸酉正月一日卒甲子一周妻宋氏男四登瀛彥瑜彤書彥和仲及李游庠女二孫男女七人將以甲戌五月八日葬上高之湖田新塘埭給諫乞銘於余諱弗可却銘之辭曰嗚呼淑郵哲人其傾甲胄王腹克副才名惟名與福天不兩傳天畀君福若名日裕器也晚就客玉女成載收四美式紹家聲占彼上高是宅是兆我銘斯邱萬禩長保

山東泗水知縣陳公墓志銘

辛紹業

乾隆癸丑余寓京邸升山陳公以謁選來同居兩人者言論衍洽意氣相得一日酒酣公慨然曰人生無不做也所不做者名耳然或幸而傳或不幸而不傳豈不悲哉余笑曰公之壽居余前者余必有以傳公因顧謂余曰子將何以爲辭余曰公之於文鏤琢肝肺指擢腸胃空山獨往不偶俗士當其會心與聖賢對其未出者若牛腰束世莫得見其已行世者則羣嘖而吮之矣公之於行履

中蹈和不愆仁義自曼黃童咸相嘆喟孝乎惟孝友于兄弟蓋仰事者自謂得逮世母若而人俯育者子及弟母若而人旁及者功總兄弟與夫姻黨之困乏者皆而人而公固窶且貧所需皆取給館穀若是者其足傳公乎曰未盡也明年掣籤得浙江之義烏縣知縣引見調山東泗水縣居官刻已守公省繇役革官償其爲政先德而後刑民有爭訟曲意勸解不事鞭扑因事至鄉輒召耆老諄諄作家人語或疑其短於才外而民安其教訟獄稀少囹圄空虛乃若服縣有泉七十二源出陪尾數折入運河歲一不疏則運道淤淺舊置地若干頃給泉夫工食率皆印官入己泉夫仍具空額公界邑紳分理泉夫得領實錢而已一無所染嘗奉文糶倉穀推陳納新時市值穀石銀一兩遵例祇取六錢秋熟仍用市價買補雖賄利不惜濟寧屬邑永奉檄往賑每日銀數人數與災黎面籌皆感激涕零曰安得官爲吾邑父母乎每進謁上憲陳時事委曲詳盡或不

奪民財辱官長公移書將領數其失且言八吾境猶然有以身當不令及民將得書悚懼亟馳至好言謝過爲嚴號令約軍士縣境肅然若不知有過兵者噫公內性堅定自信足以任事觀其措施皆人所不能爲不肯爲者而卒以自遂信乎余昔知公者未盡也官泗水五年以事望吏議降級調用羈寓不能去衣不盈箚盡無宿糗縣民相率饋蔬米供薪水卻之不能止郡守知其賢聘爲東魯書院山長嘉慶甲子遂終焉其孤計於舊知好各使人致賻始克以柩歸葬而是歲仲冬余自南昌返萬載與其弟桐村孝廉共舟出公行實見示且徵墓銘余曰吾有諾在昔其敢辭雖未卽爲然未嘗一日忘諸心乙丑六月始克成之因致桐村使刻諸墓石庶以質死者嗚呼前言如一日也而公已弗復可見矣人生聚散存歿之感可勝道耶公諱池鳳字鳴瑞丹山其號乾隆庚子舉人辛丑進士歸班銓選今職生干某年月日卒干某年月日葬縣西高家嶺月形所著有丹山稿四書廣義廿二史人物論凡若干卷公家世及其逸事具載桐村所撰行實中茲不悉書書其大者嗚呼是足以傳公矣銘曰孰跡鼎而不潛以睨公不礙其清从月音泣與潛異也孰砥礪而顧奮以觸公有角之鹹當作緝也胡稜稜之隼馴俾鳩鷯之熱也彼啞啞之啼鳥終受哺於眾喙音倨也懿夫公之生世兮內有持而外有立也官既隲而道得名耿耿其常盤也應千載而徵實視斯文之所輯也

戶部主事辛公質字章志銘

辛從益

質字先生於益爲族父常厚遇益至略年輩以字相尊稱既同官京師先後旋里來往相親敬勿宴必同席甚相得也自李厚崗家晚堂諸老宿辭世數以文事相益仲兄淑郵分獎借益益入都而兄淑郵沒先生又辭世追維平昔知好不敢以不文辭諱爲識其墓先生諱文彬字程材質字其別字世居集賢坊太父樸庵公邑附生父裕齋公職員並以先生貴贈文林郎例晉奉直大夫母周太孺人生母唐太孺人初裕齋公艱於嗣唐太孺人舉先生時裕齋公年五十

四矣以得子晚願憐愛之唐太孺人課之讀甚勤積針黹所得助購書先生幼聰敏停窓因是愈感奮力學補邑諸生食餼有聲乾隆戊子舉於鄉報至裕齋公已下世數日先生以親弗及見也每語及輒泫然既數上公車薦不售而唐太孺人年老骨節時隱痛躬率諸子按摩稍瘥因責志侍養弗遠離庚子母促之北上始赴禮闈旋聞訃亟僦小車走數千里足重鹹哀毀骨立丁未挑發四川知縣以安詳惻愍爲廉使陳公奉茲所器重有粹然儒者之目歷署墊江鹽亭皆有治聲制軍保巡邊過鹽亭聞而獎之補丹稜縣丹稜缺最瘠且多命盜案有史英者曾充捕役實盜魁也獨且驚事發輒逃匿其黨庇之役莫敢捕先生抵任嚴賞罰設方法督役往捕備拒卽格殺律得勿論後如議夜遇英拒傷數役役憤立門死英弁搜緝餘黨盜風以息諸服毒自經者先生聞報卽往驗驗非毆傷立命瘞非威逼及他故立開釋自是輕生習亦息廓爾喀之役大兵所過須派夫馬先生通計須費若干酌章程榜衛市令公正紳士董之不假手

胥役於是民輸踴躍丹稜故隸眉州州牧派費未善也州民揭丹稜榜控大府大府飭州牧徐先生法民始安焉旋調理巴塘事所經理人皆信服兩宜撫司甥舅也以爭坐位搆怨先納印及紅頂花翎於官將舉兵相攻擊先生嚴檄禁之并開誠曉諭而爲勸解兩土司感悟並泣拜去居巴塘三年人甚德之比瓜代灑涕相送者百餘里不絕駐藏大臣松筠馳書嘉獎旋委署大邑兼署直隸邛州凡官蜀十八年所至事皆辦上司未嘗提一案也由邊俸推雲南賓川知州改戶部福建司主事司員自循外無可見才同事多輕雋少年喜談諧先生自顧齒宿不樂與追逐輒引疾求去堂官留之不可遂歸歸時年甫六旬其恬退如是性平易近人人樂與親雖悍夫亦聞言自化居官所得俸時以助戚友歸時囊甚儉日用不文至需田以贍其寬厚廉潔如是益初官御史銳意建言先生戒以弗亟謂敢言非難言而當爲難益常佩服斯語云旣里居以獎進後學爲務屢主講龍河書院郭氏義塾所關成甚眾族人推爲宗長辭以

主修族譜始就因立義田規積穀爲賑荒及資送試者費族人善之生平自
書籍文翰外無他嗜其詩和戴協揆爲序行於世其友睦一門及仙美行不勝
述嗚呼以先生德足化人與其才足御紛卽以當方面大任何難顧僅効於巴
塘蜀邑與族黨里壑間良爲可惜然卽是可以知先生矣先生以乾隆辛酉年
四月廿九日生嘉慶癸酉年五月二十五日卒享年七十有三葬石筍坑元配
張宜人繼配張宜人子七元展增貢生元慶邑附生前卒元翰元超前卒元福
元匯業儒元采早卒孫男八曾孫四銘曰邦之彥族之雋廉可爲貧非病家雖
瘠民則潤其神腴其道勝澤在蜀羗懷恩信寬仁恬淡物無競今之耆成昔先
正嶙嶙石筍端且勁鬱鬱佳城此其鎮天豐才德而用弗竟曰留以祚其子姓
寧都州學正聞松園墓志銘 瑞金縣令常州舉人惲敬

乾隆十七年上命王大臣以身言差天下舉人之久次吏部者一等試知縣二
等試學正教諭訓導著爲令更六年一舉行至嘉慶六年而聞君星杰與焉先

是海內殷繁朝廷至行省臺皆法令具備知縣但操案行文書而坐擁脂膏不
肯肯遂以爲囊橐其賢者不日遷去或十年卽建旌節於是舉人皆願爲一等
聞君儒者不以爲然當推排位廷中以十人爲班主者援筆曰第七可一等卽
有宣聞君名者聞君久之曰星杰第入耳於是改置二等聞君出語人曰以冒
得官雖三公吾不爲也十年授寧都州學正十一年十二月初九日壬午卒於
官年五十有五惲敬子星聞之曰聞君蓋不苟進者於法宜銘按狀君諱星杰
字羽儀世爲袁州萬載人年二十七充府學生三十七補廩膳生三十八中式
江西鄉試舉人君家貧養父母母能勤教子第有恩禮嘗中途得遺金還其主在
廣西學政幕府拒以關節干者其介類如此曾祖來歸從九品銜祖達國子監
生父望光府學生妣易太孺人生妣王太孺人配王孺人子三宗恕宗旭宗彌
彌縣學生孫二化富宗恕出學富宗旭出以十二年五月二十六日葬於祖堂
對門團山之原銘曰青原沉沉石隙陳中有幽宮白日掩三公何益君何歟以

禮爲室廉爲門彼貴苟得非吾倫子孫勿忘視斯文

晉江縣知縣袁公墓志銘

肇高廉兵備道侯官進士葉申萬

今歲辛卯春三月申萬以奉命觀察嶺南秩滿將入覲在會城理裝行有日矣適袁茂才南溪自江右抵羊城奉先人行狀來請曰子先君子門人也先君子謝世十餘年矣馬鬣封未獲古壞今將改遷幽宮之銘闕焉深懼先君子嘉言懿行流風善政泯滅無傳敢託子鴻筆垂諸貞珉是子子先君子以不朽也申萬受知遇恩以歷官中外承獲一報隧道之志萬責也安敢辭按狀公諱廷鼈字鴛山號六堂世居萬載歐桂西鄉白良曾祖秉星邑庠生具俠氣康熙甲寅棚寇倡亂團練鄉勇捍禦里黨事載郡邑志祖則且邑增生履端性和輯家乘收宗族施藥活人數十年閭閻考建中登雍正壬子賢書乾隆丁巳明通進士除廣昌教諭行誼詳李厚岡所撰墓志中廣文君子四公其仲也誕之夕妣放太孺人夢朱衣人抱嬰兒授之囑善視他日當紹門第已而公生髫齡英挺俊邁吐屬清遠羣目爲遠到器戊辰廣文君告養在籍課讀嚴漏下數十刻始令寢丁丑邑令張立中拔冠童子軍隸籍郡博士旋食餽甲申奉廣文君諱丙申丁太孺人艱公喪葬如禮哀敬兩盡己亥舉於鄉授樂安教諭樂邑科名久不振公銳意作人凡裨益學校振興文風者罔弗力按月課文等差獎賞諸生袖文來質率夜分爲點竄羣慶得師丁未倡修樂庠莊本爲聖誕會計贏餘贈春秋兩闈士子既又修忠孝節義祠及文廟樂邑自公倡舉諸務科名丕振士論翕然歸之癸丑遷撫州教授疏濬學宮水濠民居鋪戶向屢遭泛厄者至是遂除尋以卓薦擢福建縣令甲寅到閩乙卯上憲委署福清篆下車卽矢志冰清嘗夜燭治官書必與幕友虛懷往復求其生不得而後已且戒曰律例者成法也忝伍成法死生人鞠情者官定讞者幕可不慎歟是春大祲斗米千錢發常平倉賑之司事者以未白上官懼吏議公曰得賑于議願也卒報可既又勸紳耆捐銀六千平糶全活甚眾臺匪陳周全乘饑跳梁海外制軍檄長福營海壇

文徵 崇志 六二

建寧等鎮渡勒道福清公方示賑懼兵擾籌辦兵差咸得機宜民賴以安八月
充同考官得元龔正調萬亦忝列門下闔竣補授順昌是歲恭遇覃恩贈廣文
若如公官妣太孺人沿順三月制軍以同安械關紛紛檄公往嘉慶元年正月
初六莅任越翼日陳村陳呂二姓排鎗列械將鬪公聞之遣家丁賁諭剴切曉
導陳呂即時投戈寢兵公各賜紅綬一疋親書正躬率族四字令懸祠中兩姓
各詣謝卽筵琴堂令東西互酬酢鼓吹導出觀者數千人自是終公任無械鬪
者尋調晉江同民詰制府乞留未允晉江海疆劇邑也民悍吏獨索號難治公
極力整頓恩威並濟每逢疑難案卷必先細心披閱數過集訊時旁推泛敲虛
誕者微露破綻默識之既案合前後語反詰情實立吐邑中驚爲神明邑有天
地會公乘尙未鵬張改裝密偵得陳選魏和許詩楊六會首弋獲研訊供各傳
徒八九百人繫杖下尸陳郊亭各匪震懾逃散至今泉民無天地會名目實由
於此又於各鄉會聚族正令約束子弟械鬪擄搶控據擯棄者牙口施姓閩邑

第一巨族自金舉施世祿族正果能約束無犯公旌以匾額風其餘泉城遼瀾
向無保正匪徒時乘夜潛入行劫公親詣三十三鋪簽立大街小巷樹堅固木
柵夜川單騎帶役巡查民得安枕無憂制軍魁公稔公治行手書聯句贈之曰
欲求政簡心常苦得到刑清夢亦閒任管四載一錢不名民皆稱青天以逃
竊聞報遲釋吏議解任後上官委任福州審辦十屬二州案丁卯復委漳州審
上控積案三年凡結六百餘件平反者從無駁飭制軍汪深契其才欲專摺奏
復以鹽課缺消格不行丙子歸里門嘉慶己卯四月二十三日以疾終距生乾
隆丙辰十二月初三享年八十有四德配江孺人上高巖貢因禮女先公卒予
三長守均優附生次守道候選縣丞次守學候選庫大使前葬本里蕭家沖風
穴捲簾形今葬茭蕪胡家冲蝙蝠岡合宜銘銘曰有千古不磨之業無百年不
敝之身嗟嗟夫子康樂偉人其青氈所隨也多士仰蘇湖之範其宦轍所至也
萬民懷有脚之春魂雖歸於阿里神猶翔於八閩謝峯巖巖錦水鄰鄰右環左

抱衛此幽窀千秋萬禩永棲吾夫子之真

修職郎李君復初墓志銘

李宗昉

萬載李生承烜父歿葬有期奉狀求予去其墓生予壬午典試江西所得士也
因取其狀次之按狀君諱明善字雨田號復初邑附生父松軒公廩貢生母汪
氏君事親孝父歿廬於墓骨立母懼其傷也未期迫之反後母歿遺命堅戒之
君以不得致其情痛益深過兩忌日嗚咽不食飲終其身皆然與人交談論侃
侃有過失輒面規之其能改者袖之不去口否雖至戚終不假以辭色家故不
豐然好周急服內長宗寔不能娶予之昏曰是不可使無後也族有負逋課離
其婦者爲惻然代償之有嫠矢守義而貧不支助之粟并謀於有力者共助之
嫠得成其志又以朱子常平倉後世主於官徒飽奸胥橐中穀七十石於所居
里立義倉以里人恩慙者主其計他姓爭效之賴以存活者甚眾或歸德焉君
益怒然也父改葬子業後更好陽明學有大志而終於諸生故所見者止此

生乾隆壬午六月十九日卒於道光甲申十二月二十二日妻曹氏子三人長
承烜舉人次承昉優附生季承華孫曾十數人以道光乙酉葬君於鵝鼻峯下
觀音坐蓮形銘曰俗敝而漓而篤行如斯匪以責報也然不干其身必其裔豈
冥冥者果不可知

太和縣知縣郭公墓志銘

知縣宜春進士徐輔忠

文林郎郭公星嶠以今已亥三月在籍告終葬有日矣令嗣光昕奉行狀誌
於余曰先君子與君素相知今蓋否之詞未具詰有銘予固辭不獲乃據狀而
粗陳其梗概焉謹按公諱大經字緯之星嶠其別字也世居萬載郭村鋪曾祖
諱如崑祖諱德仁俱贈文林郎考諱世華候選巡司晉封文林郎累世隱德至
公而聲大顯幼而岐嶷學有心得初中乾隆戊申科副車就職州判北上考充
正黃旗官學教習明滿以教職用嘉慶戊午科中鄉試第二名選奉新教諭課
士有法倡建考棚文昌宮奉之人士服其教澤越戊辰會試中式一百八十名

殿試登二甲以知縣即用補安巖潯州太和縣治尙嚴明盜匪斂跡素以責士愛民爲心暇輒課試多士捐金疏濬白洋等湖窪地盡成膏腴士民感恩未幾丁內艱歸壬申復丁外艱服闋呈請改教補南康府教授捐金倡修聖宮復倡濬蓼花池充白鹿洞監院設法修葺復請於鹽院增膏火五月士民利賴修復古蹟表彰前賢捐貲不惜引疾歸邑侯衛松甫聘修邑志八閱月稿成邀同志九人鼎建文昌宮因而勸捐寶輿以資寒賸又提唱捐濬縣河建閘收閘俾免水患而利農田以義倉爲救荒善法捐穀以倡樂善之心至老不倦病年猶屬其子若孫以讀書立業以好善存心以勤儉持家以溫和處世言訖而歿公生於乾隆辛巳三月初六日午時卒於道光己亥三月十五日丑時享年七十有九歐陽子有言爲善無不報而遲速有時公之封翁三世皆以忠厚傳家樂善好施而尤重道尊師故科甲之闕封誥之膺皆其所操券而致而公復以恬淡昭不盡仁義培有餘則天之報施善人子孫繩繩庸可量哉配袁氏封孺人側室孫氏子二光昕邑增生光明邑附生繼三弟大綬爲嗣女三孫男五傳皆自超爲諸生銘曰虛則修已慎獨葆貞澤則兼善利國利民身任繁劇訟獄端平爬癢拂垢敦厚嚴明積欠整頓民困以蘇案無留牘謳歌匪諛興廢舉廢學舍頻修疏濬濬滯水利兼善所至頌德去則懷思名重大憲首邑是資公性純孝思親念切急流勇退曾不停轍晚益好善扶困拯乏三黨內外無不惠洽折衷止券獎重稱賢市義捐貲何止盈千公之文藝確有典型後學楷模酌雅稟經勤儉兩言奕祀可述子孝孫賢遵守勿失某山之原實爲公竈校德焯勤永垂貞珉

陝西留壩廳同知唐公墓志銘

主事邑進士辛師雲

唐公卒之三年其孤藻等屬其壻師雲爲銘墓之文雲不敏曷敢當斯鉅任顧以公眷顧之隆栽培之厚渥承覆露得有今日惟公期雲者深惟雲知公者切其曷敢辭謹按公諱錫鐸字廉持一字松士系出唐莒國公儉始祖壽興公自

豐城遷萬載祖光表公父廷鳳公咸以公貴贈奉政大夫知其官公幼失怙恃
借翁錫純讀書家塾中名噪一邑顧公個儻負大志不屑屑經生業值川楚教
匪滋事援例授職縣丞分發陝西時賊烽方熾佐秦者裹足不前公捧檄喜躍
即日就道大府奇公才命馳赴漢中協理軍需時仁廟在位之四年也九年署
南鄭青石關巡檢以獲首逆荀朝九功奏上御筆加圈十年升褒城知縣十四
年因孝波累鑄級離任旋奉特旨開復留陝十五年愿署洋縣澄城事十六年
補授興平令上登極首重廉能勸慎之吏令大吏隨時密保公以道光二年四
月調咸寧首邑四年保薦卓異五年擢留壩同知在任五載卒公爲政廉而不
苛明而不擾責以勸課農桑崇興學校爲務其待物肫誠坦易無纖芥城府以
故愛民如子民亦愛公如父母所任褒城洋縣澄城皆邪匪蹂躪之餘井邑殘
破公綏集流離士歸學農歸田商歸市兵差餉饋不擾閭閻庠序增修盜賊衰
息人物殷阜羣小大息其在褒城被謫也川督勸公相過境士民擁轅崩角請

留公者數萬眾因是名動天聽蹶而復振同議十數員中特予於原開復非倖
致也署洋縣值公五旬生辰褒城父老重齒數百里製錦稱祝者累日不絕公
任興平久視百姓如家人父子循循拊勸不施刑威而教化以成雖婦孺皆識
公聞公鳴騶過夾道聳觀無敢諱私相語曰吾唐爺也土人呼佛爲爺蓋謂公
爲佛云歲正城鄉婦女必至內署朝夫人夫人賜以果栗皆歡喜膜拜而去其
爲民所愛戴如此興平新尹到任向例有供給三百金歲有點差長規七百五
十金公廉其病民悉蠲除之會時疫流行公周歷四鄉問民疾苦捐給藥餌口
糧不假手吏胥全活無算卒咸寧講求水利濬龍洞渠溉民田數百萬畝有兩
大姓爭訟公爲平之事後浼邑紳餽二千金峻拒弗受富室某死但乞公一臨
弔願以千金爲壽公薄其人堅弗往其清操自律如是留壩處萬山中地僻民
淳文風未盛公捐廉建留河書院并設義學七所秦中素之蠶桑利甫下車由
教勸民種藝植桑多者予優獎至今綠陰遍野懿僅成行皆公惠澤所流也又

出示勸民勤耕織知禮義禁嬉游凡數千言往復諄懇儻所謂忠信之長慈惠之師歟公官陝右三十餘年歷七政並以廉靜純白著稱治行達常寧行大用矣適西陲不靖籌備兵差供張積勞致疾卒卒後留壩紳士軍民請至入清官祠清官祠者爲前同知任公所立也任治留有益政百姓懷之至是與公爲二焉公內行醇備既少孤撫幼弟友愛臻至教督子姪皆成立天懷曠達過人急需振枯濟乏不少吝以故里中沾潤者衆人咸謂公歷膺仕位高多金而不知公身後猶寒素也雲總角侍先少宰京邸公一見器之因壻焉會公女早殤公猶眷愛不衰爲納粟大學赴北闡歲甲申公入覲回任雲送於良鄉公步驛庭數武顧雲曰予自不覺老惟步履差不似前始知事業多在少壯時然所深望者子正勉之秋風得意當先報我知也嗚呼言猶在耳而雲自是不復得見公矣且雲贈塋名塋二十二年自公明許之心今雖幸邀一第廩部曹乃不獲及公親見其銜恩茹恨豈有窮耶嗚呼哀哉公生於乾隆丙子閏九月十三日寅

時卒於道光十年十月初一子時享年七十有五元配曹宜人翟配萬宜人側室劉孺人子六長洵業儒次沂候選從九品俱歿次澤辰次若馨俱候選贈承次逢源次若澍俱業儒女四孫興孫里孫平孫茂孫以道光壬辰年月日葬縣西梅源里飛蝶山之陽銘曰干將莫耶器精斯利夏鼎商彝物機斯貴精或累仁樸者少知孰兼其長體全用具嶽嶽唐公振響長塗明不苛察質不迂拘和神中蘊才氣外敷兼斯二道厥本中孚手持大阿馴彼長鯨心結寶筏拯此芸生民貧保障天倚長城弦歌不輟桴鼓無驚猛糾寬施一張一弛軍判如山心清似水訟簡刑肅化行俗美野沃桑麻戶彭詩禮巖爰太華公勛比崇河彼渭水公澤同豐公官雖瘠民生則充方將分陝大展公庸嗚呼惜哉冬日可愛雖燠暑短春風風入雖和木遠位不副才數奇遇晚三秦父老同聲哭輓何以報德清官祠在莘莘俎豆永傷永懷曲瓊砥室望公之來公之精爽侯不邁哉梅源之里飛蝶之山是有名宦託體斯原清風百世佳城千年鼎銘阡表後起有

賢

安遠訓導袁君冀志銘

辛卯雲

嘉慶辛酉先少宰告養歸里其明年授徒城南之宋氏塾一時從游其眾而蓄道德能文章粹然儒者則曰良袁君勸齋其首也予時方九齡視君學業如在霄漢而君獨賞予於儔人中引爲忘年交者十年比予蒞侍先少宰都門而君亦以丙子賢書連累北上先少宰相見喜甚凡視學山左江南皆入幕校閱與予兄弟同堂講貫一如在塾時予方得次女而君亦舉子先少宰命爲姻好相得益歡君志壯甚每舉必赴丁酉計偕余以書速君因攜子來京就婚君回書道其衰病辭悲酸予愀然傷之越數月而君訃至矣嗚呼余與君性命之交殆四十年重以姻姻銘幽之作余之責也雖不文其敢辭君諱開慶字平階一字勸齋系山汝南袁氏始祖庭玉由宜春遷居白良世有令德爲邑著族會祠覽祖廷瑞俱邑廩生父振河能詩早世以君官勉贈修職郎妣周氏旌表節孝胞

贈孺人君生六歲而孤事母太孺人朝夕溫清孝養備至念非讀書求科第無以顯揚其親因肆志於學名大噪自經史外於諸子百家之言無不通又比及詩古文詞每篇出輒輒其脩輩邑人爭願尤長於駢體選入庾徐之室弱冠入郡庠旋食餼辛酉以拔萃貢成均丙子舉於鄉道光丙戌大挑二等甲午選安遠縣訓導安遠故荒僻鄉學者少君以醇儒治官與士子闡發經術講究文藝手批口授聲譽不倦又拔其最秀者加以獎勵士樂歸之興廢舉陷凡學宮考棚書院一明創建五年文教大興士風丕變以道光戊戌九月初八奉時卒於官歸柩之日安遠人傾城走送紳士集河干舉奠多泣下者其遺愛及人若此君天性篤厚事季父綽甫公如父每事咨稟而行至老不衰繪甫公公諒正直或爲族人所忌公悉力禦侮屢艱危不悔然人卒服其誠信無敢犯生平至誠待物抑然善下然遇事有不可者折以義理鬚髯戟張人謂仁者之勇喜其難解紛雖極強暴者得其一言無不悅服邑中公事如志局賓興族事如祠宇譜

蹠皆主其事而觀厥成友人湯穀堂巢繩齋兩孝廉客死於外皆經紀其喪俾旅櫬得歸其他義舉類如是尤篤於師恩事先公宰三十餘年相從中外恂恂弟子職凡先公宰一言一動無不身體而力行之嘉慶丁卯戊辰間邑人相聞君獨守師訓持正拂眾論不畏強禦有吾道干城風予兄弟嘗有急君傾身障護走數十里相救應屢遭紛呶不顧也嗚呼君仁孝行於家信義篤於師友教澤施於學校其文章以壽而行足以傳可謂有道君子矣昔先少宰於天下所取士得鄭解元兼才於里中教授士得君嘗喟然曰兩生學術人品皆不愧古人皆堪爲當世用而皆不能成進士其將蒞之外而後通歟抑將食報於其後人歟嗚呼使斯言而信勸齋之文之行可以不沒矣乎君生乾隆癸巳九月十三巳時距君之沒享年六十六元配張孀人連舉數子皆不育繼配楊孀人生一子芳泰娶辛氏即予次女也以道光庚子十一月卜葬於本鄉銀盆洶珠之原銘曰天兮無意何生哲人天兮有意何喪斯文豐湖其才而斯之名躬仁履道乃有難屯懿矣責君吾黨之儒積學力行服膺師訓鼓俗春風與物無競內介外和賢愚愛敬君之氣度休休有容公輔之器大臣之風是將行道澤被無窮向應一命學官以終章句小儒或騰霄漢景拔電飛雕蟲刻篆燕許鴻裁卿雲詞翰胡爲一第不償厥願德薰桑梓道被鄉閭使磨民社澤我烝黎安道之學經師人師使持文柄公道宏施命也何如天道難論爰有一解天佑善人不於其身於其子孫兢兢遺孤庶大其門銀盆之原版化之里鬱鬱佳城環山抱水千秋而下鄉人仰止是有人焉有道君子

湖北試用知縣周公育人墓誌銘

李慶咸

公諱樹晉字佑孫號育人周氏世居萬載之黃茅鄉代有隱德曾大父繼德公孝友齊家七世同居無異爨乾隆五十年合邑請旌義門大父金彩公積學未遇父治康公邑增生事繼祖武相率儉勤家法成童卽執有常業秀士樸農無敢游惰公生而樸茂內慧不外露稍長父命服田帶經而鋤安之若素然性個

儻有大志歲丙戌同胞兄樹楷補弟子員公瞿然曰溫飽非吾所志奈何久事
阡陌耶乃輟耕而讀壬辰歲入郡庠踰年舉修行補增癸卯登鄉薦益勵前修
枕經靡史孜孜不倦作文必自出機杼不拾人牙慧雖六試春官乙巳會試呈
薦卒以額薦見遺蓋其勃窣理窟湛深經術之言見者無不心折有由然也予
與公爲姻親自丁未同赴禮闈每試必俱惟冀相與有成乃一第之難同深慨
歎數亦奇矣公以功名未遂者母在堂定省久疎又值粵氛不靖騷擾江湖道
途梗塞不獲歸遂致憂鬱成疾迨癸丑大挑一等以知縣分發湖北試用始
迂道旋里抵家後延醫診視僉謂元氣大傷刀圭恐難爲力而公方日夜焦勞
謂江漢經賊匪蹂躪勞來安集措手維難輾轉籌思疾益增劇未幾遂至不起
嗚呼使天假之年以其學術發之爲經濟則其所敷布正未有艾胡優於才而
厄於數不得藉手以展奇才惜哉公卒咸豐癸丑年十二月初九日巳時距生
於嘉慶辛未年六月十一日子時得年四十有三德配郭氏子三人長僕章出

胞兄樹楷爲嗣次光瑞聘媳宋氏三光瑞尙幼自予女壻也女二長適龍次
適郭余先公數月南旋久傷離索會公兄樹楷以明經貢成均藉入賀爲良覲
誼登堂而公已屬纊數時矣嗚呼數年聚首一朝永訣余其何以爲情叩哲嗣
等卜以明年正月十八日良辰葬木村虎形山之原包爲墓誌余雖不文其何
敢辭銘曰公之才足以有爲公之學未展所施孰奪其算天實爲之積厚流光
食報未已不於其身於其孫子勒石銘幽以告於禩
通奉大夫唐公逢辰墓志銘
人學士曾國藩

君諱逢辰字芳行號蘋洲姓唐氏江西萬載縣人父錫鐸官陝西留壩廳同知
君隨父任習吏事不樂以科舉帖括自程限入資爲縣丞分發湖南補湘潭縣
丞大計卓異升知縣旋補耒陽縣調湘鄉縣積功累保同知直隸州以知府記
名署澧州事擢衡州府知府加升道君服官三十年廉靜慈惠號稱循吏而所
在以武功能辦賊顯在耒陽偕郴州劉大偉之亂分股擾及耒陽油榨墟君自

率民兵遮擊之賊遁去時粵賊洪秀全陷道州遂由桂陽州郴州至永興距耒陽城數十里所至官吏望風遁君獨閉城治守具戒士紳募勇殺賊立功賊亦遂掠縣境而北陷安仁茶陵不一犯縣城而常寧之白沙結山樅墟餘匪尹安恒劉高明等乘隙謀作亂人心洶懼君詢知其情急掩捕之盡戮其渠耒陽民竟不知有兵事乃皆大懽明年調署湘鄉前令朱若孫詒故有政聲湘鄉民聞君至張日以伺及見君行政相謂曰吾憂故府君之難爲繼也今得唐侯可以無憾咸豐四年洪秀全既踞金陵遣其將羅大綱上窺湖南時國藩奉命治水陸各軍討賊以水師扼長沙而賊將侯世瑄徑由寧鄉趨湘潭橫出江車君以民兵扼石潭賊以故不得越石潭而西又明年衡陽洪樂市土匪起毘連湘鄉南境君又扼兵石潭地方花門樓以拒襲殺數百人於是湘鄉團練之名聞天下無敢捕兵犯縣境者權知澧州始至訪得積匪一人戮之澧民故強悍相戒毋敢犯君法而在湘鄉以捐例推廣文武學額置田計息爲鄉會試資興及歲

科兩試卷費在澧州備咸豐七年蝗災君爲除蝗通力書散之所屬士民而設局收買蠅子親歷各鄉捕治蝗終不爲害九年擢升衡州府知府府北石鼓書院當蒸湘之交商船輻輳齊舍湫隘置廬前守高君人鑒嘗藉蓮稅充膏火君蹙縮居積籍其贏餘議增建石鼓別墅於石鼓峯之南政建考棚繕葺育嬰同仁兩堂鉤稽出入俾資經久同治元年歲荒君開常平倉輸穀於民而設粥以濟餓者蓋君性慈和而遇事能斷所行政及捕治亂民應機立決無疑難用能受成於一心而孚惠於民所至翕然稱善而在湘鄉最久士民思之尤深嘗粵賊至永興耒陽居民皆走避君獨募勇數十人乘城時徵存民稅萬數千金或勸君留充勇糧君曰此數十人食城中穀有餘耒陽一孤城賊所不爭或幸不至至卽死耳留此何爲是時州縣被賊所徵民稅皆免君獨完解君之廉能不欺其心以能獲信於上而致功與各施顯有聞蓋由此也君生於乾隆五十八年癸丑十月二十三日寅時卒於同治元年壬戌九月初六日酉時年七十葬

於萬載縣四區大埠頭綠豆園元配陳夫人生女一繼配彭夫人生子林棠軍功保舉同知賞戴花翎女五孫鼎豐候選知縣孫女三曾孫女四銘曰猗歟唐君眾趨利以忘其生君漠不聞難則至矣而人惜其元官則勞久而人憚其勤各暨惠愛惟所招取而拱手以讓之人猗歟唐君其施惠於吾楚二縣一州而達於一郡其藏形者三尺之墳世相承爲良吏永徵信於斯文

封君龍子蔚先生墓誌銘

高玉森

天之降福於人必觀其器之所受窮巷之士聞舍求田弊弊然若有所不容已其子孫亦遂將沉溺於其中而無以底於成倖而或成數十年之清苦必求償於一日之榮望不滿於鄉閭而澤不流於後也其亦可嘆也已若夫超然物外貴賤一節其爲我龍封君乎封君諱龍翰號子蔚世爲邑之石塘人祖父炳本生父介年父如聞故農也封君讀書數年而輟以嫻騎射游庠非其志也於是博觀史傳每於客座中上下古今人品與歷代興衰成敗之所以然繼以然數

千言無遺誤人大驚服以知其沒於名利而殷於學也一時文士樂與之交方寒貧時有債負者將鬻田以償慨然曰貧吾命也靜聽之可耳爲此爾妻子令凍餓耶卒却之其寬厚類若此逮子蔚言以進士官於皖聞其勤於職事則甚喜不問宦囊之所入就養所至數月輒歸蓋借山水以自娛於世俗應酬之虛文性不耐也年七十精神不衰日步三四里歸則課諸孫句讀以爲常以光緒庚子年四月十一日卒封君爲人身長五立言論慷慨而和易近人故鄉黨無纖芥之釁日用飲食始不過儉後不加豐豪於飲未嘗及亂人以覘其所養焉方疾之亟也諸子以長兄未歸爲詞曰忠孝不兩全此何待言又以遺命語曰人皆不知足吾生獲所養死無所苦於世不失爲端人忠厚之食報遠矣嗚呼觀封君之所信心無愧與天之所以厚之者其間豈偶然也與熾昌未有艾也封君以道光庚寅年五月二十日生其卒也葬於屋後半里之牛形子五聲言補安徽桐城令廬著望江宣城顧言國學生行言舉人箴言廬膳生前卒鳴言

國學生女一適府經歷銜鮑模坤孫男女各七人王森以仰慕之深重以姻親
幽宮之石未敢以不文辭銘曰克家有子以濟於市富貴之迹泊然非所性之
存其儲孔撫永被後昆

盧侍讀墓誌銘

德化劉廷琛

君諱兆蓉晚易名耿宇扶常萬載人弱冠善屬文爲龍學使所賞肄業經訓書
院治古文辭光緒丁酉舉於鄉官內閣中書記名侍讀余初不識君一見於魏
君斯逸坐中觀其言論敬異之丙午予監督大學堂以君任齋務提調得其助
爲多堂中教習多宿學君與郭君復初鍾君麓樵最友善所學益進予奉命進
呈講義未嘗不就商榷也國變後君棄官歸里設塾授徒課以正學癸丑顧予
於青島時兗州有事君爲奔走焉庚申君與復初顧余於九江復往來上海京
津間歸就予別慰勸甚至依依不忍去予在太學堂共事蓋百餘人亂後星散
或不相關聞君獨數顧予於患難之際有古人風誼君素和易而憤世則激昂

有擊楫之志予方喜君學成而志益堅定將倚以有爲而君卒矣嗟乎此豈獨
朋友凋喪之感而吾黨失忠信可恃之士爲尤可悲也曾祖諱後懿祖諱昆樹
考諱錫璜均贈如例妻彭氏繼娶謝氏生子四皆幼君以辛酉二月十二日卒
享年四十有八君弟貞木以是年四月某日葬君於里之杉樹塢貞木從君學
事君甚恭蓋能撫遺孤者銘曰嗚呼天道誠難知矣天澤可以易位中國變而
爲夷驚於學者率從風披靡君獨慨然有志於古不隨世變以推移當國家之
多難方有厚望於君奈何遽棄濁世而如遺石可爛而志不可朽茫茫萬禩視
此銘辭

贈君郭公孟牖墓表

明禮部侍郎撫州王 英

人之有德者天必佑之昇之福壽或不在其身則在其子孫斯言也豈不可徵
信哉予於萬載郭公見之公諱孟牖字善慶世爲名族曾祖德新祖壽軒父彥
正俱有學行母龍氏淑德素聞公性端敏自幼嗜學及長博究羣籍而工於詩

賦深有思致鄉先輩器重之名譽日著公自持以謙和有司欲薦其才則以親老力辭由是謝絕人事深居簡出於富貴利祿澹如也公事二親篤盡子道旦夕必侍側出入必告供膳必自理凡親意所欲爲必順成之未嘗少拂親沒號慟絕而復迴水漿不入口三日葬祭盡禮人稱其孝家多腴田歲積粟遇饑貧者必以濟里鄰有急難赴之人有爭訟爲剖決之子長力教之詩書俾之成才公之操行蓋如此生癸卯十一月十六日以永樂己丑五月初十歿春秋四十有七葬其邑地名竹渡紫蓋山之陽既葬之三十五年爲正統癸亥公之子刑科給事中瑾以葬有誌納諸幽室而墓未有表乃奉貴州布政司左布政易節之狀請文爲表公配龍氏繼韓氏子二長瓊次瑾俱龍氏出瓊以徵辟授國子監博士瑾登進士擢刑科給事中顯赫其大皆公之教訓所致也朝廷推恩贈公給事中光榮賁千元壞論者謂公有學不仕而於親能孝於人能周卹其德允厥雖未享上壽而有子顯揚於後且孫枝蕃衍非天之報公也耶士之垂名于世者豈特以位哉有德而隱者皆當論著也故以瑾之請爲書之俾刻石以表於墓過者式焉

國子監助教敬堂辛君墓表

大興進士閔學菊方綱

乾隆己酉予於江西選拔貢生得萬載辛君從遊南康廣信諸郡歲餘君成進士復官國學者又十年知其經學最深所與予校勘注疏說文諸條手記皆存予篋近年來有持經說相質者必與君共研覈之君證據極博而能審擇歸於一是不爲泛濫不爲矜異之說今年春尙爲新城魯君嗣光校定尙書說己酉江西選拔諸子惟魯與君治經尤精密魯君嗣光前十餘年卒予未得表其墓款意今乃表君之墓可傷也已君爲人誠信篤敬不苟言笑不輕然諾易書詩三禮三傳皆考辨補折凡若干卷君乾隆己酉舉於鄉乙卯中會試嘉慶丙辰進士國子監助教俸滿以同知用諱紹業字復先一字敬堂生於乾隆二十年十一月二十七日卒於嘉慶十九年七月十六日年六十配王孺人子四介公

弼僕倣孫三僕庚午舉人今扶柩歸葬狀其略來求表於墓道雖不獲書丹於石其學行皆可傳於後者

追贈中憲大夫原任廣西泗城府知府調署桂林府知府諭賜祭葬盧公翰坡先生墓表

陳啟邁

余撫江右之二年公嗣子書浙來謁余以通家子弟延見書浙泫然流涕百拜稽首泣曰先君原任廣西泗城府知府辛亥四月調署桂林府知府兩時粵匪肆逆攻陷城邑戕害吏民欽命文華殿大學士賽中堂暨巴達二都護統大軍進勦營駐省城先君督辦糧臺并支應各營軍餉兼理全省捐輸事務軍書旁午昕夕靡遑積勞成疾不幸於九月六日卒於官時上下戒嚴王子春始獲扶輓歸里冬間卜葬於本邑麻田龜山之麓雖蒙中堂暨各大憲憫先君爲國隕軀奏請卹典荷恩賜祭葬贈道銜并蔭一子以縣丞用自足光前壤而慰精誠而墓門碑碣尙自缺然何以表其阡而垂後世不孝偷息人間幾無以立於天地敢請予聞之慨然曰公在浙著循良在粵多勞績所到之處興利除害如興桑水利盜賊詞訟凡有關於民者知無不爲爲無不力而於作養人才創建書院則下車伊始卽以是爲首務蒞任數邑無者創之廢者新之民皆愛慕不忘各邑均奉有長生祿位浙人至今猶稱道弗衰粵俗強悍不同於浙公勸撫並用安良除暴大著勳勞揆諸表法孰大於是余向官西粵時聞公居官不避艱不趨利不事逢迎實深敬佩及因公來見則又渾厚和平毫無圭角遂與交雅忘形迹迄今回憶霽月光風故人如在予不表之其將誰待公諱昆鑾字金成號翰坡系出范陽盧氏袁州萬載人先世家傳清德代有青衿世以詩書爲業祖諱毓奇國學生以公貴貤贈奉政大夫考諱文宇國學生諱贈朝議大夫祖考妣皆贈如例公生卽岐嶷兒時見祖父以邑公事受累思發憤以慰之初入學誦讀聲琅琅然師奇之曰爲偉器及長益刻苦自勵雖解館家居服勞奉養外惟事披吟性極謙退儕輩或擾亂嘗辱之弗與較澹如也學業由是大進

老宿皆奇其文公不自恃讀如故年十九入邑庠越四年登賢書又三年捷南宮謁選載發浙江充同考官三歷縣四始臨安繼調石門海鹽平湖中丞富以公賢能保送入覲奏對稱旨天子嘉其樸誠記名待用及回浙值海寧塘決大吏以公能奏陞東海防同知公未抵任特旨已陞授廣西明江同知浙撫臣奏留修塘兩載告竣功成赴粵補官不久以憂去服闋引見朝廷重邊徼仍命發往廣西歷龍州南寧同知署鎮安思恩等府叅林直隸州事前後十餘年派充文閣內簾試官委管奏請盤查全省虧空局務督辦湖南粵西會匪調撥兵弁給發軍糧隨機應變竭慮殫精殲除巨憝解散脅從股匪肅清以功陞泗城府知府未幾金田逆匪猖獗李宮保視師西粵引公入幕府司糧餉隨營數月旋奉諭旨以桂林爲首要之區必得公正廉明之員上官以公入奏調署桂林竟以勞瘁而終不竟其用惜哉公享年五十有五歷任三十載爲政不事嚴刑峻法惟以德化故每去一邑民皆攀轅遮道依依不舍嘗聞其在鹽邑時有巨盜

孫某案成潛遁久未緝平邑獲之不解赴本官越境以獻公重賞之不受詰之曰小人聞公長者懼爲公累非貪賞也卒辭而去此以知公之愛民感深隣境刁民不得肆其奸使天下長民者皆如公恩威遠被民知自愛盜賊無由潛匿又何至養癰貽患釀成巨寇重煩朝廷顧慮其視公爲何如哉予爲公述其始終以表於石非徒以垂後世蓋以爲牧民者法也表曰渤海聲遠治化循良武都虞詡盜賊潛藏信臣爲守修築隄塘與民興利澤沛一方公更博大兼擅其長中牟異政屢擢巖疆文教丕振化洽膠庠鉅工底定幘固海防揆文奮武夷險皆臧揭竿伏莽小醜跳梁膺命禦侮厥績孔彰留侯借箸決策非常星隕諸葛返旆南陽功留浙粵日久彌光緬懷巖末青史流芳書之墓石作作有苦孝廉方正辛君墓表

元和進士陳鶴

先生諱炳昭字能濟號熹亭江西萬載人袁州府學歲貢生也曾祖金澄廩生祖汝獻湖口縣儒學教諭贈江南道監察御史父樹貴本生父樹國俱增生先

生善事父母推之兄弟宗族姻黨暨乎一鄉一邑之間恒以信義見推初贈御史公卒羣從兄弟以家事委先生其後季父病革復以身後事相屬先生謹司其財產出入無纖毫私有妹婿素封交不擇人妹愛之先生割宅與共處朝夕規勸終妹世得無收妹卒壻遂蕩其產則數鬻給之甥既長議婚不能取爲資而取之邑有學田公舉先生司理凡十餘年佃民愛戴皆父母邑應童子試者千五百餘人以自攜坐具爲苦諸搢紳謀創立試院而艱於費因率諸有力者出錢諸有力者曰非辛先生任其事吾儕終不出錢時先生已老謝不與事諸搢紳強起之事始集嘉慶元年有詔舉孝廉方正縣學教諭某首舉先生而府學教授某爭之曰此府學諸生也豈可不自我舉乎八年八月卒年七十有六將易簀命諸子治喪不以佛老惟朝夕設奠如禮邑人士多效之其葬也白衣冠而送者幾千人遠近嗟嘆以爲從來布衣諸生所未有蓋先生之爲人類乎王彥方陳仲弓而上希平夫子所謂信則人任焉者然先生固經生嘗謂讀書

不如鈔書課寫五經至一再遍年逾六十猶爲諸釋孫欽經寒暑不輟信乎經義與治事相兼而信義之所以著於人人者皆自學問中得之也嗚呼斯真克副乎孝廉方正之科者已予七人紹基附生紹業嘉慶元年進士國子學正誠質增生紹顯紹模增生紹訓庠生紹良孫十八人曾孫七人墓在上高縣山棗渡江北月形山之原

湯府君墓表

梅曾亮

君諱勳字績林世居江西萬載縣西鄉考德高娶於潘再娶於漆漆孺人生君幼孤母病疇於神滅身年以益親壽兄遠遊從師負書擔簋笠相隨商湖湘中諸賈人有贏錢博塞出敖君獨挾冊危坐眾皆嫌其不類性獨好形象言醫藥方書求者輒應不以爲利娶龍孺人子慶元淑元譽光側室張生星元君性嫉惡有聞見必面責之不問人遠近厚薄向赤語竭而後已孺子婦人聞君至皆避去鄉有豪不便君以爲訟以蜚語連數歲不解欲君奔走匿迹去鄉里爲快

君子譽光年十七大府重其文而館之署仇者乃息昔司馬遷班固屢稱人長者其行類忍詎不臧否於人夫長年之人常不與兒童較是非故長者之名以其過畜人如兒童者而名之也即慢人也實甚然則見不善必怒怒必不忍於詞色如君者其設心與彼孰慢孰恭而人反不樂乎是孔孟惡鄉愿而遷固稱長者豈非以世之自待者益輕而卑其論與况如鄉豪者何足責哉譽光官江蘇君嘗再至其縣署見予能其官即歸曰吾不樂居官府道光十六年七月十九日卒年七十七十八年八月十三日葬宜春縣宣風塘富坪上譽光嘗從先君子遊乞曾亮爲之表習知之不可辭

駐袁州叅將盧公傳

邑庠生李魁春

盧公慎體諱志勝字漢興爲人慷慨有謀略遇紛難好排解見人阨輒傾身佐之爭鬪聞公言即解故族里中事無大小皆取決又雅好交游邂逅如故四方之士亦咸樂與交崇禎間天井窩盜起攻城陷陣所過殘滅官軍或震怖公獨

毅然曰大丈夫不能建功立業碌碌於世何所用乃召集豪傑同官兵勦之賊

恐遽降時袁臨侯總督三省除公廵昌守備公之在年餘郡守倚如干城洎罷

歸父老皆流涕擁馬足不得行本朝順治初起用爲游擊偕總兵郭天才駐袁

州袁故吳楚衝也兵馬蹂躪閭井邱墟民苦兵久矣公至下令軍中敢取民間

一草一木者斬由是按堵如故厥後郭別調公亦罷袁之城空焉上命總兵蓋

出鎮之聞公能表授叅將其有功地方甚多不能殫述後數年忽動歸興歎曰

功成不退身之災也遂解綬家居脫然無累或琴於室或羨於淵以自樂焉贊

曰公之度量越人甚遠公之才猷應運而顯交賢納士聞聲載慕翼難扶危羣

情翕附時丁未季盜賊如蜂公督義旗誓募羣兇雷轟電掣谷靜山空爾功既

立侯嘉乃績式佐新朝授以顯秩公之中年兩鎮於袁維桑與梓咸沐其恩功

成身退賢如之何著於竹帛千載不磨

廖荆山先生行狀

義寧州學正南昌縣教諭李真寶

先生諱連城字明亮號荆山姓廖萬載人祖諱斯雲贈奉政大夫妣黃太宜人父諱清兆誥贈奉政大夫妣藍太宜人先生清兆公之長子也生有異稟能孝友事父母必得其歡心閨門肅穆待親戚故舊恂恂如也稍閒則登學古樓誦讀不事家人生產弱冠後遊庠食饌歲科試詩古文詞罕有出其右者學使孫符卿目爲遺器以優貢京師需次儒學歸而掌教高魁每以其所自得者開示及門邑人士咸矜式焉咸豐三四年粵酋陷大江南北據金陵分支四出謀窺江西先生與彭子文練團當省各賞假分團爲阻撓計子文性剛與之訐控省叩關詞連大吏先生與子文同事訟亦與焉六年粵酋破江西各府縣軍務旁午欽案未決先生與子文回里起忠義軍與援江軍相犄角一戰於羅城再戰於天保三戰大破敵於長勝江四戰敗敵於斜口五戰克復上高札營界埠瑞州大股精悍來援師驚而潰先生幾陷於危而氣不少衰尋以餉缺勇散是役也徒手號召數千人轉戰萬新上三縣經略曾文正深嘉其忠義有幹才又

年重提欽案子文以積勞病故間官欲全上司體而坐誣亡者論令先生改供先生堅不易辭人服其義旋丁外艱服除入文正公墓府效用以瘡疾假歸適髮逆再陷新昌上高先生奉札防堵謂坐與行勞費正等初冀敵於刀櫓再戰大破敵於麻田三戰克復新昌論功保知縣遇缺卽選同治元年大比先生復應鄉試以五策第一爲榜下知名士五年貴州教黨大亂寧萬羣不逞謀擄應約舉事於交界地方民心惶惑受僞符者十而八九先生與鍾卓如密謀掩捕擒斬八名火江西教首鄧某之廬渠魁遠遁地方得免糜爛卽久從教者亦多悔悟反正論者謂先生保全生靈之功最大六年瀏首姜本致作亂蹂躪小源大橋招呼醜類與白良團勇相持竟月適縣勇山尙鏖繞橫截姜遂進菱湖高嶺欲乘虛劫先生軍裝火藥先生俟其近宅百步督練勇鄉團一戰滅之其竄逸者復爲先生弟鳳城伏兵擒斬論功保賞藍翎以知縣不論班次遇缺先選並加同知銜十年丁太宜人憂服除進京會試以海防策呈兩江制軍光緒二

年四月進呈御覽三年復呈遞條陳均奉旨咨行議奏六年選授湖南新化縣七年二月到任革除陋規四條書二銘以示潔已愛民不侮鰥寡不畏強禦民以事至官卽論以某日聽訊案無留牘出鄉則自備夫馬嚴禁需索新化昔爲苗疆民多獷悍前官每請兵懲創先生化以文學盜息民安甫一期而疾作卒於官廨年七十時光緒八年二月初三日也公帑無虧私囊無積實慶太守蔣公常垣憫先生清苦設法調劑俾諸孤得扶柩歸葬於邑北之燕竹里焉宜人凌氏前卒子男三人劄勤劄寬劄和俱大學生女二長適謝次適葉孫男三人女九人皆幼初高魁東洲兩書院歷聘名宿主講先生肄業其間又得鍾惺齋爲師謝暢軒賴曉山爲友日以道藝相切劘故讀書能見底蘊經世別具胸襟居恒好以古名儒名臣自期學問宗有宋五子居敬窮理兼佩服明儒王文成致良知於事事物物直截簡易人人可以學爲聖人繼以姚江尚悟修重節義知行合一而存門戶之見者則謂其右陸左朱以心學爲禪學誤矣先生枕經

薛史知大道自有至當不易之歸學者貴能於解的破凡勦說雷同與揆之情理形勢有未瑩者皆覆瓿之駢枚而已所著時務策指陳得失皆可見之施行讀史諸篇抉摛隱微亦多不刊之論義寧陳中丞寶箴爲之梓行昔諸葛武侯理繁治劇不過安當二字淮陰侯驅市人決戰取勝要在及鋒而試至於大義當前毅然爲之死生利害一無所怵於中先生雖僅小試於團練鄉兵而忠勇知命之學大概可見一斑若吏治以德教爲先刑罰并貴得中欺人者得志則受害者痛心子產相鄭以猛濟寬實則惟明克允後世姑息容隱紀綱廢弛皆庸俗以出人罪爲陰德者階之應也先生作宰新化實心實政期月之間風氣爲之一變易簣之際左右問所欲言先生曰全受全歸夫復何言惟天假我新化獨不畀以三年之期以觀厥成爲可憾耳目遂贖諸孤以實承學有年知先生稍詳使其其行狀以請誌傳於作者實謹以所見所聞據實縷書以俟大君子纂次論定俾後之講學論治者取裁焉謹狀

盧君翰坡先生傳贊

廣西巡撫鄒鳴鶴

公諱昆鑾字金成號翰坡姓盧氏江右萬載人余壬午恩科會試同年也通籍後公策仕浙江與余天各一方而公之政績浙撫臣保舉卓異每見諸邸報以故嚮慕久深今夏余奉命來撫西粵時粵匪滋逆欽命大學士賽統大軍進勦駐紮省垣戎馬倉皇余懼不勝任遙聞周制軍吳方伯屢請於李宮保營調公返署桂林府事深幸相助得人先於途次札詢賊情並員弁優劣公剖析詳陳略無隱諱到任後公一日與余數見商確軍政洞中機宜大有裨益當茲羽檄紛馳智慮稍有未及卽貽悞非輕公審慎精詳好整以暇此非器識宏深者不能何其倚任方深竟於九月六日中痰而薨全省官紳軍民皆流涕痛悼欽差大臣以公積勞成疾歿於王事援軍營例入奏天子賜祭葬贈卹予廕如例公之忠誠亦無忝矣今令嗣沈浙等將扶櫬返里請余傳余謂公儒林循吏口碑於浙豈必藉余言以傳然予以年誼咸令嗣之誠爰按狀以爲公傳公祖父以

詩書起家一門孝友公生有至性家學淵源年未冠爲各督學王省崖先生拔置邑庠越四年己卯舉於鄉又三年成進士謁選以知縣發浙省屢充鄉試同考官得人最盛初宰臨安邑荒僻無繢蓬公下車卽訪求疾苦百廢具修而於作養人才尤爲廬念邑素無學校公捐廉倡建錦城書院俾生童肄業刑政稍暇則詣院親課優其賞賜不數年民富士興屢有繢蓬邑人愛之歌頌不輟任滿調石門歷海鹽平湖石門衡繁鹽與平皆海疆素稱難治公到任興利除害一以治臨邑者治之而民之愛公亦與臨無異并祠生主於各邑書院故公每去一邑民皆攀轅遮道河干祖餞有哭泣挽留者蓋公之德澤入人深也癸巳中丞富以公治行爲浙最專摺保舉入覲奏對稱旨諭部記名將任邊徼公回浙適海甯石塘崩塌諸大吏謀改造并外護柴塘以冀垂久商能任其事者僉曰惟盧令可復具摺保升東海防同知而朝廷簡放廣西明江之旨下浙撫留修塘工兩載績成而公之賄累不少矣公慨然不以爲意乙未赴粵題補

龍州同知庚子以憂免服闋仍揀發粵西歷署明江南甯同知鬱林直隸州知州鎮安思恩府知府粵地苗民雜處風俗強悍公勸撫並用所在有善政邇來大吏過於優容州縣以無事爲福養癰貽患刀民每揭竿蠢動公承委捕勦前後帶兵撲滅屢著勤勞嗣新甯全州雷李興安龍勝李林諸賊日聚眾陷城邑殺吏民猖獗尤甚公統率兵弁直搗巢穴殲厥渠魁擒其餘股匪肅清以功升泗城府知府公大小常變動罔不藏山海深沉莫可測已迨後金田會匪叛逆李宮保督師柳郡引爲行軍司馬省中以首區簡用經屢請不得已乃允履任洵知人哉贊曰公嚴以律已寬以待人謙以接物恕以平情屏絕繁華敦崇樸實善勞兩忘名利不役惟惓惓於功業之未成雖殞身而弗惜嗚呼鞠躬盡瘁死而後已公其有焉德配李恭人節儉仁慈善勸內政克成公志子六人長書濶議叙九品次清沆三錫榮皆邑諸生四書浙五書湖議叙八品出繼胞弟展前爲嗣六書厚業儒女一字木邑侯選州同宋公皆明次子侯選布政司理問

世材幾十有餘人皆足嗣公而世其家者也

唐君蘋洲先生傳

大學士曾國藩

唐君逢辰號蘋洲江西萬載縣人父錫鐸留壩廳同知有善政君自少卽習吏事隨父任析疑決策多所贊助援例以縣丞分發湖南補湘潭縣丞升補耒陽縣知縣咸豐三年粵賊洪秀全連陷郴州興寧永興偏近耒陽城居民走徙一空君募勇得數十人乘城日伏城堞間夜輒炬火發礮賊偵至疑有重兵乃趨安仁北竄而君徵收民稅萬數千金方遣解省城而賊已陷永興或勸君留勿遣君曰此數十人食城中見糧無虞缺乏賊至卽死耳吾留此待賊乎立遣之行於是湖南巡撫以君守城捍賊而所收民稅不爲私利緩急可倚持有意需用之矣明年調知湘鄉賊由金陵上犯再陷湖北省城上窺湖南以水陸各軍集省城乃西趨寧鄉陷湘潭擾及縣境君立扼石潭馬托使賊不得西竄在湘鄉四年廣學額置實興田前令朱君孫詒故有惠愛而君能繼之巡撫駱公慶

奏君才可大用調署澧州治蝗尤有聲除惡懲奸鋤其強梗升補衡州府知府至則增修書院建試院更定育嬰同仁兩堂章程同治元年衡州荒穀踊騰貴君飭各屬開常平倉平糶設廠施粥以濟貧民以籌捐軍餉叙勞加升道未幾卒於官君抱負奇偉而慈惠溫溫平易近人所至士服其教民感其誠令出惟行無有扞格自泰甚儉而敦尚友愛推牙弟姪不有其私鄉鄰戚族貧不能贍者周濟無缺年過七十而聰強完如少壯時論者謂其所負宏而施之不遺而一病且死之尤可惜也

辛孝子傳

邑優貢辛炳喬

乾隆十九年為載縣鄉紳袁建中偕里老族鄰以辛金岫事略呈學遞上之大府得咨部後陳守修志列諸雜傳語寥寥且弗本呈官事略非所以紀實也謹撮要別為之傳按孝子辛金岫字首亮 志稱字 住岐源方又歲胞伯母劉年二十九新寡乃繼為嗣稍長受鄰傭早晚問安習以為常而仍勤鄰家事遇佳節予之肉弗食必以饋母遠鄉雇之值雖豐不赴也顧繼母有痼疾針指紡績皆廢惟以雞為羞則病希發孝子所得貲輒買雞以進母嘗浣衣於塘忘攜杵因置衣塘側而歸覓杵孝子自外歸鄉中輕薄子戲呼曰爾母溺塘矣乃疾趨果見母所浣衣而不見母也急投水救母水深且濶良久不出忽似有人托之而上者母亟呼人救起腹彭亨置牛背閱一二時乃甦自是孝子之名大著雍正元年棚民作變孝子負母匿山中遇賊於小石橋將繫其母去以要贖金孝子長跪號泣以頭搶地血丹橋石賊顧問曰爾何人曰辛某然則孝子也舍之去至今呼是橋為孝子橋母之卒也不復受傭賣薪得錢即市楮幣焚墓凡廬墓者五載初小源人唐與仁聞孝子赤貧不能聘妻乃自以女妻之生五子邑侯嚴在昌旌其閭曰孝行可風乾隆二年無疾端坐而逝

陳孝子傳

邑舉人鍾斯敬

孝子姓陳名盛森居邑北之黎源里父世龍生子二孝子其仲也甫七齡隨父

廬大母墓日必歸省其母劉孺人無間人故詢則應曰吾父知有母我豈忘之乎眾山是奇之稍長就外傳喜聞先生長者談忠孝事晨出墓還依依父母側雖兒曹數復翫戲絕不往已而孝子成立親齒日以衰家又無涖歲資遂輟學習岐黃焉母羸善病偶疽發背潰委頓牀第間不堪逼視孝子時以口吮潰處傅之藥乃漸平復初不覺其穢臭然父犯喀血氣喘而瘖瀕危孝子愴憤願以身代遍召醫巫示不解帶者兩寒燠間楚有神甚著卽祇肅走數百里祈之路遇人授紫丸二因進諸父病頓失嗣又侍父奔母族喪比反而雨暴至臨岬父忽驚眩墜溪中其時溪漲驟發孝子躍而入浪花至湧力挽之始得幸抵岸而父氣息奄奄不省人間事矣急昇回家半晌卻甦卒以濡濕中傷成蠱醫百方莫能愈後有不識者扣扉爲言得雄雉和藁餌當已孝子竊幸轉復以雉難卒索爲慮越日舍之西圃瞥一鳥飛來趨而問之雉也且雉亦不去孝子獲焉果以是瘳其父是二疾也胥沉綿殮殮非尋常微恙比卽孝子亦幾窮於調護所

遇與扣扉者究不知何許人要其所指授皆驗而雉之應念而至則益奇鄉之人咸適然爲齊其口謂非純孝之所致無此也孝子親不踰中人而坦真抱慙或浼醫治癰癰不啻身受歲時供侍一取給於業醫常市甘旨作饌而已故食淡人饋之雞豚必盡留養父而醫者佩其德頻體其孝瓜果珍饈之授往往麻巢父以此彌暢壽躋八十乃終終之日孝子一慟幾絕既葬倚廬墓所朝夕號痛夢寐中猶時呼阿父戚鄰勸其節哀輒愴然曰昔吾母逝吾不敢以哀毀傷父心不得廬終喪委曲承歡慰父然背父固屢屢泣不能自己今苦塊餘生復何往不令吾肝腸寸裂耶言次復嗚咽不能成聲聞者莫不流涕喪畢每飯仍設七箸奉父母遺忌日弗勝悲感亦所謂事死如事生者矣至孝子篤友于善排解首創家廟捐襄義塾諸事可稱甚富余以爲俱孝德之所發者

贈龍母袁氏貞節傳

張璧

國風列婦人女子之事詳矣事之大者莫如節今考詩以節著者衛共姬一人

而已仲尼刪詩存柏舟於經得非闡發幽光以輔翼世教歟然共姬以至戚欲奪其志乃爲自矢之言仲尼於此蓋不能不悲其志矣其後夏侯令女不忍文叔之死至斷髮刑耳鼻然後免於至親之見奪而以節自終爲曹氏婦千載下傳其事者有餘傷焉假令遇仲尼又不但悲其志已也乃今見龍母袁孺人益有感云孺人歸月塘龍先生七年而龍先生逝哀毀幾絕如是者三其子德正君纔四歲德中君尚在襁褓形影相弔服且闋矣於是嫺黨憐之諷以再圖所歸時有富室慕孺人賢欲爲子議配孺人聞之遂斷髮斬指以誓議者始寢其謀而孺人之志得不奪自是含哀致毀以禮自防堅持日月瑩然白璧無點瑕而力撫二孤訓之學以成名養其父母完其節歸見先生於地下蓋始之所遭與共姬令女同而終之所成共姬令女有不及也夫婦女鮮不狎暱而嚴重師儒以訓二孤戒飭禮義以維家範惟從容立於死不死之間彼求者不諒微幸一嘗之豈其未聞程嬰之言下宮之難我非不能死我思立趙氏後彼以我能成事若龍母者其能成事者歟彌留之日大能受命歟幾於達生乎哉彼其心蓋與下報趙宣子一揆矣豈惟報夫而已自龍母能婦而舅姑寬然不重遺以憂孝之屬也舉家數千指累世雍雍無間言母亦內德之茂者足助焉家人利女貞有味乎言之鄉令慷慨而於事無濟是尙爲其易而以難者更遺何人將何以復於世之求多者嗟嗟終夫之事者完婦也終母之志者孝子也今其子才且賢異日闢爲國華者二孤耶是又子與母所以交相成也天使授璧之夢至是徵也夫當月塘棄盛年豈不云促不知其促也顧其所以永也與

鄧與齋先生傳

辛從益

君諱斯沂字浴儒與齋其別字也世爲邑名諸生父諱鐫太學生長厚最鄉里若幼而沈粹穎敏過人授以經書輒通悟十歲從歲貢郭秉銓先生學爲文出筆雋雅郭大器重之甫弱冠以郡試榜首補弟子員尋偕益仲兄淑郵游李厚岡先生門並稱高足當淑郵與益入泮時君已名噪縣庠中歲科試屢超等已

而淑郵以選拔貢太學君舉優補廩膳生邑子弟從君遊者甚眾君既年長於予文名亦較余著甚然君不以後進視予每見輒傾倒相與暢談竟日或各出文藝互商間有指摘余悅君君亦不余怪也君既與淑郵聯姻兼友誼相得每屆鄉試僦舟赴省租寓君必與余兄弟偕余兄弟亦非君不樂也君善文而精衡鑒歲癸卯鄉闈畢邑中知好過寓舍必令自誦其闢文君意皆不甚許可獨激賞余文以爲必中謂淑郵曰兄文雖高不如弟捷之速也是科吾邑惟益幸萬人咸謂君決科不爽云然君竟久困諸生中至乾隆甲寅始舉於鄉乙卯留京刻自揣摩數以文囑予直評予慮其過於勤苦勸少休而君所居邸邸西上房地狹狹而熱所服丸多補劑不宜於暑邸中寓人頗雜或呼盧竟日君不能耐乃夜讀達旦邸人多笑之所隨僕以不諧於眾遣去君益鬱鬱不自得語鄉人曰我若寓辛宅明年必獲雋也鄉人爲余言且以爲顛予始不之信既察之良然乃迎入予舍與予姪教堂同居教堂知醫囑爲藥之君亦不甚肯服也居

半年癰不已然當發時聞予言一道破輒爽然止常喃喃自誦其文謂予曰蒙君前所批某篇某段今已自改矣諦聽之較前實爲精警超脫然自文外其他語則皆不可曉矣蓋性之所好業之所精雖癰不迷如此適淑郵以乙卯公車入都與同廳居見其狀曰噫洛儒信癰矣亟郵書其家厥弟秀濤來迎之以歸歸二年醫不效竟卒邑人惜之君性孝友弟六人皆從君讀一入泮餘皆彬彬雅能自樹立太學公年既老不欲久理家政乃析箸君意不樂然諸弟間有關乏輒引爲己憂或代爲借債不令知也有戚某嘗負百金或勸君控追君不可竟還其券讀書大唐寺見孀夫私泣詰之知爲債家所逼將鬻妻以償君遂同志出金代償之一小婢聘者願出八十餘金君告以此婢愚蠢祇取原價遣之其尙義疎財類如是性恬淡得失不介懷待人甚寬厚然遇同輩被強梁所凌輒義形於色己亥科寓董家塘試畢將還挑夫十餘輩索值甚昂乃另僱他夫至則前十餘人者脅制之勢洶洶行李不得發時同寓七八人皆束手無如何君

體貌魁梧雄傑直前擒其渠渠愕不敢動其黨乃解散去君鄉薦房師爲卜坦
綸先生謁見時見君貌偉益奇之謂才不虛生必能爲國家出力願不虞君一
上公車遽病廢以卒嗚呼以君天性之厚與文行之美皆宜大用於世乃早歲
盛名年近艾齒始一登賢書而又不竟其才良爲可惜意者天祚善人不於其
身必於其後固將以有待耶君之子五人一曰可廷予兄淑郵女壻孫七人長
朝颺可廷子文庠有聲

劉君恬齋先生傳

辛從益

吾友恬齋歿之十二年其孤廷杰等以狀來乞爲傳予與恬齋交最稔知恬齋
最深其敢以不文辭君初名鳴皋字鶴和後改名時耕字學禾一字恬齋君考
雲臺先生以懋遷勤儉起家母楊孺人有子六君其季也少負奇氣倜儻有大
節壯乃肆志於學爲文雄快俊偉不蹈恒蹊稱其爲人大守馬公府試閱其文
甚器之取冠軍入泮歲科試皆高等壬子鄉闈薦未售君陰念得失有數不可

強而昆季相繼去世羣從皆幼弱家事無可談遂棄舉業援例貢成均肯意理
家政撫子姪皆成立今江口諸劉多席先業擁厚貲詩禮維然兼慷慨好賓客
君之力也君勇於爲義乾隆甲寅乙卯間郡守張公五緯飭各屬建育嬰堂君
首倡同志捐貲置田以成之邑向無考棚士子自攜試席坐具出入艱劬若糾
邑中紳耆呈縣尹創建考棚捐貲董其役廊舍堂署規制煥然試者便之其後
郡人改建試院君命姪步雲獨建一棚而躬至郡經理其事工以完固邑中歲
稔米價踴貴民情洶也君倡議聚公米平糶首出貲勸輸輸者雲集邑賴以安
其他修橋架道路惜字惜牛諸義舉君無不與事亦非君不辦也君軀幹修偉
美鬚髯目炯炯有光重然諾喜排難解紛視人事如已事戚友皆倚重之願胸
次軒豁識趣邁凡非禮之禮非義之義介然不肯爲人有感者立勸止之雖嫌
怨不避故人益重君始予識君於竹溪書塾喜君語言俊爽遂訂交焉余官京
師久告養旌里君假館課生徒命子一恕從予游前後幾十年朝夕過從歡甚

此子服闋入都而君以長逝聞矣嗚呼若始當父兄繼逝之餘子姪百餘人以一身支持門戶卒能使一家競爽羣季和睦外侮不生其才有過人者晚年閱世益深見道益熟意氣日益和平顧雄才大略不獲大用於時僅著於家庭鄉里間爲可惜也已嘉慶乙亥卒年六十有八

文林郎謝公謙福先生傳

袁州知府子笠許承家

謝公謙福諱日郊萬載人先世自賴來萬世居寒木橋爲著姓大父其瑯公始舉家徙宜公生彌月父玉松沒母鍾孺人年二十二居貧守節撫公稍長琇也如玉聰穎異常童四年粗通經史塾師袁某大奇之以族人芳德女妻之公既娶婦鍾孺人相與力女紅內給衣食外資薪俸不足窘甚將輟學鍾孺人不許親叔鍾璧寶銓二茂才亦力爭寶銓者郡稱有知人鑑者也門下士補學官弟子百餘通籍宦遊者數人器公命赴學年餘家益困乃棄學爲童子師積金贖負郭田數畝助菽水事復肄業東洲義塾半年方公之初入東洲也院中生童

百餘人聞其六年學來此莫之齒焉越日山長邵鄂秋孝廉摘問後漢書三國志疑義衆多莫對公暢言得失纒乚如貫珠卷入擊節稱奇一院皆驚讀其文已乃歎服時公年方弱冠意氣壯爽有大志不專治制藝摘錄漢唐宋史有關世道可師行者爲史略各數卷參攷歷代兵制水陸舟車馬步陣法亦數卷既三十猶困童子試會孝廉廖荆山帥鄉勇勦髮酋新昌堂兄暢軒觀察參贊左文襄西征軍務知公才先後均聘公入幕公竟以難違鍾孺人意不果往也蓋公性至孝少受書時卽解慰鍾孺人心每朝夕粥午攜蔬食往鍾孺人間賜羅甘輒辭夜讀鍾孺人紡燈側漏四下不先寢一夕偶嬉鍾孺人怒問引咎跪泣鍾孺人杖在手不忍下亦泣而已鍾孺人疾夫婦衣不解帶番宿遞侍累月不倦或竟夕搜覽醫書云先是里多豪暴藉巨族欺壓寒微公奮然曰大丈夫得志於朝當鋤暴揃奸扶危定傾以平兩閭憾居鄉亦猶是耳卽集同志請官立鄉禁以約其爲地方害者豪暴迭起難公不爲動自是寒門弱族少吐其氣紛

難公至輒解邑施某奇寃公偕友白之施將嫁媳以報公怒止友索謝婦得不嫁其行事疎財仗義多此類里人至今多感恩之晚歲爲教子計復授生徒賡志以卒年五十二德配袁孺人順正仁儉知大義敬惜字紙夫沒後鍾孺人壽踰古稀孺人事之益謹課子媳耕讀紡績益嚴而有恩室靡棄物家人大小衣履綢緞澣濯必潔必完外父母兄弟早世無嗣命子擇塋改葬歲時祭掃之濟沂既補博士弟子兩世親戚交遊多知名士欵洽隆殺未有不當意以去者年六十卒女二長適國學張漢標次適職員范崇謨男六長次殤三濟沂四有秋五有名六有聲媳歐陽張陳卓孫二孫女一

許承家曰余於癸巳歲來守袁州扁門試士得公子濟沂所爲文識拔之謁見其述公及先世事甚悉已歎濟沂有賢父母矣余欲館濟沂學適去官濟沂以兩孺人老不能從也今歲庚子濟沂郵狀來請傳予維昔讀明歸熙甫所述孝此事略及國朝曾文正公大界諸墓表竊想見其先世明德而公若有與相類者濟沂勉乎哉予拭目俟公門第之大已

傷增生謝選卿先生傳

稟貢生汪銓訓導受業劉仙濠

先師選卿夫子萬載培生姓謝其先浙人也遷廣昌復徙居贛隆萬間十世祖登俊公與諸昆季師事吉水李先生與其子忠肅公相與紹鄒忠介公之學詩書孝友累葉見推清初高祖仁品由贛遷萬創業垂統帥府君甘谷益事詩書母張大孺人生伯兄奎堂積學入泮而大孺人逝繼配江大孺人生師兄姊太師居幼甫孩提失恃甘谷公以師幼多疾復續配傅大孺人撫養倍至得以成立故垂髫之歲不使力學顧師夙慧喜涉獵諸家傳奇一覽悉記能旁通其說以娛厥心年十八始就外傳終歲之間文思大進由是以先哲自期銳意進取試輒前茅至二十六始受知於吳淪齋宗師補弟子員游庠以後同學避席品望愈隆時吾舅賴澍軒昆季及廖荆山彭子文諸公皆文苑魁傑咸推心佩服引爲至交鍾仲興先生作宰吳川聘主西席賴南觀察袁銘泰亦以教讀聘皆

以親老辭庚子癸卯秋試兩次堂備見遺中丞錢吳二公搜閱遺卷深加歎賞
先後咨送豫章書院肄業又但未果赴祇以親在未遑遠遊故且師學博而精
生平篤於友誼推轂同列扶獎後進常如不及見人有一善片長娓娓稱道聞
人不遺論文不拘宗派雲間西江源流底蘊歷歷如數家珍詩古文辭與樊川
眉山相頡頏著有綠樹山房文稿待梓故以一諸生名震學校者五十餘年講
學里門凡本族及他郡邑爭負笈焉弟子至四五百人頗多成就騰達以去仙
瀛執轡時師年已六旬矣以標標之姿深蒙褒勛並至當其講貫所及抵掌掀
髯令人傾聽不倦是年今上嗣位舉行恩科復薦而不售而豪宕猶昔每澤考
試興會題舉所作亦華實相兼場後榜前持文就決利鈍者聯翩不絕師爲衡
曰某必薦某必售某必前列繼而皆若合符詎意十居高等廩餼莫邀入膺鶚
薦不離席帽文章憎命今古同慨咸同軍興以來衡陽彭剛直公湘鄉羅忠節
公李忠武公勇毅公兄弟皆以諸生從戎豐功偉烈名垂汗青師從姪楊軒先
生少時與師齊名亦以孝廉佐軍務督撫奏徵位至府道今閩浙陝甘稱幹濟
頗遺愛者弗衰師願伏櫪以終豈非命乎師弱冠鏖戰文場七旬後志猶銳甚
一往浩然之氣實由學養而來故雖暮年而具壯心而反躬內省終有優游自
得之懷劉蕡下第但覺諸登科者汗顏耳是區區者不以異其於蓄道德能文
章者曾何加損毫末哉今捐館歷有年矣聞其風者猶復山斗望之仙瀛門下
菲材敢謂蕪辭有當道輒第畧存梗概以俟千百年後採入儒行逸民等篇云
爾師諱堃珪原諱寶銓字玉衡號選卿壽終八十有一子五人悉務耕讀中子
啟宗歲貢生幼承家學最知名

甘肅環縣知縣謝公雲九傳

邑庠生謝培堃

謝公諱夢丹字有濟號雲九二世父之次子也兄弟四人二世父以弟曰吉世
父力學有聲資志而歿與大世父謀曰是不可無後也因以兄繼爲嗣兄生有
殊稟臨事果敢幼時出就外傳有志儒者之學繼以家資效端木肯殖而好學

不輟恂雅篤實見之者皆稱其爲端人也同治丙寅從先君子宦游閩浙用司錢穀而所會計者胥當焉己巳先君子奉左爵帥奏調甘肅特授慶陽府知府兄隨先君子至任佐理幕務經紀有法時回黨肅清蒙爵帥奏獎賞予巡檢魏午莊觀察因是聞兄勤謹廉幹扎調幫理軍務調度得宜甘省底定爵帥保舉縣丞特加藍翎癸酉先君子調署甯夏又以兄帮理財政光緒元年先君子告終養解組歸田兄亦假歸抵籍甫半載旋奉長官催促兄以監創正誼書院責未可貸固辭不出越明年工方告竣又奉魏公來扎始赴平慶涇道署總辦糧台既而總辦甘肅全省報銷蒙譚敬甫方伯詳請譚制軍奏保同知銜卽補知縣旋知環縣事既履其任卷帙紛繁兄惟自矢以清慎勤三字夙夜匪懈獨任厥勞致沾風疾因以卸篆未期年卒於甘肅宦橐蕭然遂至歿無以爲殮喪孥竟無以自存真可謂潔正奉公無所顧恤卽古之鞠躬盡瘁勤勞王家者亦無以遠過兄身歷窮疆備嘗艱難用成薄宦而苦其心志勞其筋骨以喪厥躬亞

聖有言生於憂患死於安樂何舜禹傳膠天降大任臣而成之能見其然而於兄獨大謬不然哉

總鎮銜補用安徽協鎮謝公青雲傳

謝啟宗

謝君諱青雲字有金從兄日忠之子也先祖與吾大高祖爲兄弟由贛遷萬居邑西三區之東木橋君生而穎異貌魁梧性驍捷儻非常家貧未能竟學而負不羈之志任事果敢值咸豐丙辰丁巳之秋寇氛大熾江西糜爛全國震動官司隨在募兵君投袂而起應募普鎮守部下屢立戰功得授五品銜越明年克復吉安江撫部院耆保授千總更隸郭軍門迭次進戰大獲勝仗至辛酉歲遂克復縣縣及建德等城兩江爵帥曾文正公爲保舉守備賞戴藍翎同治元年寇犯徽州君與諸軍爭先陷陣用解其圍爵帥因奏補安徽遊擊賞換花翎二年又與諸軍乘勝進攻羣酋退走江西底定遂成青陽之功爵帥又奏保參將仍留安徽補用特加副將銜嗣復奏獎陞安徽協鎮加總鎮銜是七年之中

君以匹夫從戎屢建奇勲致獲大任不可謂不遇知已矣三年又奉爵帥扎調移師江左方期進軍石頭克復金陵肅清東南詎意年正壯歲將大有爲一疾不起英雄短氣爵帥爲是悵然大息者再特着兵二百人護喪歸家賜錢以葬嗚呼士生於世惟患不用既用矣而天復奪其年以致大勲未集古今如是者不少矣眞所謂大丈夫用力於當世遇知於天子殆有命焉不可幸而致也吾誦昌黎之言不禁有感於君因略述其事而爲之傳

論曰記有云共用之謂勇敢勇敢強有力者天下無事則用之於禮義天下有事則用之於戰勝用之於戰勝則無敵用之於禮義則順治外無敵內順治此之謂盛德古昔聖王所以貴之者也夫以君拔起卒伍之中傑出虎狼之隊又值天下多故設使天假之年將盡其所長展其所抱負吾知公侯干城公侯腹心者非異人任也而乃大功垂成命與心違不獲覩淨洗兵甲之盛可慨也夫

甘肅特授慶陽府知府謝暢軒先生墓表

謝濟沂

光緒十二年歲在丙戌夏四月既望誥授中憲大夫知甘肅慶陽府事調署寧夏府事雙眼花翎欽加道銜謝公暢軒卒於天水官舍陝甘大吏自督撫以下皆奔走祭賻戴孝送柩出郭數里士民遮道焚香慟哭數十里不絕甯夏慶陽兩郡祀之名宦祠制軍譚鍾麟彙具恩任政績奏請宣付史館喪歸明年葬於宜春大水源之蒔蘿塘又十有五年其子博士弟子培堃請濟沂表其墓濟沂不幸先君子亦以丙戌夏四月棄養追思先德連山處士未過歐陽握管感泣不可禁奚能爲公表然竊願述公生平出處大節爲後之人法焉公諱大舒字日長與先君子同高祖先世出明侍郎文申公後居贛爲望族十世祖登俊師事吉水李先生與其子忠肅公友善相與紹鄉忠介學稱隱君子十四世高祖仁品國初隨父元儒公遷袁始爲萬載人公曾祖諱兆傑樂善好施祖諱善菰考諱玉樹均學優品正相繼長於族公仕當咸豐同治之間以經濟文學名聞

於時初舉道光庚子鄉試至京師時穆相國彰阿欲羅致天下士爲己重天下士亦爭欲出相國門下以爲榮相國私使人道意公獨謝絕之下第弗顧文宗登極髮首洪秀全等倡亂粵西蹂躪梁徐楚蜀直踞金陵江西連陷八郡五十餘州縣邑侯李吉言竄邑西民家公聞不避危難夜激李乞師楚撫駱中丞介函先容駱公秉章素重公旋許命劉武慎公長佑蕭壯果公啟江分路援江時乙卯除夕事也蕭公既至倚公運謀籌餉知左右手克萬載會劉軍同克袁州江西郡縣以次復至臨江親疾將馳歸蕭以有妨保獎固留公怒其欲以好爵虧人子職也留書不辭而去蕭公將入蜀又欲與公俱手書謝過駐君寶慶待使者三四反而公至蕭排隊郊迎數里當是時公才輟羣倫績著西南左文襄公心紆六合目睨四海謂天下有十一奇才江省惟公與新建夏獻雲與其列由是名益震未幾蕭公病歿崇制軍樸山聘公入川左文襄公托公赴越公復書左公抗言非部屬不受托應崇公聘至則川首藍大順等逼省城甚急眾洶

懼議閉城公力言於崇公開城示有備仿兵法虛者實之遺意首果遠巡適蜀人以諸葛稱之崇公請奏獎公固辭親老歸左文襄公之得公復書也益歎服公能自貴重因以品正才長奏請天子命調公入浙署理台州海防入閩宰浦城浦素號難治公三閱月平反五十餘大疑獄丁外艱去任吏民有三月政成之頌戊辰服闋左文襄方事西征叛回人於是度公爲文襄所思且不得久於家未幾果復奏公入甘時回黨二股強弱異心文襄問計於公公對曰回人無謀聞大軍至弱者必懼今若撫弱而勦強二回必離強可一鼓破也諸將固請弗撫及戰二回弁力軍大失利卒從公議而回亂始平以功加道銜守慶陽調守甯夏會長官使人說公稍改慶陽清節以潤私囊公告不能於是人又度公且不得久居官而公果告養歸矣蓋公感九重褒嘉之恩文襄特達之知始移孝作忠勇圖報稱初守慶陽郡城新復千里蒿萊公招集流亡給種畜修城堡來者如市嘗單騎問民疾苦聞多狼害卽禱城隍祠而狼跡遂絕在寧夏亦然

文襄稱公治行爲隴中第一呼爲慶陽盤古氏繼守甯夏又以諸事廢弛屬公補救轉後公因裁陋規除積弊立學潛渠以蘇民困而多不便於長官禁罍粟事起長官遂排擠誣公營私文襄初未察意不能無動公歎曰知我如文襄且如此廉吏不可爲矣老母在堂遂吾初志可也卽請卸篆告養東歸文襄查得直置酒謝不往時光緒元年也家居後倡建正誼書院移家藏書數萬卷貯之創吾族軍民祠館於袁城八年而大夫人卒釋服總督譚公鍾麟蒞陝復起公赴隴奏公辦事實心老成穩當且云前任慶陽甯夏兩郡辦理善後事宜悉臻妥善士民至今愛戴又憐公清貧無資赴京復懇今上天恩逾格鵲施留甘差委俟補缺後給資引見而文襄沒之前月聞公復出猶致書愴愴和賀方擬暫調蘭州不次擢用而公遽以疾卒矣公爲人精敏有智畧博極羣書以氣節自豪年十三補弟子員學使鄭公朗如贈聯已有立品自常如白玉讀書何止至青雲之果在蕭左二公軍最久當羽檄紛馳沓來一夕百十起裁答立就悉中

機宜過後人雖精慮不能易所與遊書一時賢傑不樂攀援權貴人著有春草草堂集若干卷皆經濟文章卓卓可傳者濟沂嘗聞諸先君子曰士之所藉藉者愈大則其自顧藉也愈重自顧藉愈重則進禮退義其遇合愈難然古今定天下大難立天下大勲者非得難合自重之士則又不可與有爲而大難大勲卒不能定立於天下嗚呼此蕭左崇譚諸君子所以汲汲三致意於公而公之出處大節可想見矣濟沂不敏猶憶少從先君子得一再見公於時公與先君子縱談衰夜諸公辦軍事及平生知遇輒慷慨起舞有推倒一世智勇意濟沂心已竊慕公才既又得讀公所爲感懷詩大抵皆痛憤時局艱危當路失策益見公倘得遂所願爲於一時則所樹立必不止此而乃以不胥爲輟媚耳目先後失權貴意遭讒畏譏下第罷官以老誠能感寧慶之狼而不能釋羣小之思豈真蘇子瞻所謂能者天不能者人與然而公名不朽矣公皇曾祖皇祖均誥贈通奉大夫曾祖妣氏蕭祖妣氏劉均誥贈夫人皇考誥贈中憲大夫晉贈通奉

人夫姚氏黃誥贈淑人晉贈夫人公妻賴氏黃氏俱誥封恭人晉封淑人子四有容殤有淞修廩生先公卒有淞卽培塿請爲公表者有淞殤孫曾林立均能以詩書世其家公享年六十有九謹表

書學宮雙桂事

韋明傑

歲壬申予謁茸學宮學博徐君董其事薛君蔡君左右之已告成廟貌如故堂廡一新因婆娑雙桂之間見秀色獨挺標韻襲人有欣上而向榮者問誰種之則鄧生文輝移自山中問幾何年則萬曆丙午曾未三十年而老幹新枝扶疎暢茂實可偃覆高可參天其有神物呵護者歟嘗聞夫子手植檜榮枯關世運汙隆斯文興廢我聖祖肇興於至元間久罹兵燹者故根重發盛與初本埒特有異焉則關乾坤洗日月開萬年有道非偶然也而茲胡以雙桂森發亦皆與地俱靈者然意萬士人文其在今日乎遂進諸士而前曰夫采春華者秋則零矣桂不歸桃李爭妍乃於風霜獨秀其色黃其味辛其位兌孕五行之金氣而體其堅凝運四時之秋氣而同其華斂蓋示諸士以芬華就實之思也是故不可以不植也抑又聞之桂枝之下無雜木取桂屑敷斗勻布砌經中草經宿卽萎今天下喙噪爭鳴人立一赤幟家立一標榜聖道榛蕪不墮於仙卽墮於釋甚且墮於曲學逢世得是桂老辣之性爲之關榛塗掃畦徑使凡芳艸卉無敢與爲伍者聖道其如日中天乎是又不可不植也然道嚴而寬教惠而普夫子木鐸萬世其提撕在文字其接引在精神上自搢紳先生下至耕夫牧豎無論得解與不得解其靈明所入靡不沁以天香而滌其穢臭況諸士林沐浴元化寢息此中借彼津筏闢我性靈解脫語言文字人人自有夫子語不云乎如聞木樨香吾無隱乎爾則桂豈在樹哉尙是說而存之鄧生知植桂當知所以植桂之意也而第俗之所期香飄雲外種落人間爲廣寒仙本爲郊林一枝則猶有功名之心淺之乎植桂之意矣學博諸君解頤而笑曰有是哉桂之爲義大也請因以紀之遂勒諸石云

書孫孝子事

辛辰雲

老友周茂才融孫爲予述孫孝子汝淑事其悉非有卓絕奇行可驚世駭俗者也第循服勞奉養之常而返之爲人子心若未能一日盡非真誠所將何以至此汝淑居大關嶺東幼隨父食力椎魯人耳而至性甚著父歿事母胡愛尤曲致寒爲烘被捉蝨暑則扇枕驅蚊旬三日必翻掀蓐薦令鬆軟終母身無少間母或有故含怒長跪爲解至於涕泣霽顏乃起稍違和憂形於色餐頓減終夜侍內寢不離母安然後復初鄉有白馬廟每朔望鄉晨聊具香楮祝親壽雖嚴霜盛雪門未收肌粟以俟家僅溫飽出必袖錢施丐遇小爭競卽用以解紛釋穀必減價有虧短聽自補償不復索點者故火竈以惠之自若也意蓋爲母資福云母喪面深墨三日始粥不讀禮經而關輿之合其爲子如此此非至平無奇者哉然而行之實難夫孝本庸行其奇行卓絕皆不幸遭其變者也必以奇行爲孝是爲頑闇有聖子義慈竟無佳嗣也問安祖膳之世子何以云此孝哉且遭變或出強爲奇行容可僞飾爲處順而行其常出乎心之不容已行乎天之不容僞不容已故不待學問不容僞故無間終身人人可爲實人所不能爲斯乃真孝可風耳余故樂書之以風世之爲人子者

書宋孝女尋墓事

辛辰雲

余族樹瀛公配宋氏大學生寶之女生而失恃寄養外家郭寶好游恒數年不歸母之祭掃闕焉氏年十三思以時展拜而未知墓所日夜涕泣夢一婦人撫之曰無慟吾在郭村某山皆偕季舅往斯得矣氏覺知其母也如言往則邱壠已平荆榛繁蔓肆蒐無端倪日將暮舅強之歸痛哭坐地誓死不空還山下田叟怪而問之因詢其葬時畧指以處斷碑埋首微有跡起而剔之姓氏儼然乃封樹焉迄今歲祭兩家無關人稱宋孝女云傳此事者不一或云白鬚老父爲指墓所倏忽不見其說近誕此據氏內姪瑞齡述宜可信昔范從規尋祖忠宣墓不得望祭悲號天爲降雨露竭以今視之通夢通天誠孝所感一也而得之

幼女尤難故特表而出之

韋侯邑志跋

明知州邑舉人辛敏道

是志之修也有名公巨筆弁於前已得作者之意而揚抗之余何敢贅一詞顧萬之有志者權輿於成宏增葺於嘉靖代不乏成書亦僥倖修倖廢致令文獻莫徵丹鉛無主迄今九十餘禩一旦屬其成於侯振一邑墜典然後知侯之七年不遷天故留之爲予萬垂不朽之澤者也夫昔之涖茲土者豈無志薄鷹鷂者乎然而未必皆鸞鳳豈無寧爲保障者乎然而未必皆丹鐸又豈無寓撫字於催科者乎然而未必皆陽城比三載考績卓犖者固超次而升循資者亦秩滿而擢獨侯七年於茲三善十奇數登薦剡兩隨計偕蓋跨丹鐸軼陽城而獨以鸞鳳枳棲於彈丸凋瘵之邑如此其久也甲戌春主爵者條上治行卓異悉奉內召而侯與焉萬之民拭目踴躍金馬之班烏臺青瑣之列矣竟以逋累留滯至今夫惟歷年多因是閱歷熟而諸練深凡山川之險夷戶口之登耗徭役之繁簡人文之衰旺士習之貞邪累代之沿革廢置民間之澗微痛苦靡不悉其腴理載在民隱諸刻若越人之洞見一方以故隨事編摩臚分縷析成一邑之書勒千秋之鑑俾後之人得以按圖索驥探賈得方真適治之指南而救時之鍼砭爲予萬垂不朽之澤者也今聖天子銳意吏治詔求天下郡邑志此志進而垂乙夜之覽必將曰萬之洞悉民隱如此何憂吏治哉異日徵書且至曰予爲萬得人此志其繡矣予故曰侯之七年不遷天故留之豈無意乎若夫摛撫品藻幾經校讐閱陵谷之變遷痛江河之日下發前所未發增前所未增則固屬比司馬而雁行董狐矣諸名公已能道之予何贅是爲跋

韋侯志跋

明知縣邑貢生鮑紹湯

邑有志猶國有史也國非史何以統異而致同邑非志何以徵往而俟來顧史之法在略非好略也採摭難實真贗難核不得不略也志之法在詳非好詳也蒐羅宜徧收錄宜恕不得不詳也有能於非詳非畧聞而邑以志重志以邑傳

者乎若輩侯青岑翁吾邑之志是已吾邑稱巖邑實疲邑也侯縣名進士莅茲
土下車以來蒿目時艱束於功令思欲寬撫而不可得當路之索解甚或小民
之供輸愈期朝夕持籌斲七靡寧獨能於簿領冗沓中作詩文若干卷尋且緝
閱舊志歎息嘉靖甲辰鏤布迄今九十餘禩世數既遠遺事實繁私念館符七
載此志不一重新之曷以令通邑生色而政教不幾頓乎因是召諸鄉紳暨弟
子員并耆老有知識者進而論之若謂今昔殊時修繕有待曩山川之勝復宜
洩幾何人文之美復映發幾何貢賦之納復加增幾何政績之善復興舉幾何
高逸名藝與孝義貞淑之可嘉賞者復流傳幾何各以所知見無滯美無索癡
不次而陳之侯受而覽焉自公之頃不厭猥瑣不吝心月之力俱手自刪改自
訂正自繕草以付之剞劂與過疑寧過信與過廢寧過存用意忠厚真得善善
從長之遺大要出於詳而要亦不得不詳也志成是可徵往侯來矣抑侯之成
是志也詎徒肆漫書示整暇以備近代之偉觀已哉亦惟曰吾且夕脫離夫而

後之宰是邑者閱若志常必有灑然道然親自勸以鼎邑人觀其美則反是者
醜矣居官者務跨軼前修貞教有方董率有條引之康衢大道以爲民計待治
者務力追雅道急輸公無煩官府督責而侈者變而樸澆者變而馴悉恭飭振
起以自爲計俾山陬增美戶多可封人多君子允成醇龐景象侯之意在斯乎
侯之立言與德功並垂不朽亦在斯乎至若侯之苦心焦慮恤邑仁邑者具在
民隱六刻中邑中父老子弟戴侯誦侯者具在德政錄中茲不復贅湯黥淺非
能文者因粗述其概以復

壬辰邑志跋

郭大經

右新纂志乘三十卷蓋邑侯衛松甫楊肖巖兩先生屬經偕同志輯而成之也
邑之有志爲一邑公論所由定卽後世公論所由定成於一手實難集眾手爲
之苟或依違涉私公論曷定哉斯志之輯就舊志所存者修其蕪而歸於簡明
飾其俚而加之潤色其他生傳瑣事譜序壽詩輓章諸以失檢貽譏者概從芟

易舊志列錯者取證史書亡軼者蒐宋嘉定等志及直省各通志先正諸集補綴之要其論之所定悉以程中丞刊發章程為準式存乎其公詎能徇乎人之喜厭非經與分輯諸公有所矯異於其間也誠不敢沒一邑公論以存後世公論而已後之博雅君子覆跡舊志諦審斯志當必有共諒此衷而仍存公論者不無厚望焉道光十二年秋七月

同治辛未志跋

邑進士辛孚德

志之言記也書之於版曰志存之於心亦曰志志不一而能存一邑之文物典章未之有也萬志自雍正迄道光凡三修客歲中丞劉公將修通志徵乘於邑金翁雲明府屬德續輯以謝陋辭不獲於是披讀舊志見者據之精紀載之確前人所編已成善本踵事而增固自易易所患人心未洽意見未融有所窒礙耳因與同事折衷至當一以中丞刊發章程為準規模粗定而德供職入都雖遠離桑梓未嘗不惴惴焉恐其志之未合而事之不成也今年春諸君計偕來

京告後曰吾邑之志成矣而慮其難合者今竟合矣夫人心之萃渙九事之舉廢所關今吾邑人舉曩昔齟齬之意渙然冰釋和衷共濟以求其成可不謂眾心既萃政行見正人心以正風俗宰官師儒表率鄉閭以仰副盛朝斯仁摩義之雅化康樂和親睦嫻任郵且上而登太史之書矣豈獨志乘之善云乎哉至於斟酌舊志補輯新編則諸君之力為多而德亦獲附名書後不亦榮乎因僭綴數言歸之以志慶辛未仲夏謹跋

重書黃子中澄波堂記後

元虞集

君子之所以大過於常人者以其有量也所謂量者容納萬事而不以為難酬酢萬變而不以為勞世不見知而不為之愠時見用而不為之厭富貴利達貧賤憂戚無一足以動其心而區區簞食豆羹蜂蟻之螫破釜之失而愀焉以動執焉而不化者又豈足以語此哉是故斗升釜鍾之分瓶甌甕盎之盛一受形而不可易器之拘也而人也稟天地之粹精而最靈豈無擴充之道哉是以昔

之言量者喻之以江海而不足必準之以天地焉嗟夫常人而望賢人賢人而望聖人豈易至哉然而其得於天者無不同也而心之限量虛明廣大亦無不同也則君子之所自進也蓋必有其道矣故又有言曰識進則量進量之狹劣由識之不明也識不明而謂之量者漠然於事物之應無町畦無畔岸而已矣是故又有言曰考索而得之者多窒明睿所照則廓然而大公明睿所照識之至也是以求諸聖賢之遺言涵養省察而自靖焉有以擴其心之所之則庶幾矣萬載黃氏之先以澄波名其堂余嘗爲記之其子盅子中自其少時受學於臨川先生之門蓋有聞焉於是又欲余廣澄波之義故爲之言如此乃作而嘆曰昔漢東都世運否塞大往小來陽微陰盛大夫君子不勝其忿起而救之名節相先九死而不悔介特而嚴固猶懼小人之不勝也而叔度獨有汪汪之量爲世所咨嘆至以顏子目之當時諸賢信之不以爲過後之論者傳之不以爲非而畧無一事之跡可以推見於史冊其爲人也何其高遠深微也哉昔者顏

子簞食豆羹不給於陋巷而夫子語以四代禮樂孟子曰禹稷顏回同道此豈以其跡而論者乎惜夫叔度之生也後不得見夫子而親炙之以就其所至而論定於孔門焉嗟夫子謂回也終日不違如愚退而省其私亦足以發回也不愚觀乎叔度澄不清而撓不濁也誠有如愚之意焉然而顏子之所發當時同門之士固有未盡知之者況於千載之下吾黨小子乎由此觀之叔度之所以爲量其有所不可知也夫其有所不可及也夫而其可知者孔子之於顏子始終以好學歸之學者學爲聖人者也周子曰學顏子之學過則聖及則賢不及亦不失於令名子中以所聞於臨川者而盡心焉澄波在其中矣 采學古錄補

書辛君映斗請減瑞袁浮糧後

尙書義寧進士萬承風

世祖章皇帝御極之十年命入覲吏陳地方利弊江西右布政使莊公應會巡南道僉事安公世鼎以瑞州袁州重賦告天子下其章於大司農令量吏覈實

以聞得恩旨減免於是兩郡七邑之民莫不含和吐氣頌皇仁之如天而深感二公之能承宣乎德意以布於下也乃其事之謀於始以善其成者實出於萬載幸君方二公之入覲也蒞江右未久不習知民間事疏甫屬草君前請曰在官言官禮也盡請減瑞袁二府浮糧乎莊公固深知若安公亦以莊故同聲曰若何君袖中出一紙本末粲然二公矚之疏於朝閱一載而果如所請當是時微君言幾無有言之者既而中丞檄郡縣覈元明糧額二郡士民執志乘爲左驗而袁州在前明時有大勢力者宜早請請宜無不應中丞詰袁袁之民無以辨事幾曠矣於是君乃得比校法蓋袁屬邑與吉安之安福臨江之新喻鄉安福新喻田三則上則之糧僅及袁之半袁田惟一則磽确不肥地醜而租挈重徵課或乖昔準中丞允其議繡使君無任事之才度務之智襍被從使車後輪籍計帳連餘懲負枘鑿其言言也或未必聽卽聽矣而中遭貶詰不精司會叅互之術瑞賦減而袁賦未必果減也君之見理明而處事當卓然有賢士大夫

之風矣是舉也君由已賞三百金爲勾當之費事賴以集厥後有議田分三則加丁糧者卒以前議莫可增益而止君之力能除前三百年之害而利且被於後百有餘年昔陳宜中之先爲吏常以利物爲心缶投一錢後遂不可勝計孰若君之一舉而眾善備故宜乎後嗣之益昌而大也君名映斗字鼎卿袁州萬載人其他行具家傳余不復書書其請減瑞袁浮糧始末如此嘉慶十六年辛未仲夏月

學馨堂冊跋

邑主事辛亨德

己巳春鮑君鍾瑞持學馨堂冊囑予跋其後予讀是冊有名公巨筆弁之於前取捐建諸公之意而發揮之奚俟予之贅言鮑君曰聖誕致慶盛於江浙江右惟樂安縣首先奉行他邑尙多缺略是冊之刊所以記往事而風將來也願得一言以爲勸予思神廟香火佛門供養皆以福田利益之說發動人心求之者多故奉之者眾至於聖人則祈禱有所不敢祇以立人之極理所當尊非

若求神禮佛之出於冀幸也向非有所觀感人心曷由奮興乎昔臧榮緒以庚子日陳經拜奠史傳書之膾炙儒林然止一人之事尙未能以一人之誠敬使千百萬人得藉以抒其誠敬維典禮於不敝也今鮑君於文廟革新之時捐錢若干繕祠復倡捐田畝又有郭君如衡如磐捐田若干把踵起應之宋君鳴謙鮑君承宜相繼捐貲而文廟香火聖誕祭費及增修祭器得以概舉俾一邑之士於上丁釋菜而外瘡痍沐浴駿奔走執豆籩踴躍濟濟如升闕里之堂而效陳經之拜是以一人之誠敬使千百萬人得藉以抒其誠敬也較之新廟宇崇寺觀以有用之貲財興無名之土木其爲人之賢否若何也章程契約詳載是冊井井有條行見散布各郡縣聞風興起共襄盛典以仰副聖朝尊師重道之雅意將以是冊爲號召焉是又諸君用心之深且遠也詎曰人之欲善誰不知我予故樂書之以爲好義者勸

濟渴堂跋

邑廩生劉履安

曩者安先君與堂內諸先輩聯金若干以興此郵亭驛站烹茶止渴之舉名其堂曰濟渴自嘉慶六年迄今道光三十年已閱四十九載其開始進斯堂者五十五人頂進者十八人續進者十五人各一股共成七十股但股中前輩存者少而沒者多甚且徙居靡常聚首維艱每當虔祭先代茶神及妥同堂先靈各後嗣或不來其來者必待詢及先世而後知其爲某前輩之裔諸君子懼久而難稽也爰商立冊以紀七十股之人標其姓名詳其年齒錄其子嗣俾來者彰彰可考而凡一切堂內條規與夫所置田宅店房各契據亦皆附載至七十股之人之里居行事祖父孫曾則概從略蓋修冊非同修譜其體固宜如是也舉也始濟渴於東一路而繼及於西其南北兩路將次第而漸濟之耳冊成安承諸君囑而紀其實於後至先輩起立斯堂用垂久遠其公善無窮之至意并冊諸序言之甚詳茲不贅

鵝峯詩草跋

清李榮陞

詩之作也矜其富不若率其真行滿天下歸於陶冶性靈而已乾隆戊寅予就館城東與愚鼻峯近汪子濟川作楫頻過晤語予曰吾不赴近人許壇於詩不多作亦無留稿也以是轉徵其可詩然君蘊出羣之才以經務鳴於縣惟瘴山水與予同重九日偕宿檀下辛象川館攜以登城南天馬之山四顧愴然曰吾其終老窮山乎久聞廬山名勝多地主宜得附遊以抒吾興明年秋闈畢遂相偕下舟章水屆朱溪風阻起陸一火夫持被間關山之南山之頂十餘日隨興留詩返舟會城值揭榜以予獲售經理旬日而歸比予通籍南北獲覽佳山甚衆於匡廬亦環繞不一未嘗忘舊遊而君去世矣前歲歸里屬其族賢崇納曰君家某叔吾忘年交也遇未酬其才在昔縣事糾紛君率二三同志爬梳就緒邦人士咏之其勞動委曲恐久而易渝願得自臚一切并所雜著讀之既而其家有所避僅將詩稿來予反復再四喜其意新而不涉於浮詞愜而不墮於俗性情夷然盡洗酬應誇夸之才筆墨間時露山川光氣陶冶至此卽詩亦足傳生平矣君晚歲息影鸞峯間一附壘樓至都門覽宮闕之壯賦詩云含情默欲教三呼歐陽公所謂老而志不衰深可念也此編前半皆戊寅己卯之作早以相示然今稿中訛字乃多又脫去孝服僧黃品二首記憶之餘悉爲補訂完好併予同作二首附後他年有續廬山故實者或不遺焉丁巳季冬

湯克勛

浮收控案遺卷跋
克勛先世以稼穡起家至太太高祖嘉祥公遂富於貲太高祖佐安公兄弟五而大高叔祖佐臣公序居三性豪爽不屑屑於名利輕財仗義有朱家郭解之遺風控縣浮收稅糧一案其舉筆者昔在專制時代控告官府談虎色變當公投稅時反對浮收責其不應指官欺詐駁詰無效忿然去以計獲印白簿兩本足爲浮收鐵證乃一控再控至監司督撫不直不休既奔輦轂下卒達天聽而知縣革丁書杖徒而陋規除糧戶普沾實惠矣曾聞諸先人循事之亟也雖犬不寧舉家惶懼則相向泣公曰耗貲事小盡吾分之所有雖鉅萬亦足以

文大丈夫作事當磊落光明鼎鑊甘之不相累也今觀其控告之波折處置之
縝密其才識有過人者克勛景仰之餘屢欲將遺卷付之手民用垂久遠比以
飄零蕩析書籍罕存幸邀在天之靈得先伯父晴波手鈔本適鄉前輩蛻庵
先生編次縣志克勛經理局務以是相告亦謂宜排印以垂後世而塞弊端並
爲之叙孰謂百數十年之往事重顯於今日不沒先太高叔祖之苦心耶排印
將竣謹誌數百十字於簡末是爲跋民國二十五年春月謹跋

檄交夷黎維潭文

張璧

爲夷情事先據思明府土知府黃承祖揭報安南諒山宣撫司黃廷愛等牒呈
內稱黎氏孫維潭統兵復國擒斬都統莫茂洽收獲印信署掌監國今差宣撫
榮國公黃廷愛等領兵追捕莫氏遺族及招撫地方本國民盡皆歸服黎氏乞
爲轉達等情遵宜撫司所牒呈該府呈文申繳到道爲照莫氏乃天朝封賜印
章世爲貢屬恪奉正朔未見有何罪狀黎氏果何人斯輒敢與兵逼殺揮印受

成似此亂臣賊子誠國法所不容天討所必加者但據牒呈思明府公文不出
自監都統印之黎維潭而出自諒山宣撫黃廷愛不由南關正路達之督備官
而由私隘達之士官黃承祖則真偽猶未可必若遽與師問罪誠恐濫及無辜
且當時諸司勘報稱黎氏俱已盡絕今日又焉得復有黎維潭者出哉即黎氏
果有後自當感激先朝曲赦厚恩安守臣節一旦弁髦王章公行篡叛法在無
赦除呈三院會題候命調集京省土漢兵征剿外合先馳檄宣諭該國臣民若
果能悔悟篡弒之非改圖自新迎歸莫氏納反符印退守臣節縛出首事叛惡
送赴軍門請罪庶城中生民可免塗炭爾等官屬亦可保全首領如終執迷則
天兵雲集威震山谷區區小醜如探雀雛本道念切爾曹夷獠無知忍令自貽
伊戚合先開諭禍福反逆爲順在今日舍存即亡在今日幾介微茫毋貽後悔
采連城集補

存龍河書院十三經牒

武穆淳

余承乏萬載已期月於地方利弊興剔慙無毫末補惟得從書院諸生童屬朋友講習之業是殷殷也茲屆受代之期爲捐廉置善本十三經注疏全部鈐印牒存齋舍俾諸生童誦復講貫期爲明體達用之儒因之留語勗勉曰古人三年而通一經窮經卽以致用漢儒去聖未遠師傳淵源訓詁有自宋儒倡明理學而朱子未嘗不以道學問爲宗惟明人衍諸錄空談直欲舉聖人刪定續修粹一生之精勤思以貽教萬世者皆可度架高閣廢爲無用之書良足慨也我朝經學昌明御纂欽定各經說直接古聖人心印今學宮已頒有全書惟注疏卷帙浩繁虞有無力購藏者故以是書餉之諸生誠能從事於訓詁之學其於禮樂制度名物象數之委竟皆可就是而瞭如指掌物格而后知至宋儒誠正之學不外乎此推而至於治國平天下之道又豈能外乎此哉尤願有志之士由經而史而子集逐漸購藏用以擴克見聞將見士盡經明行修人鮮空疏無用未始非余有以畢其端也余用是不能不有餘冀於陽樂之人士矣道光六年仲夏月

聰思堂解

明葉 璽

石堂龍子善一日持瞻思堂册事狀以請云以仁失母壯失父次第寔歸結廬於墓時邑侯義成劉公清江張公暨庠師鄉英咸夜之詞扁其堂矣世人羣而議之余因其請愧弗能寫其心姑爲之解人之議者曰而過爾矯情爾近名爾且飭於昭肆於冥爾夫割股廬墓賢者過之然吾觀世之戕冠方屢誦詩書師周孔者或於其親不能無違言臨喪無戚容既葬置之無復徘徊瞻戀之意此孰與子善之過乎曰矯則矯耳獨不云習與性成乎矯而至於父母之喪悲號數月試設身孺慕不已難乎若曰好名也非有意爲善乎古之君子篤實而務名今之君子徇名以就實實至而名從之正惟恐其不好名亦何惡於名也而至於匿瑕飾瑜之說益刻核之論矣子善之爲是舉也非人強而迫之非法制而繩之胡不可徇俗而必爲此者非真心自不容已乎克此慕終身焉可矣

議者又曰孝必有徵古之人若王中楊惲華秋輩皆因廬墓動天地感物類龍子之孝天亦何靳而不徵之以祥乎噫孝者天之命人之心也君子盡人之命以立天之命固不以祥不祥爲加損也古云和氣致祥離則不祥莫大焉吾以人子順親得親苟其心一毫未協皆君子所憂爲不祥者舜底豫而武周無憂乎文考非家之祥乎乃曾子易簣破手足而呼小子是又不以死爲不祥而以全父母之遺體與無憾於分義之爲祥也子善邱園自珍顯揚未遂一出言舉足兢兢焉存冰淵之恐以無貽憂先人明發式穀繩繩振振休微孰與鳩鬼甘露親喪所自致區區物論固未秀之風行高之疑惡足爲子善重輕哉嗟嗟世人盡子善子善不足稱子善不多有而不予善者可愧可報而何暇置喙也子善勉之

黃璧元瑜字說

元吳澄

玉之爲器不一也有圭焉有璋焉有琮有琥有璜焉而禮天必用璧則璧之視他玉尤爲貴昔有一璧當十五城天下皆欲得之而不可得者蓋非他玉所能同也萬載黃君名璧而字與其名不類予爲更其字曰元瑜瑜者玉之至美也非至美之玉不足以成至貴之器元瑜之質純然粹然無瑕可掩無垢可磨接於人者溫如斯可謂之瑜也已所成之器吾知其宜於禮天也吾知其重於連城也質之稱其名者夫坤人有言天下之寶當爲天下惜之信乎人之貴乎自貴也元瑜爲轉運司屬官持身謹潔異儔輩家素豐殖視身外物有之若無漠然不以動於中其能自重也如是所以全其美成其貴者又豈常人所待而同哉予既更其字因爲之著其說而俾異乎元瑜者知所勸也 采草廬集補畢侯開荒圖說

知縣邑選貢鄭邦德

萬載窮鄉也田多亢暵而租人有限地且僻陬而穀又難通以故輸納不前逋負日多況與異境相連貽累荒歉種種難舉如西鄉洞嶺連接瀏陽之東鄉大圍山烏虎洞黃石洞盜巢也其田瀏陽之人越境而占萬載之糧曷自而輸此

民之大患存也再風嶺山書堂白水離縣遠田率荒蕪民皆逃竄田之荒者
愈荒糧之欠者常欠又奇圃竹渡橋墩高城深田皆亢陽無水之區雖日有事
於耕耘而不能享夫粒食畧觀數處自昔爲患使無道以處之不知後之狀何
如斯土斯民曷由而濟乎我侯勞心焦思事爲之所曲爲之謀或捐俸以給牛
種或貸錢以立甯車或授之役差以爲抵銷流移者招撫之失所者奠居之民
樂桑麻之境還買犢之風桔槔有聲刈穫相望立一時之規遺萬世之利以視
唐張全義開關中蕪地者同轍也宜圖各處地土之益以昭示不朽云
篆筮館聽鐘鳴說

譚經濟

鐘之鳴必視質之大小以爲鳴之遠近擬升之鐘崇尺之磬擊之使鳴近不過
聞一室遠亦不踰百步非擊之不力聽之不聰也其實小自竭其聲而不能加
耳若萬石之鍾則不然小擊之則鳴聞數十里厥曩之山不能蔽茫洋之江不
能限掀天撼地之風不能逆之使返蓋其實大鳴之遠自如是也豈惟鐘哉鐘

以聲鳴人之鳴不止於聲也上者以道學鳴次者以功業鳴又其次者以文章
詩詞鳴或鳴於當時或鳴於異代或鳴於無窮與天地相悠久何莫非由實之
大小爲聲之遠近哉外此或以酒鳴或以琴鳴或以刑名鳴或以術數鳴他道
鳴怪僻瑣碎不足數也然則由鐘之鳴以求人之鳴其近其遠緣實詣何如耳
顧鐘之所以能鳴遠者人知聲之出於銅不知銅不自以其聲鳴也曠歲累月
以揆之積之既豐則又百煅百煉去其似銅而實爲銅累者或三取其一十取其
其五然後冶之鎔之納之於範圍密其外洞其中又鑄之以牲而鑿之於高虛
而後聲山焉否則銅與瓦礫無別聲且無安能鳴遠哉知鐘之所以鳴遠則知
人之所以鳴遠有自也余館淨安山房盈盈一水之隔清夜聞鐘洋洋盈耳因
題說於壁以爲有志者勗焉

蝦源老人說

湯肇熙

蝦源老人者無姓名兄弟二人行乞里中予幼時及見之年皆三四十身短僅

如小兒以其貌古故稱老人以其居地名暇源故稱暇源老人有廢疾相若聲
音面目並相若乞以嗽其一以手持竹爲節其一曼聲和之歌已則仰視人而
笑與之食則又兩自視而笑笑而食同一碗一箸兄一食弟亦食兄再食弟亦
再食見者以其如孺子狀則亦無不視老人竊笑問之老人曰吾無父母妻子
無居室以廢人故無他業業惟乞乞惟兄翁出入坐卧風雨陰晴未嘗不同里
中哀而憐我亦未嘗不飽然亦未嘗獨飽也嗟乎使世皆如此乞豈有不兄兄
弟弟孝友可風哉夫世非不知孝友之貴也大抵利欲累之耳古者大功同時
自秦人子壯出芥天下後世寢沿爲俗於是乎小而錙銖之必較大而爭奪之
相仇其故有不忍言者庸愚無論已卽儼然名士大夫覈其內行且不無可議
豈大丈夫讀書明道竟不若一乞人哉彼乞者渾渾噩噩怡怡愉愉不知有利
欲惟自率其性情故也此純乎其天之真者也吾觀古人累世同居號義門者
和氣所感有百犬同牢一犬不至累犬不食之異夫人爲萬物之靈涵濡禮教
之澤乃至以利欲汨其天性則乃有愧於乞亦且物之不如耶老人老後不知
所終或曰其一死其一遂不復乞亦餓死

請赴吳公講堂課啟

辛炳喬

吳公講堂者前邑侯崇祀名宦故海豐進士陞任河東道吳公克菴先生造士
之還也夫其延陵華胄康樂好官拒書使於逆藩銷鏑鋒於危難義旅有知方
之號孤城免陷賊之虞固已報在馨香蹟詳志乘矣若其恩隆矜佩化溥絃歌
聞別館以廣生徒育英才而宏獎勵稽經誼史句讀親釐說禮言詩藝庖賜飯
慈惠既深於保障栽培益切於師儒故爾時丕振文壇而後世常留講院雖復
仙遊鳬鳥僅遺雪跡於鴻泥家道桐鄉空戒手攀於棠樹而推德化者祀文翁
於石室緬教思者奉李渤於廬山豈其俎豆猶新淵源頓杳者哉所以凜承訓
指珍奉文規雖陳迹久移而新宮別構歲時展祀既修釋菜之儀朋友輔仁尙
闕會文之典夫家祠義塾亦有課程鄉闈精廬不無甄勸而令層城月旦莫並

龍河茂宰風流空存槐舍非所以推揚教澤廣收士途也於是誕日告虔同人來會宰官拜後紳士座中因支用之稍舒課均財之必當僉謂擇英髦而肄業則惠有鄰周絳集課以普旌則義尤盡善爰抒新意本年爲首甲之科更定前期五月展中天之節比流觴於曲水畢集羣賢追奪錦於文標纔逾三日約以仲夏初八闔邑本籍茂才講堂會課自行備卷先報芳名奉學師以鎮息囂浮相與如臨監史請宦達以商量得失庶幾先覩星雲伏冀鄉城彥士遠近鴻才不憚光臨相邀社會餽饌聊飽敢言夏屋之餐經籍有腴同聽春蠶之葉蓋造車合轍難獨信於閉門華國聘珍必先徵於待席雖寬寰仙詠知音豈語於折楊而雲錦天襄麗製爭看於倬漢與其褐懷璧彩一卷自矜何如地擲金聲千人共見至於街華佩實清麗各殊異曲同工宮商自辨陳思王好人譏彈賈浪仙待丹推敲不虧量斗之才無損薰香之供有冰柱雪車之句何妨壓倒名流無容刀墨水之嫌書許沉酣試席縱使王前盧後略下雌黃肯教魏竊邢偷罔

分皂白長盡一日無須擊鉢之催藝角先秋必有泥金之捷所望稟經酌雅抽秘騁妍各矢元音並揮魁墨興酣落筆文峯之塔影如搖氣逸冲霄奎閣之神光欲爛天荒愈破三元非仙路之登人傑可憑先輩有前旌之導三千字金門射策恰待揚眉六十年甲榜輪科最先刮目務使格岡翹羽預騰吉士之聲先教桂殿芬香隱慰賢侯之意若乃霧雲隱豹風雨奉龍當年舟送滕王捐俸賞芳掖助茲者縑胎皇甫體懷聊壯文行雖案之青瓊慙美人之繡段而絲酬黃絹配學士之青錢此則珠玉報師益廣培風之澤錯刀留贈專希染翰之雄者爰同候文旌共成雅集於戲俯筵瞻楠記菁莪育士之心摘藻據華爭桃李春官之種奏祥雲於大史他時羣宴杏林近珠氣於文昌此日名書桂籍又如舞雩穉齒嘯詠能偕芡葉芳齡薪樞必採乘時立志正在問年餘力學文先於入塾趁火樹銀花之看飽絢爛成章借金尊檀板之興豪縱橫試筆別以正月廿日報名赴課一如前例謹啟

高岡雅韻引

明范以淑

萬載鳳池劉君以名家子聯姻王室秩祿下大夫歲食縣官租稅稱驟貴矣而爲人溫然如玉恂恂如儒生雅有聲後深間方三十壯耳而諸文人客卿各爲歌詩慶之既而出以示余請數語弁端夫劉君者不以翠釜具列娛其口不以輕縑文繡華其躬不以螭首蛾眉悅其目不以過雲落塵逸其耳不以怒馬雕輪適其手足襟度迥出常人而惓惓於聲詩之是求其人中之鳳乎詩有之梧桐生矣千彼高岡鳳凰鳴矣千彼朝陽今劉君際聖天子龍飛之運從容來儀視枳棘之栖奚翅千里較秦臺當復勝之而諸君子之作皆離離大雅鼓宮鼓商靡不叶應卽蟬陽之桐音不是過也余乃艷羨之而以高岡雅詠名焉第余乃以春蚓秋蛩之鳴先之能不辟面因附諸君子質於劉君以爲然否

茅竅微聲引

明學正邑歲貢龍愚卿

按各字書無竅字當作竅音竅空也俗名叫與竅異辛觀濤校正

予爲兒時見羣稚輩戲逐相競選茅管之巨者截其兩端長僅五六寸許剗剗中實修其膚之完而空竅者以吹之屹然有聲鏗然悲壯仍宛轉抑揚高卑亮節與笙篴相似不能附響於樂府也及予頗知向方尋繹章句餘暇博採古韻三百篇無論已求其所謂漢魏晉宋之乘宗既又究盛唐中晚之法律穎悟未透識趣未真如羚羊掛角無跡可尋如靈龜出水無蹤可追於是研精覃志搜元剔遐而根極理要刻苦煅煉尙齊樂殲或因事寓物或感愴懷思凡一切發揚蹈厲諷誦比賦咸欲其體備文質情兼雅怨然而明暗異姿靜躁殊形賢愚有常類拙訥相倚薄以故格體卑俗氣調促迫竟未能脫越舒徐卒廼翳類蒙昧短息膠固雖學步藻林苦覺邯鄲之刺謬效顰藝圃徒窺西子之精神大都興象泯迹風骨詮落熒惡弗暫勸懲曷由而昭耶是以未敢擬古作者姑自爲一家言牒帙成叶揮毫積韻殆猶茅竅之聲弄戲於小小已爾因櫟括取譬以茅竅微聲名篇豈曰詩云乎哉嗟夫俯仰物情流連景耀頻觀法於大雅未半

解於小乘登高日昇行遠厭邇信乎作者之難也予不才攻玉於山石速戾於
鼠璞不愧譏陋狂僭益甚庶幾大雅君子萬一矜吾志焉可也是爲引

零丁引

邑廩生辛金澄

族人聯珍字惟上幹練才也康熙甲寅長沙告變大兵屯劄於萬勦平後誤擄
聯珍去其子受質才十歲至孝性成日夜涕泣欲往求之以祖父母老諸弟穉
不果越五年弟漸長遂決計北行噫可哀也已以其年幼聲伶途中難於問訊
爰倣東漢戴良零丁體書以授之庶有憐其志而指示踪跡者乎揭零丁訴零
丁可憐失怙苦零丁願君子眼垂青指示前途識已經僕本萬載人住居東隅
族縉紳生逢聖代無戰征父子相依甘食貧詎意康熙歲甲寅長沙變起烽火
驚大軍駐萬旂幟明夜半喇叭鼓角鳴鼓角鳴機槍平唱凱歸師好光榮牛酒
飽喫意氣盈擄得民父給樵薪可憐上有龍鍾鶴髮之雙親下有九歲七歲四
歲三歲之孤嬰實也較長纔十齡八口供養我何能慟哭山阿劇黃精饑腸雷
轉台家聊生死茫茫斷信音地角天涯何處尋諸君子請細聽民父名聯珍昂
藏七尺眼如星兩眉直豎若劍橫雙顴隆起侵入鬢黃金臉兒國字形暗鳴叱
咤聲雷霆暗哩鄉語辨易真藍布短衫足裹膝多片擔子千行去時三十一
數零鳥飛兔走今五春諸君子指迷津或在山高或水深倘然迎得返柴荆鑄
金事之天鑒誠

縣試公宇樂助簿引 代邑令來

清辛炳展

故事鄉會試有號舍學使者按臨所部有考棚用以壹思慮便勾稽也郡縣試
之於學使者試特始事也其得失宜若無所厚繫然而始進之階其由郡縣試
尤多裁擇之不慎則有能者不得與使者亦無所據而知苟防閑不密或居處
不如法不獲專意文事以盡一日之長卽裁擇無由當則試舍蓋其重也余策
仕萬載歲丙辰丁巳兩奉文縣試縣童生來者千三百而未止屆署門試之堂
廡不能容多露坐階下甬道中甬至無所避則散坐儀門及內署各軒下勾稽

固難焉而所爲試席坐具官不能辦必待其人之自備計縣之爲置百有四每
考符一下鄉居者競走數十里入縣假具戚友家無則謀諸寓肆往往先期輒
爲人移去稍遲又無地可庋唱名既入而索且爭者聲相聞也或臨事乃將則
懷餅囊筆力既不任而又格不得行及卷已納獨力不能持必待其曹四鼓既
瘁矣三兩人肩捧肘挾而山罨門固餘地無多諸童僕偵迎者復擾塞其間力
盡氣竭物相曼擊有聲而敗闕不可得償者比比也其每覆而入而出也復然
值天苦雨水淅淅著背頂間鞋襪踏泥滓猶相與力排負而前蓋不獨鄉之人
苦之城之人無弗苦之余每見未嘗不勞苦之也諸應試者聞余勞苦爭羅拜
而前曰是無試舍使然也縣之人病此久矣願有以易之公立試所繕以重垣
列以廊廡爲厚板使凭與坐承以巨石使無動移如是則一勞永逸大功德無
量已而諸父兄送試者復以請編詢之士紳亦胥言便而余猶難之蓋官地燧
費無出官文書亦未易了也眾曰不然請無用官地並不費官帑卽無勞官文

書而事可集蓋先是縣守備旣裁其廨地奉文變鬻縣人贖金公購之將事此
者有年矣去署地不數十武一發卽至也其費則城鄉間有子弟與試者胥能
任之誠一倡鼓掌應者當百倍余曰果若是是其可行於是共擇尤公正者若
千人司事繕輪冊以聞於余余乃戒之曰諸能輸者多寡唯其意不能者止能
而不欲勿強言未旣而踴躍願輸者趾相錯也雖然益慎之財入出必謹毋侈
毋苟以謀終久是在首事者蓋天下事意雖美患眾之不從助雖多患已之不
善以余所見州縣著博者省會有試館都門有會館鄉會試道路之費有田苟
眾樂從而善厥事豈惟縣試之字哉其由是有餘力焉卽一切可次第舉也勉
之而已眾以爲然請識其緣起遂書此爲引

惜牛堂引

辛炳晟

夫私宰之有禁也本諸無故不殺之文此亦道與教合之一事也有心者更引
以業報之指刷印徧布說法益明且切敬信宜滿天下而近在一縣尙有不及

變者惟其依託於禮與法所得行黠者因緣竊以爲姦利而久且成俗此吾黨惜牛堂之所由起也先是學中丁祭春秋例購大牢必與販鬻者謀之祀禮成而歸胙於王者暨所事一切輒使殺牲者坐而割肉於庠門屠沽者見而心利之每先期暗勾致竊匪窩戶牽牲入城曰此祀牲也屆期則明目張膽列肆懸權而鬻之曰此祭肉也既而武廟之祭有三文昌廟之祭有二亦復然於是一歲中學前之屠牛無算矣而諸鄉中村市墟場各有赴集及演劇賽神之期皆公爲宰割遍設湯鍋不得問所從來蓋雖有委以彈壓者積習相沿非徒視爲固然亦氣餒而利奪弗能禁也嗟乎物力之不惜而耕本日以艱耗生計之難保而盜風莫可蹤詰無罪而就死地曾莫閱焉蔑法收禮更無待言此政澤之所無由徧及守土者之所未遑一一整飭也有人心風俗之責者忍坐視晏然無以振救之乎吾黨諸同志乃相與謀於是丁祭之牛則學中首事領其備於官而代具之諸同人又醵金購產爲惜牛會每武廟及文昌廟之牛則以會中之貲佐其備於官而代具之旬祭雖供一牛不得濫冒多牲肆刑殺也諸城市神會則屆期共請官爲臨禁有私市牛肉者相糾發無失貸率歲以爲常其有餘貲則僱傭耆士以遍培近城暴露墳墓嗚呼若是其或可久矣乎會既成承事有年立册垂後爲書其首嘉慶庚午年孟春月朔八日

募修小嶺一快亭引

辛 砌

萬邑皆山也其西北諸峯路接湖南新寧層巒疊嶂參天高不可躋獨邑中省會通衢道里紆迴得以馳驟康莊而無板緣絕巔之苦卽近城二三里許有山名小嶺相越不過三百餘丈若羣峯之倍嶠然者乃先朝於山腹間闢土作亭爲商賈往來郵傳絡繹樵夫牧豎者之休息是時朝日東杲萬山飛翠夕陽西逝倒景流霞此一快也朝而往暮而歸樵者唱牧者歌又一快也賁者不致嘆於途行者不致休於樹又一快也有此亭在行道之人東西南北何所適而不快哉一經兵燹之餘而亭已成秦灰矣安能保其羈旅之儔如昔之快然自適

無嘆息愁恨之者乎今雖地成荒墟亭之名至今猶可思也時坊內民衆觀此
長夏新秋行旅渴渴汗流浹背無不往來心惻兼值金生粟死之候時等聚沙
卽欲啟口告人竊惴惴而無由也爰是欲募眾緣共勸盛舉乞引求書於平早
衰殘鄙薄人也囊空羞澁身無一錢今此蔭人之心同出一揆尙其首肯之矧
邑之耆儒碩德英俊少年慨然樂助者濟濟多人何難出一文錢作此無量功
德倘異日此亭落成而後商賈郵傳樵夫牧豎行旅往來之衆載笑言載歌咏
快然自適一時無嘆息愁恨之聲者其名當與此亭垂不朽矣予固幸其亭之
成而名之曰一快而復樂爲諸君子道也

袁州先聖廟記

南唐學士進士徐 錯

昔夫子稟天地之靈膺期運之數體山嶽之成形合燕禹之宏度跨三五以傑
出邈千載而高步豈惟民哉太山之於邱垤鳳凰之於飛鳥也然而日月有黃
蝕之運生民有淪胥之期老聃已逝路流沙而不返文王既歿顧天下而誰宗

是以則天以化民屈己以濟物使夫子志在於爲君則當假道百里因基一成
受祿以有民逆取而順守然後革命創物錫土苴茅布子姓於九州班正朔於
四裔因王法以行禮假號令以濟人然而不屑意者以爲堯湯既遠武有慙德
樂則有司失其傳禮則孟孫病其儀風俗崩弛皇綱解散是以周流天下皇皇
列國一車一豎訪蓁宏而觀周廟四科十哲昭日月而播微言假陪臣以尊周
公修春秋而正王室匡輔元精陶冶情性因國風而正樂順人情以定禮萬物
既治我無位焉此則夫子所受老子之元言老子所以釋負而去之之義也至
夫載轡諸境濡足當時止驂輿而救季孫斬侏儒而存魯國故令君臣懸解井
樹不刊而地靡立錐權輕飛羽喻醴雞於道室警我狗於東門野罽弗慘門徒
菜色坐席不暖炊突不黔其利物也甚豐其爲己也甚約是以宰我有言夫子
賢於堯舜遠矣豈不謂然乎夫近道者道亦近之遠道者道亦遠之是以七國
冰解羸秦灰滅所以夫子欲見於衛姬諸生發憤於陳涉有由然矣漢高基武

心涵帝度爲舊君而祖哭望東魯而輟攻受天明命將半周室其遺言餘祀也則自闕里而徧寰區出壁中而實東序蓋帝王之崛起大數之中興焉夫子非求祀於人而人皆祀之非銜售於人而人爭售之自非大庇生民其孰能至於此聖歷中否羣雄大馳衣冠禮樂不絕如綫聖皇紹祚文思累洽掃太學之煨燼編羽陵之蠹簡濟濟焉煌煌焉民德歸厚矣猶慮隈隅未潤蓬艾未光愼彼觀風敬茲有土保大王子歲以樞密院副使兼尚書吏部郎中李君徵古有帷幄之效克定之謀俾守於袁下車視事解甲息兵巡省農功周行廬室以爲導化有本振葉由枝而孔廟黽替誦堂觀雨顧禮器而施惠振儒衣而復法於是攷圖牒徵碑版蓋天寶中大守房公琯始立廟於州城北門之外五十步乾元中太守鄭公審始移之會昌中又遷於州東大中七復於房公之卜不常厥所於今西遷乃永奠陔次大興力役糞牆俱塲非幸我之難朽壞屋可炊知顏生之不成回廊月照接應雲征制戶靜深重簷騰露微兩楹而正坐儼四科而列

侍如嘗不寢似欲無言植以美材綽以藻泳靈衣兮披披華蕊兮襲襲黍稷令芳簋豆普渾解危冠於季路見繪事於卜商足以目擊而道存不言而心喻矣昔魯恭壞宅於舊國廬陵伐木於孔門金石爲鳴父老歎息然則夫子之道得其人而後行文翁之風感於心而自化是以袁江之上袁山之阿朝爲崆峒夕成洙泗用此道也若夫敷孔業而無祠宇是猶棄筌蹄而待兔叩寂寞而求音盛趨翔而無至心是猶衣爰狙爲周公假詩禮而發冢也是以李君炳筠州之靈錫鍾陵之秀行出鄉里名聞京師題橋以收途懷綬而返國昔之去國而衣錦者蘇秦無守土之實終軍無表里之名君之兼總其稽古之謂故分符之際勅改君筠州萬載縣所居高侯鄉高城甲曰懷舊鄉孕秀里君又以私財百萬代其鄉輸稅增里閭之氣爲儒者之華功成不居無待刊紀而庠序之作所以聳善懲惡託於敘述吾師也故爲之記至其過冠唐浚溝隄則有底績之司書勲之府焉唐保大癸丑歲正月二十日廟成之日也

重修縣志記

宋邑令徐昇

萬載本高安故地初置場隸於洪僞吳順義元年也後爲縣隸於筠則南唐保大十年也皇朝下江南遂割屬袁州則開寶八年也宣和初改曰建成而復舊名則紹興元年詔也筠良俗險而健訟有珥筆之號茲邑雖例蒙惡聲然民淳訟簡風俗特異其產才代不乏人義烈慷慨則有若蘭相如風穎秀邁則有若謝康樂謀畧佐主若宋青陽雄健授兵若鍾南平皆世居其土遺址具存遺風可想焉舊治地勢隱然負山帶江民安物阜逾二百祀建炎三年十一月金人陷豫章叛將杜庠率羣盜乘亂焚劫明年正月敵騎長驅蹂躪自是井邑化爲墟繼而劇賊曹成馬友輩支黨蚊聚大者數萬小者數千據我郭郭血肉我生靈狼殘虎噬歲無虛日而邑境殆無噍類矣紹興二年冬昇被命謬職宰宇于時潰寇劉忠張成各擁眾蟠踞山谷克蝕蜂勃也縣官日與編民駢肩穴處以避難無復辨高下胥吏與豪賈竄遁類脫兔首鼠無復供衙諾士庶皆老弱

棄墳墓而散徙無復安土計予視縣治故所則林樾蒼然因嘆息曰昔衛有狄難渡河野處狼狽失措文公營楚邱建城市立官府民始有所歸而國由以興且縣治者所以臨眾庶施政令之地主德宣焉邦賦理焉民訟聽焉今圯廢若此何以安集夫民社哉乃乞師以靖凶殘而扶療瘠瘵招撫流亡比年賊退民漸有生意遂以八月丙戌剪榛莽斥瓦礫鳩工度材庶役並舉己亥建柱架梁辛亥遷入視事且督促焉九月丁卯落成於是宴寢之堂聽訟之廳吏舍獄寺筦庫倉廩庖厨賓廡各有攸序而崇卑廣狹率視故址者仍舊典也寸木片瓦悉取壞宇棄材而罔由科斂規模簡儉麗庇風雨而不務壯麗者惜民力也方凋殘而興土木人不以爲病纔四旬而訖工人不以爲亟者民人離散失所依而喜其有官府也嗟乎自藝祖有天下百有六十餘年間承平日久人不識兵革燕安鴟毒恬不爲慮豈知一旦變亂窮僻如是邑亦蕩析靡遺今旣修復矣邑人自兵禍以來得脫萬死以復見此邑之成者亦寧有幾然則後之生於斯

含哺鼓腹於斯者豈得不念此哉故昇雖及瓜將代不可不書其廢興之歲月俾後人有考焉紹興五年立冬日

祝令新學記

宋博士新喻進士楊 愿

袁自唐昌黎韓文公爲州文風被於屬邑至今不泯萬載介羣山間風土淳厚士好學而民畏法得一材令則治道易易爾惟皇宋慶厯間制詔州縣立學縣始建夫子廟距縣治東二百步許厯時滋久棟宇腐撓至不庇風雨崇寧以舍法造士乃立學於通濟橋之東南廢廟基爲官舍俾監市徵居之乾道乙酉適有異議者自橋東南遷之古寺而士托足焉學區至是三徙矣神無以妥靈士無所肄業邑之秀民賴學以成就者蓋少淳熙四年三衢祝侯勛實宰茲邑入學釋菜已事而嘆曰浮屠之法吾儒所闢今寓其舍可乎闔市之徵孟予以爲暴今奪教養之地而居之於女安乎盍亦返其本於我心無戚已焉耳會知丞趙侯師俠至簿江侯琪克協厥議爰相舊廟而改作更徙監徵舍於他所是乃

尊吾道激士氣而順人心也於是邑之賢父兄喜子弟之有教也不愛其力爭輸財以供費錢以繕計者二千傭以日計者萬餘經始於四月辛卯迄役於七月丁亥莫享有宮講勸有位退習有齋庖厨湔浴庫廩罔不嚴潔且屈致鄉先生之有齒德者以爲師資自是執經而至者源源不絕然後祝侯知邑民之可與爲善而樂其政之成也以書抵愿求文爲記愿竊觀今之爲縣者目力不暇給嘗懼財賦之不登獄訟之不平吏功之不應程而已至學校事則曰緩而不切仰惟主上厲精爲治綜覈名實至於教育人材未嘗不留聖意歲在丁酉親近上庠寵光多士又明年臨幸秘書編閱四庫皆所以風厲學宮藻飾太平之巨觀今祝侯能上體德意一新廟學可謂賢令尹矣昔晉范甯爲餘杭令興學校之教士皆宗之史官謂中興以來未有如甯者唐郡邑至廣不聞復有范甯者出獨衡山得一陸宰而杜子美作爲詩章謂其首倡恢大義則茲事寥濶不常見自晉唐以來可知矣愿老於壽圖之競來歲槐黃之秋聞貢之士充賦有

司者萬載爲多異時歲冠振綴策名委贄爲天子公卿大夫百執事之選者皆自今日教養之效而視侯亦將去此而羽儀臺省益茂尊王庇民之業又孰敢議其歸宿也哉姑承命而爲之記六年己亥中秋日

惠民藥局記

宋直隸圖關宜春進士張嗣古

郡陽吳子似承萬載且三年以書抵予曰丞於是邑政無細大皆得與聞庸詎可以負爲言韓文公謂備嫌不可否事者然有激云爾走雖不才切有志焉惟是卒卒將受代而奔走臺府無虛月在邑之日無幾顧何以自見獨嘗念邑在萬山中民有疾疾無所求藥束手聽命於天往往不得永年乃捐所得添給等錢通若干緡請諸常平司願循環運惠民局藥以售諸邑使者著作郎章公良肱許焉又請諸常平司願屬諸邑大夫提督月附帳一申以貽悠久使者郎中袁公燮又許焉自是邑人無遠近皆得善藥庶幾持此以謝邑人願公記之余發書躍然復之曰仁人心也民吾同胞物吾與也蓋無乎不在也惟是心以行

則隨用皆足以及物仁不可勝用矣心不在焉楚越肝膽但見人自人己自己尙何望其誠求赤子哉學士大夫志乎仁者也而高者或洪濶於簿書之間卑者率化覩於風埃之下視斯民痾癢疾痛若舉無預於吾身者此無他心有不存焉耳予似不鄙夷其官匪身之謀而惓惓乎斯民唯疾之憂是蓋心之所發見而非勉強爲之者誠能擴而克之細而理一州大而醫一國必將循標察本爬剔弊蠹培護根源以致其惻隱怵惕之心所謂暴征苛斂以剝民之髓膚者必不爲也所謂嚴刑峻法以殞民之軀命者必無有也則其愛民利物之功豈但創一藥局而已哉請以是爲記乎予似曰可乃書以遺之

萬載縣尉衛清心堂記

宋江西提刑慈谿進士黃震

萬載縣尉婁君撫人也余來守撫君已官萬載未有半面雅而書郵絡繹過於平生歡豈臭味之同以余爲可語者與予既叨恩司臬將行君又貽書謂尉解久摧前尉皆莫之居今始葺之一新扁其堂曰清心願爲記余於是益有以覘

君之所存凡前此之書郵絡繹非世俗翕亡熱矣然六經無清心之說謂心當養之以清其說方自荀卿始其後荀勉謂省事不如清心宋璟謂清心則庶務可簡是皆惡天下事繁多欲澄其源之所自出直指政本而言之尉居百僚底自朝廷諸司皆州縣凡事無不於是乎委事之繁簡夫豈由我而欲清心以省之乎余初筮亦尉吳門事之以非理而來者紛乎如麻余雖不能清心以省之亦嘗清心以應之上惟知有皇天下惟知有百姓惟勢惟貨惟來一非所知此心既清事亦徐就條理由是知清心以省事者制命於上者也清心以應事者承命於下者也尉最畀官法當如是不知余之心亦有合於君之心否姑書所身試者以遺之君名南良戊辰進士云咸淳九年癸酉二月十五日

按此記見黃氏曰抄其結銜稱新除江西提刑而通志秩官僅載其知撫州錄之以備續志之補

二先生祠記 宋紹興元年建學宮側

宋丞相浦城真德秀

天地能自立乎曰微聖賢則天地之經不正焉乎立生民能自安乎曰微聖賢則生民之極不建焉乎安天之生聖賢也其意固有在也昔爲老氏之學者曰天有柱地有維若皆依形而立者吁天地果以形而立其不以形而壞乎夫人性之有五常人道之有五品此卽所謂天之柱地之維而有生之類所恃以爲安者也一柱傾則塋一維弛則墮古昔聖賢所爲更相扶植而不敢後者以是焉耳堯舜至於周公扶植之功見於事孔子至於孟子扶植之功見於言言之與事若或不同然春秋成而亂賊之禍熄楊墨距而禽獸之道消其有功於天地生民則一而已矣嗚呼此聖賢之統紀所以不可不續與自孟子沒而聖學失傳漢儒若董仲舒氏揚雄氏皆能以道自鳴而性命之源則有所未究然賴其言而世之學者猶知尊道義尚名教天理民彝未盡泯絕則亦不可謂非其力也鄉使佛老莊墨之徒獨行乎中國其不胥爲糞者幾希故嘗謂堯舜周孔之開皇極創造之勛也漢世諸儒則區區特守而已自漢至唐而有韓子自唐

至本朝而有周子其斯道之中興乎蓋昔者聖人言道必及器言器必及道盡性至命而非虛也灑掃應對而非末也自清淨寂滅之教行乃始以日用爲樞機天倫爲疣贅韓子憂之於是原道諸篇相繼而作其語道德也必本於仁義而其分不離父子君臣之間其法不過禮樂刑政之際飲食裘葛卽正理所存斗斛權衡亦至教所寓道之大用燦然復明者韓子之功也自湯誥論降衷詩人賦物則人知性之出於天而未知其爲善也繼善成性發於繫易性無不善述於七篇人知性之善而未知所以善也周子因羣聖之已言而推其所未言者於圖發無極二五之妙於書闡誠源誠立之旨昔也太極自爲太極今知吾身有太極矣昔也乾元自爲乾元今知吾身是乾元矣有一性則有五常有五常則有百善循源而流不假人力道之全體煥然益明者周子之功也二子之學雖所造不同而其扶持天常植立人極要皆有功於百世者紹定元年長樂朱侯令衷之萬載謂昌黎公在唐實自潮移守袁而濂溪先生亦嘗攝萍鄉縣之瀘溪鎮遺風餘韻在人未泯廼卽學宮講堂之東爲堂三楹繪其像以祠書來曰願有識某惟韓子之於是邦雖善政良法有以及人而世之相去蓋已甚遠若則子則暫茲焉治教所施有不得而聞者然則侯之祠之也果何爲耶意者天經地義之所存一或失政則民有不得其生者二子之道施之是邦者有限而播之天下者無窮此其祠之之指也學於斯者盍味其言而思其人屹手若泰山北斗之瞻粹乎若光風霽月之挹知道之大用常流行乎天下而其全體具於吾心則知所以用力之地矣蓋韓子言其用而體未嘗不存周子言其體而用亦不外是也察體用之一源合知行於一致學者其思所以用其力哉若夫惟筆舌談說是正而亡反躬踐履之實甚者以惑世貴利焉是則二君子之罪人也

倚古堂記

元翰林學士崇仁吳澄

人之所尙有萬不同尙名者進取百途以斷於升尙利者計度百端以斷於豐

其他小術末伎足以溺心蕩志者皆能使人尚之終身而不厭嵇康之達也而鍛劉毅之雄也而博則其下者又奚足怪夫其所尚之不同由其識之不同也識之卑者所尚亦卑萬載黃元瑜循循謹厚處家處鄉未嘗矯激以求異於人而其尚自有與人不同者若名利若小術若末伎凡世人所好一切不知尚作堂於所居之偏聚羣書及法帖名畫立物其中而匾其堂曰尚古予聞而嘉嘆焉蓋人之所尚者今而元瑜之所尚者古彼尚今者喜其快已喜其銜俗而笑尚古者之浚且迂夫孰知浚中之至味迂中之至樂哉孟子言讀其書誦其詩論其世以尚友古之人斯堂之名於孟子之言有合也其識不亦高乎元瑜之所尚固已高於人而予又爲之次其品法帖名畫古矣而未爲古也古者莫如書書之有集有子有史古矣而未甚古也甚古者莫如經春秋古魯史非司馬遷班固以來之紀也儀禮古周制非叔孫通曹褒以來之儀也風雅頌古樂歌非蘇李張平子以來之五七言也書經爲上古之書易經爲三古之易古莫古

於此孰有出其上者黃氏之子名弟沈潛乎是含咀乎是因古經之辭學古人之道得古人之心則居今之世而與今之人異此尚古以淑其子弟之效也其堂尚今以誤其子弟俾目趨而日下者相去之遠奚啻九地之視九天也哉元瑜名璧爲權茶都轉運司屬官在江州爲予言其作堂之意而予筆之以爲記云 采吳草廬補

大本堂記

元奎章閣學士崇仁虞集

萬載黃盎字子中早嘗從臨川吳公游往來者數年歸而題其讀書修學之舍曰大本堂其後得堦其門有卒業之意而公去世已五年矣公之遺書緒言經手定者皆可考信而其門人子孫嘗所親聞者又可問而辨之以自致其學願來求予爲之記而不知予之不足以知此也噫使及公之存因斯堂也得一言以惠幸後學豈不善哉嗟何及矣而使予執筆焉其何以言之哉昔者朱子受學於延平先生先生嘗以其從豫章得之者而語之曰但於靜中看喜怒哀樂

未發時氣象爲何如竊嘗由是思之所謂未發者豈非吾不睹不聞之時乎所謂靜者豈非戒慎恐懼之至無所倚著之時乎若夫氣象之說亦云危坐澄心而天理自見云耳非必有模擬想像者也其師友問答之言傳諸學者宜無可疑者嗟乎人之受命於天與血氣俱稟而生其爲性本靜也知識生而情欲作接於物而動者紛至疊起互爲感應反覆相因於無窮雖夢寐休佚之頃其懂懂者未嘗小止而定也是以一往而不復倒行逆施謬迷顛沛以終其身而莫知反其本源者多矣彼爲佛者亦或知此以爲憂乃爲絕物壁立以自勝或爲專壹內守以自固其堅苦百倍則有之雖或穉穉之有秋然欲其立人極以贊化育則與聖賢之學爲大不侔矣今夫天道之行也必有斂肅以啟發生之機人之爲學何可無所涵養以爲動而泛應之地乎苟自始及終無一息之靜則隱微之間動機之發亦何以察其辨而致其力况於風靡爛倒潰冒衝突而後從而制之將何及乎吾是以深嘆夫延平之言而竊以爲大本之立庶由乎是

而區區言語文字之求宜未有切於此者矣若夫其後朱子之門人或傳其師說以爲考諸聖賢之言進修之實尙有可言者則在後學又有以究極之吾聞子中之居是堂也以高潔自克好靜坐故以所聞告之以爲之訓采學古錄補三新宣聖廟記

虞集

萬載縣尹懷孟馮士毅縣學教諭匡廬曹邦來告於集曰學校之繫於教化大矣風紀之司以爲職任部使者巡行郡縣下車卽理廟學以爲先務而士毅等備員於此謹廟祀繕學舍以待教令不敢緩也茲邑之學始作故宋至和中屢遷不常季年始定於水西內附國朝因舊無改越五十餘年至治辛酉之歲僉憲薩德彌失至縣以其規模敝陋弗稱而學計不足以給用用父老言命縣尹河南張輔延兄邑人江州檇茶大使黃璧咨以修學之事璧承命以爲已任禮殿小不足以容祭器樂懸之設進退拜立之位爲四楹之屋於殿南深丈有八尺廣與殿等以兩廡之迤於左右也移而廣之丈有五尺徙其門而南之凡三丈

有三尺又移櫺星門於門之南三丈有五尺昔更作焉講堂齋舍官廳厨屋加葺焉事具郡人前進士夏鎮記又十年爲至順辛未僉憲聶公延世至以先聖先師及從祀之像設弗嚴知薩公之用人也審又以咨之黃君受命如初不三月而像設之冕烏裳衣五采絺繡如章又八年爲仍改至元之四年今副憲完顏公至以殿棟橈前後簷之交承雷地壞仍薩公聶公之意咨請黃君受命亦如之明年陶甃材木具作虛屋架其上以通水飾以文瓦建以鵝尾而殿益高以固完矣凡三役三使者一以屬黃君不資於眾人不煩於官府材木之樅工役之備一出於私帑故無所會是以臬司公府標以善士之目焉敢請記之蓋聞之舉宜錯諸枉則民服舉枉錯諸直則民不服施諸天下郡國其道一也又曰魯無君子者斯焉取斯昔人以爲稱人之善必本於父兄也司民風者將有爲焉豈乏材用之供哉而審人以托之不以煩煩一事爲嫌者誠有教行乎其間也取諸父子昆弟之無間言者所以興幸也取諸諸譴愿無干於官府者所以教鄙薄也取諸敏事而不乏者所以懲驕吝也鄉黨州閭之眾庶見而感焉則鄙薄驕吝之風消善良之類盛孝弟之道興而使者之教行矣尙何憂學校之不修乎乃若嚴經傳之誦說以爲學則尙廉恥敦厚以閑士習出其俊秀而表之勗其所未至簡其所未率則有司之教猶有可爲者焉縣令學官勉之

重修張巖書院記

虞集

袁州萬載縣獲富里有故臨江儒學教授張君千崖世居之嘗得山水泉石之勝於其南作亭樹園池廣袤數里青山趙君文記之言其奇偉華嚴擬於京洛吳越傳聞者如見繪畫所謂張巖書院在山之麓有禮殿以祠先聖殿有門廡有祠以奉周程張邵司馬六君子有樓以藏聖賢之書有堂以尊師而講學有廡齋以居其學者有庖廩器具以給凡用此又趙君歎其誦詩讀書之美而擬諸廬阜衡嶽之有所自也千崖君歿子孫出仕京師弗遑於茲者且四十年萍鄉榮君南祥娶張氏則千崖君之子之女子也有子岳孫既長而有立稟於其

親而請諸舅氏疇願因書院之舊而加葺之以延師取友率其族人鄉黨子弟而就學於斯也舅氏曰是吾意也岳孫乃以元統乙亥之春鳩工庀材致其繕治易朽以堅飾黼以華割腴田以具食其舅氏又資之以樵蘇之山藝蔬之圃不數月而成且備矣十有二月岳孫與巖學之士傅君任來求文以記之夫南山張氏之亭館甚多而岳孫獨先事於書院觀其志之所存可謂知本者矣宜春在江右之上游其風土淳厚其人易與爲善西瞻衡嶽則嶽麓書院在焉東望廬阜則白鹿洞在焉此皆賢之所經營皆依乎名山大川者也今巖學得山水之秀故可托以久長者乎今天下好事者築室買田以資講習然一列於學官則行有司之事而絃誦運豆殆爲文具者多矣獨巖學遠於城闕之喧囂觀乎公府之拘制饋餉時至無乏絕之慮人跡在邇無岑寂之苦息焉遊焉無所事乎其外及其閒暇可以登高眺遠而發揮其詠歌環千里而觀之爲學之善地未有過之者矣雖然樂順適則志易墮之磨勵則德每孤前輩寥落師友遺

廢遺言之微孰究孰擴趨時尙者竊緒餘以釣利祿務高虛者假近似以立名聲疏鹵自欺之風有不可勝言者宜春文物之邦深山茂林豈無古學之士經明行修足爲師表者張巖之人其力致之也乎苟賢者之未易致也則嶽麓白鹿洞晦菴朱子南軒張子之成規緒論在焉宜取而表之相與尊信而從事焉可也尊信則不搖於異議從事則馴致於成功他日衣冠之盛彬彬然自巖學而出則張氏榮氏之名顯著於天下豈直山水光華而已哉

錦江橋記

元學士瀏陽歐陽元

錦江橋者建成敖君玉溪嘗爲新昌通守自之官至受代往來必經是橋偶見其敝以已貲修之鄉人慕其成功相與名其橋曰錦江以志其還鄉之榮焉歲久復敝子伯川又新之書揭記余惟大夫士得意當時歸榮故鄉其志不以宿昔恩讐爲先而能思以一已之惠爲方來無窮之恩若玉溪之於斯橋其識豈不高且遠哉曰錦云者雖山於鄉人愛敖君之辭亦必敖君有以得鄉人之愛

而後然也伯川不墜先人令名重葺斯績以永鄉人之美意豈非孝乎在禮祭則設先人之裳衣以其嘗服被也是錦也者玉溪昔者服斯榮於其鄉伯川葺之不盛於當祭之設乎江發源錦山道良溪至橋三十里橋爲墩一爲隄岸二爲屋十有六楹中三間爲樓初修以延祐之六年今修以至正之七年伯川才器通敏今爲岱山場鹽司克廣先志不獨斯橋爲然上而長安昌溪藍田平田高原下而平山龍江晉安雲峯百餘里間凡建十餘橋行道皆甃以石

譙樓門廡記

明邑丞薄黃自中

萬載縣新作譙樓門廡既畢知縣趙君中謂其主簿黃自中曰斯役也縣丞馮君原禮實力其事具有牒縣辭蓋徵書之以記歲月用示方來謹按其牘曰立網陳紀守職奉公理廢復新宜在規措叨承簡命共撫茲邑欽奉律令公廨官舍修理勿違敬遵罔怠斯縣兵燹之後雖已建立廳事修葺未備爰有北門城樓暨空閑倉宇俱係劉氏敬與姪明德屯據時所建軍民墮毀將成廢物遂理

喻其居守者戒市民拆運其木瓦柱石勸率各都里長供給工食仍添助蓋瓦兼自捐已俸贖布帛犒人匠廼相物料量度長短起造幾覆以旃蒙大荒落之歲季冬丙寅作儀門兩廡吏舍明年仲春己未暨譙樓樂廳前露臺甬道立戒石亭未始差斂稅民擾害鄉疇也原夫開設之初銓注令丞簿尉典史到任因見官治草創弗稱觀瞻會議各出利便方策重建一新於是相時成事允屬勲敏長材者焉然則締構經營非馮丞固莫爲功而協謀於前思繼於後緊非同寅之心則亦將曷賴焉乃余復何幸執筆從事以與有榮於其間獨惜典史韓昱遽先物故弗克共落成耳乃相與備述其語勒諸石以證後之人又明年秋杪朔記

南浦橋記

謝詢

縣之南爲適郡通道行不一里有溪流自西南來縈帶其前使命往來邑大夫送迎必涉焉故昔之爲政者礪石爲橋架木爲椽爲屋以便行者橋之有亭舊

也壬辰以來燬於兵燹十五年間無有舉而復之者今朝廷清明邑大夫幕客皆時英傑庶務集而百廢興橋之復舊蓋有其時也邑人文素卿者精於醫賴以生活者眾悉以其報德之貲獨力爲之屋凡九間若柱若梁若椽若楹而壯樸而不華內則因柱爲扶欄外則通爲版壁以障風雨簷棟黝聖規模一新活人而得之濟人而用之皆出於中心之誠而非尙浮屠因果之說徼福於冥冥之中也主簿黃君以正書南浦二字以標其額東魯謝詢循官之迹老於江南會而別別而會不知凡幾南浦固通於道塗者也登斯橋也覽山川之奇勝懷政鄉而不可到仰其命名之義思文通作賦之意烏不爲之悵然也哉因述以爲記 按壬辰兵燹正元末紅巾據萬年也橋蓋洪武時修以正卽自中宇郭志秩官誤以自中爲另一人更列以正名爲成化末年任

賈令建學記

明進士湯 熒

皇帝即位之初年詔郡縣議學校養育人材以輔翼國家承天休命越甲寅八

載之間政教大興郡縣吏虔恭厥職咸能出棟宇於塗炭之餘植義倫於廢弛之後炳如也萬載知縣淮安賈侯志通下車以學校爲務嘗與士夫履觀故址某爲正殿某爲明倫堂某爲齋舍某爲廚庫某爲二先生祠某爲魁星堂雖平日案牘山積若無少暇及此者而規模之廣狹位次之伸縮工力之多寡費值之欠餘皆素定於胸中矣一旦咨於丞孔思道暨諸同寅咸相其志遂委財命工備物底績黝聖丹漆各中矩度巍然煥然其聖人在天之靈歟抑我侯經營之功同寅贊襄之至也嘗謂法度禁令可以集庶事不可以結人心至觀教化之效仁義恩澤又不由於法度禁令之外故民不期孝弟而孝弟自興不期忠信而忠信自立雖任其責者亦不自知其效之至此也且人材之出也固山川之氣所致其成也朝廷勉勵之功師友琢磨之力人材非聖化不能成王業非人材不能理詩曰於皇多士生此王國王國克生維周之楨此之謂也爲吏者以朝廷之心爲心新令尹又以舊令尹之心爲心庶人材治化相維無窮已

陳令修學記

明學士南昌進士張元積

萬邑廟學曠治已久廟制自禮殿門廡下迄庖庫牲殺之處學制自明倫堂齋舍外洎廨廡會食之所有廢焉而莫之舉有敝焉而莫之葺禮樂教化之地弗急於簿書期會固有司之常歟成化戊子海陽陳君崇文以偉才宏局來令是邑甫下車謁廟視學卽慨然興嗟曰令一邑師帥務孰先此於是經營注措持其無敢慢之心堅其必欲就之志甫一月廟櫺星門成旣一載學書舍成又數載禮殿廡東西戟門及明倫堂成又數載庖室牲房學齋東西門內外饌堂粟廩解宇成其費也弗糜之官其役也弗徵之民或廢焉起之而加宏壯或敝焉葺之而加侈麗又從而固厥周垣端厥階陛廣厥塗街由是法制宜有煥然大備廟庭肅肅儼乎聖哲之臨堂室言言宜於講誦之樂儒風聿振士氣勃張陳君爲令可爲急當務者矣學司訓葉福桂梧咸嘉君績欲詔之無窮乃諗於貳尹陳衡判簿王瑋遣生員宋瑤鄒泰來南昌屬爲記夫廟學國家制自有定廢以壞舉之有司職固然也而固有忽焉弗之急急之而必待其人是何異於學者理本固有成厥毀作厥驟非上之人有以致厥功弗可歟茲邑廟學固曠治焉久今陳君乃毅然爲一新之諸士子來遊來歌觀茲盛美其亦反而有所興哉廟制焉久廢而備吾容有久廢而弗備者學制焉久頽而葺吾容有久頽而弗葺者因耳目之新日致所以自新而求無負於賢師帥異時由而登庸將有以推而大振天下之頽起天下之廢以補造化以福蒼生則陳君之功豈徒今茲右於廟學而已哉

重修浮橋記

明邑訓導廬陵儒士曾宜勉

萬載縣古渡曰龍江曰竹渡邑之要津也龍江距邑二里而遠竹渡則旆流西上一舍而近上通潭鄂下通潯陽南抵臨吉前元俱有橋以便濟涉壬辰兵燹燬於火竹渡續修未久而復壞龍江五十餘年未有能繼之者每春洪水汪洋孤舟斷岸不無病涉之歎夫橋梁道路乃爲政之首往往官於斯匪困簿書期

會則追賦稅逋微奚暇於此洪武壬午貴池舒君仲誠甫尹斯邑下車以來招流民恤孤獨闢土田均賦役二載之間晏如也顧尤亟於徒杠輿梁首修竹渡命僧文隱董其役及修龍江命耆民郭文煥督之始壬午冬訖癸未春眾先欲撤竹渡舊橋於龍江隨宜葺之稅大使鄭子謙請曰盍若更新庶耐悠久侯欣然從之至薄舒君永懷又力贊其成凡一毫之費一力之役不煩於民橋皆載舟於水面隨其濶狹或九其舟或十五其舟賞以長索板其梁欄其側而石其兩岸旁立庵舍擇民復其身守之規模堅緻足以久遠車馬往來晨昏馳驟若坦途焉橋之費也凡若干緡非眾施協力而侯爲之倡孰能成哉眾請書其事刻板於菴以告來者噫龍江竹渡之有橋也成於我侯便於爾民凡僣僂而提攜負載而奔頓行者歌休息者不憂厲揭之勞誰之力歟歷兵燹暨今寒暑代謝凡若干載乃始成之又誰之力歟是宜記之以貽後世使繼此爲縣者皆能行政若我侯則龍江竹渡之不朽豈可以世數記哉

重建雙虹橋記

張元稹

一橋梁之修於有司詎爲重以大者然古人占茲於政今人盛茲於舉古人曰小且理矧大輕且舉矧重今人曰庸有司急者勢否則利利急第撲滿於已遑民焉軫勢急第簿書期會之勛遑民焉厯茲其故事則未而有司臧否焉攸繫亦弗小也萬載縣左有橋曰雙虹叛於元季國朝洪武永樂間圯而重修之至今成化乙未夏霖猝溢復衝廢涉者病焉縣尹海陽陳君璵惕然曰茲非吾責哉乃伐石斲材擇人程督仍故址梁而甃之樓七其間甃三滴叢之飛梯繫之風鈴修尺百廣尺十二崇尺二十復橋北立關王廟以鎮之龍江南浦間病涉者免矣工肇於歲乙未八月訖於歲丙申五月陳二尹衡王判簿琇喻掌教清葉司訓福僉曰茲功弗官廩弗民騷匝十月歛焉於成侯誠良厥畫者微有以章之久疇能知厥功之自則相與樞柙橋左而亭之走生員辛容李升巧吾記吾謂茲今人盛厥舉古人占厥政者陳君善績在民殆弗勝書然茲亦證無小之

俾就泯況茲橋袁民之剗則前此有司愧於民已多陳君此功又詎賢於今有司而已於戲先王之政舉自不忍心建橋以利涉亦不忍心一端也有司朝廷責之宜有大乎此者此猶不舉餘從可知使天下事上以下不忍心人人乎陳君茲一橋之能達詎王道焉弗備詎世道焉弗隆噫然而難矣

陳令修縣治記

明修撰永豐羅倫

國家之待士也因其才而養之養吾民也士之仕也以其才易吾民之養非厲民以自養也是故飲食車服宮室使令易菲惡以甘美敝陋以壯麗野朴以輕便非過也宜也夫公宮之制內以位叙外繚周垣入則同署出則同門蓋欲使之廉貪相察勤怠相繩以立政體傳之無窮非獨以自養也夫何仕者不假官營私則安於敝陋此何道哉萬載礪帶袁筠俗號易治解宇腐壤漫不可支海陽陳崇文吏斯土也於是八年矣知民之可使也乃圖新之南嚮爲公堂北爲退思之所前爲重門旁爲吏宇龍亭有庫居貨有藏戒石有亭徒役胥吏居息

有舍凡爲屋百餘間民見其成而不知其勞殆非才其然乎移之於理何有今夫四方司牧寵賂章行上之所爲民亦歸之剝膚椎髓公私罄然掃地壁立民不堪命不革其舊而新之殆甚於斯乎夫司牧而奪其有是盜之也吏之盜吾民也久矣安其養而盜之國之養士士之養於民其端固然哉易道以陽爲君子陰爲小人君子者養人而養於人小人者養於人以自養君子內而小人外則泰小人內而君子外則否二者陰柔之極致也象曰否終則傾何可長也傾否爲泰易壞爲新天之道也風俗之成政化之行夫豈遠人哉書曰邇可遠在茲君尙圖之是役之興縣丞陳衡主簿王瑋弼相有績以生員彭用中陳鑑來告紀成乃文其成以詔來世成化十三年

謙樓記

明學士安福進士吳節

萬載袁屬邑在漢爲建成在吳爲陽樂在晉爲康樂五代爲萬載宋元因之山有金雞白塔紫蓋之名水有龍江錦江清泉之號巖之可傳者仙遊龍成也橋

之可題者雙虹南浦也名宦則有林景達冷應徵諸公以名績稱人物則有宋齊邱廖洪諸賢以文學著讀書有堂科貢有學仙釋有紀物產眾多誠大郡之勝地諸邑之奧區也成化初海陽陳公瓌奉命來宰是邑宅心以仁懷民以惠暮年而政通人和流連四歸再暮而風移俗美稼穡以穰遂倡諸寮掇恒祿節用費首葺公廨以嚴出入次營學校以崇士風暇日登麗譙見其棟橈瓦墮風雨汚漫歎曰表望在此其凌替至斯乎迺謀諸父老百執咸曰唯命邑之富民聞之皆願分貲以助遂繼日培址鳩工輦土取材於山鑿石於阜建樓五間爲甍三滴叢以飛楫繫以風鈴繪以丹青甃以堅甃大書其額曰萬載縣又設鐘鼓桐簾刻漏於上以備嚴更擇人守之惟謹由是黎庶奔走來下邑者瞻望麗譙翬飛藻繪咸嘖嘖歎美以爲昔未曾有其遇事入公門者亦皆鞠躬引領無敢差池此邑望所以尊隆而政治爲之一新也一日教諭喻淳率諸生登眺其上聚首言曰茲樓之成功用浩大宜有文以紀之乃遣秀士二人走書安成徵

爲記將鏤諸石予惟麗譙通邑之表四遠所觀望也况考景定時以修政務祇嚴更滴以警閭閻皆事之大者也昔在宋時張希顏知萍鄉殿直范延賞過焉夜宿邑邸聞更鼓分明知其必有美政歸以語大臣張詠詠然之薦名於朝遂登顯仕今陳公爲政清明愛民如子平徭薄賦市不易賈孜孜焉惟耕稼是勸比希顏之政勤勞過之矣且建麗譙以壯邑觀豈特更鼓分明已耶使節所經必有稱道而薦剡者遠大之望端有可期不但展百里之材也於是述其興造之始用工之詳壽諸貞石以垂永久

黃令新學記

明大學士安福進士彭華

皇明混一天下自京畿以達於郡縣無不建學校以育人材故當時士無不教教無不用用之於家國天下又無不宜此其所以時稱盛治而非漢唐宋之可及也矧萬載爲袁郡鉅邑而舊學在縣治之東窄隘弗稱凡文廟祭器堂廡號房悉因陋就簡前之有司鮮有究心於是者永興黃君珙由進士宰是邑下車

之初拳拳以興舉學校爲念然不能以一旦遽成比三載政通人和百廢俱興乃慮學宮之窄隘則廣之以曠地憂文廟之傾頽則創之以新祠廟後建明倫堂堂後立奎文閣櫺星門舊以木也今則石以易之泮水池舊所無也今則鑿以浚之禮門義路昔所未闢也今始闢於兩齋之左右露臺躍臺昔所未築也今始築於文廟之前後以至神像之繪簾豆之新庖廩之設戟門之修丹墀之廣號房之造與夫鄉賢祠習射圃聯宇饌堂煥然一新皆由於侯之規畫也經始於丙午夏落成於丁未冬於是二尹黃君仲哲判簿徐君瓚掌教李君仁訓掌劉君顯等具其事令庠生鄒泰柳書請予記予惟學校乃王政之先務職守令者孰不知之然知而能爲者少爲而必成者尤少若黃君之用心可謂知而能爲爲而必成者矣然則斯邑之士宜以邑宰之心爲心務窮理修身於未用之先忠君愛民於效用之後上不負聖天子下不負所學則有光學校也已

城隍廟記

明邑教諭山陰舉人朱憲

古之有國家者必務利民利民者必祀神凡神之有功於民若山川社稷以及坊水庸門井之屬悉載祀典歲尊祀之而城隍之祀不經見三代而下萌於唐歷宋元而漸盛天啟我高廟皇帝綏靖寰宇卽大正祀典以爲高城深池鞏固疆域不戢者不敢睥睨以肆侮民賴以安厥功不在山川社稷下非門井之利一家坊水庸之利一鄉者倫不可不祀也故著於令甲曰廟而天下郡縣皆立之廟之高廣視郡邑聽事爲差職郡邑者將視篆必先謁廟誓神有事於山川社稷則載其主以配享焉夫聖人重神之旨所以崇其功抑欲司牧德與神合爲民利不爲民病也萬載舊有城隍廟在邑東北隅去邑治不一里歲久堂寢門廊俱傾圯予自宏治丙辰視學篆日其廢壞常致慨焉己未冬洛川張公道顯來令邑詔曰廟廢若此曷稱神棲更新之舉不可緩矣義宰辛潤宇延仁聞而起曰此吾素志也遂由私帑若干緡市木石磚瓦僉工役作中堂五楹後寢三楹又作東西廊各五楹爲堂之翼作內外門各三楹爲堂之限月臺丹墀夷

以磚堂寢門廊覆以瓦與夫龕坐几案之設黝聖金碧之文司曹馬侯靡一不具堅好礪密足垂悠久經始於庚申春三月十二日落成於辛酉春二月吉日道顯公奉神像中座每祇謁顧謂僚佐曰美哉廟之更新也贊不出於官役不及於民辛其克成吾志矣將記其事以貽後會以艱去乃請予記之而予以校文南都旅考績北上不異後八年戊辰延仁走書來徵文予與延仁交之久知之深義不容默况數年心諾不敢不踐竊惟人生世間有財不能施者爲吝能施而於無益者爲濫皆非義也夫人心易惑莫如淫祀相率崇奉之峻厥殿庭侈厥臺觀雖傾囊倒篋而不恤由不知義耳城隍之神爲聖朝所重延仁仰尊朝典成邑侯之志不吝捐帑于緡撤其廢而一新之誠可謂知義而尙焉者也其視或於淫祀以其貲爲無益之施者不亦遠哉神用永歆監吏民之臧否而禍福之茲邑其享久安長治之福矣自是而後星移物換廟貌不能恒新不知任起廢之責亦有如延仁者乎予故記之以俟

郭司理修學記

明尙書高安進士吳山

萬載學宮故隘陋弗稱制典成化間充拓之歲久就敝嘉靖乙丑春郡節鉅溟郭公臨視邑篆周覽悵然且啟聖祠宇遠隔而敬一亭奎文閣亦遺址僅存非所以遵時制樹風聲也乃屬經衛徐君大且丞貳王君詔市材鳩工聿興役事進學博潘君然王君繼相譚君楚董治焉詔然等祇受厥成暨事惟謹首文廟次啟聖祠敬一亭又次奎文閣皆鼎新之又念名宦鄉賢缺祠非制則附建於奎文之東西而儲用有庫蠲潔有厨藏修游息有號舍諸凡典藉禮樂之具井井咸備於是延經師開經幄日與諸青衿講明經理然未嘗以興作勞庶民也贖金所受錫銖不入私室凡榱桷棟梁版幹力役罔不取給焉蓋常情所必取爲已有者而悉捐用之此所以民不告勞而黌宇就飾也惟時士類欣已焉嚮風承德禮闈春榜宋君良佐先登之其諸文明之嘉會而感應之徵兆乎丕休哉郭君之芳烈不可磨也既而令尹胡君文光至喜前緒之有開而紹休者

之易於爲力也徵記於余余惟古有三不朽之說德其先也功與言固其緒餘焉天生孔子爲萬代道德宗王陶範諸賢無非身心性命天常人紀所繫萬世允賴報祀至今不衰然曰吾無行不與二三子是以身教之也觀漢郭公東海間山也學孔其素志焉持節明刑得情勿喜孔之曾也摧抑權勢名達帝聰浩然之氣剛大莫禦孔之孟也艱娶者有助弛葬者有禁怠行者有飭無非道德齊禮之遺意則其出身加民又皆孔氏家法也茲而修飾黌宇教學爲先是蓋推其所得於孔氏者以淑諸人此其屬意斯文亦至矣哉二三子服儒衣冠誦法孔子苟於操履之間漫不加省一旦叨竊科第登陟崇臚將上負天子下負所學吾恐其過廟生愧而孔聖之靈亦戚戚然曰非吾徒矣是又郭公之憂也先達爲袁士謀者有曰文當如韓道當如張余亦曰操修作用當如郭也余不敏職列史館日以采錄名實爲事是殆不多見者故特爲記之亦俾爾有司爾多士知所興起以無負郭公惓惓之志焉

啟聖祠記

明邑舉人辛 磊

皇帝九年詔尊孔子至聖先師禮崇封先世啟聖公祠以特廟以先賢孔氏鯉曾氏點顏氏無繇孟孫氏激鮑徧及天下郡縣林侯聯峯令萬載勵政均輸百廢具興大懼廟隘於地弗舉化尼弗行無以稱合上意旨胥之得西塹廢祠可踵而易理也以聞巡撫三峯高公可其請乃白於僚屬龔君廷憲馮君應軫議以克合計圖百步有奇猶重憂之費越癸巳春董其事於廬君鼎僞工量值命日募傭仍厥基新厥良材端厥廉階中爲享殿左爲各宦祠右爲鄉賢祠前列門三門各有扁垣墉聿新畢工於歲秋費弗官廩役弗民擾工弗時詘偉哉事既竣侯將報政尋拜戶曹屈行廬君以磊砥其盛而落其成屬爲記之竊惟聖人之道侔於天地古今知尊事之矣至崇其親以特廟釋奠漢唐宋所未有者實我國家尊師右道超古準今之盛典也夫惟天下吏倖有賢否故廟宇之建

而品器飭則春秋嗣祭罔或曠侯無負於國哉然以名宦鄉賢附者何夫道萬世之公出治民退修已一而已矣仕不名宦民罔治處不鄉賢身罔修非聖人徒也從祀廟廡其誰曰不可侯取尤者附之祭畢次名宦又次鄉賢俾獻斯廟者指某宦言曰此先代名宦也吾觀風於後可自諉於斯人外哉士夫詔相者指某賢言曰此吾鄉先賢也吾講學於後可不預於斯人中哉山以道治處以道修無愧聖道卽無愧啟聖之心此吾侯善體上意曲成邑人之化者也若其崇廟貌以侈虛名而已固非國家制詔之意抑亦長吏者之羞禮曰以教道民必躬親之林侯有光是矣詩曰寢成孔安盧君亦有光於是哉

城南社倉記

明大理寺少卿邑進士宋良佐

昔人有言救荒無奇策然王制以國無九年之蓄爲不足無六年之蓄爲急無三年之蓄爲非國前漢志亦曰進業曰登再登曰平三登曰太平夫無蓄則不足且急而非其國有蓄則登且平而謂之太平蓋天時之荒歉無常備之不可

不預也救荒之策其奇於積乎宋紫陽朱子提舉浙東廬民艱食修舉荒政請於府得常平米六百石賑貸立社倉具有成法遇凶年民不餓食孝宗徵之進直徽猷閣下其法於諸路茲固救荒之表表者也大江以西惟吾萬山下賦上歲入之租不足供稅邦之廩庾儲蓄無幾一遇旱澇饑饉荐臻臨期告急計無所出積貯視他邑尤不可緩矣我侯西川胡公家近紫陽之居學遡淵源用能紹四百年之傳而光大其緒出宰吾邑至則詢殫察隱視民之艱食若切痛瘝立迎春亭以重時政建養濟院以恤孤貧置南儲倉以便轉運通租法以平輸納政績顯著徽譽四騰當道稔其賢屢褒崇之隆慶庚午大中丞劉公光濟疏之天子加大夫秩留久牧欲衽席吾民也尋奉起立社倉之法以備荒歉茲舉也先得我侯惠下之心真足以償我侯已饑之念者乎侯庸是經畫多方度里中地之便民者各立社倉一所勸誘鄉井之民民感激咸樂出粟以實焉設社長副以會計之斂散之規宛然朱氏遺意鄉之東曰澗田西曰構樹潭曰進

城曰牟村每暨巨版四門堂一以便省視城中居民輻輳因取預備倉左側空地立城南社倉左右巨版八中有廳前有門屋旁立小屋三間守宿者以司啟閉垣堵棟宇創造維新其材甚巨十倍於鄉真不易之規也孟冬工竣邑鄉耆屬余紀其事余以爲君子之仕也固當志存益下而每難於施濟之衆濟衆固難而濟衆於顛連無告者尤難也此法立蓋有滂不能使溢旱不能使涸疫癘不能使災惠澤沛然溢於萬載與朱子活浙東之民者其心一其事同曰登曰平曰太平者不見於日乎救荒之策孰逾於此余固慶聖天子愛民之心無窮我侯仰副聖天子之心益廣於無窮矣侯名文光姓胡氏號西川直隸徽州縣人嘉靖乙卯鄉進士

潭頭橋石碑記

明邑令宜興舉人張邦穀

邵民李氏曰珪者幼補博士弟子員長而俠施晚益敦行詎以厠於膠賓予接其人知非齷齪者潭頭之石橋也實昉於彥端至珪重建以鎖鑰族姓之水口走而請記於予予領之先是余以勸農行部一至其家見其族之子若孫不下千指皆敦樸守素間以秀文絕不妄與人爭競有先民之遺焉家環湖而宅其中大江循其左而一往不復顧去家東里許曰獅曰象兩山殆牙錯而抱焉石橋雙鎖且於東南支流之間以縫其關龍圖祠則踞象山之趾而履清泉之下江之中有石如盤面徑可數丈餘所謂涼傘石也天造人工皆爲李姓水口坊不滋他族逼處此以與爭競豈偶然哉夫山川盤鉅怪石嶙峋爲捍門華表之綴旒地之勝也因山川之陰陽而利導之以補其闕陷英傑之行也事有關於地方而樂爲揚抗之以垂於後世亦守令之職故不辭而記之後之君子其有感而護之不哀端有所望云

竹潭橋記

明教諭邑選貢龍國臣

竹潭距邑西十五里有大道截流橫渡上通荆楚下達荊陽凡商人之販者負者邑人之往者來者咸之焉先時水勢狹淺設徒杠而已頃年以來洪水衝激

辭曰圯潭益濟每春夏漲汨沒於中渡者頗多君子見而歎曰不仁哉竹潭之水也有司之心也夫水無心也亦無爲也不仁之名可追也有司廢王政使人病涉若此責將安委邑西宋母鄧氏聞之曰吾夫君西溪一元不幸賡行道之志以徂畜愛人之心未及一試良可傷哉幸有篋笥遺貲足備木石費報茲橋幾顯愛人之仁於身後乎遂慨然命匠屬工伐石於礪斷木於山卜辛巳歲之元日經始焉橋凡四墩岸磊以石長一十丈廣一丈六尺上庇以屋凡九間覆以瓦楹列二十期年而集人咸羨其成功之速也販負往來若履周道人無病涉功何慙哉夫西溪翁厚所藏而足今日之費不幾於善藏其用者乎鄧氏不吝所藏而揚夫之美不幾於善顯其仁者乎嘗聞宋之先世有渡蟻而大魁天下及其弟並顯名於時者視創橋利人仁之大小奚啻倍蓰哉夫能培植昌大之基後日子孫得無若郊祁之顯世者乎予非佞也古人所謂仁者必昌其後可徵也三子江恭嘗遊予門借從弟來請文紀事蓋將揚考妣之休於無既不又幾於孝乎是故不得辭也是故爲之記也

重建崇文堰記

明邑令同安舉人張文錄

萬載學宮東畔古立崇文堰秀水瀦蓄科第蟬聯迨堰圯水涸丁酉迄乙卯鄉會不競者廿餘年應泉江公典文教慨然有興復志謀諸合江徐公蒙泉張公卽其故處出貲聚材鳩工開塞積導上流列陂而障之嘉靖丁巳冬經始戊午夏告成秋試庠生葉子璽果中鄉薦若桴鼓之相應焉則斯堰也信於學校之繫重矣予莅茲土樂觀厥成見其浩淼迂廻波流萬頃泮壁若渾然天成歎曰自昔圯以至今司教者不知其幾矣視堰之興廢罔有注意者而公經理若是是壞於數十年間者舉於一旦不賢而能之乎今而後司是學者享其成游是庠者際其盛真才輩出羣收高第薦之諸士有不興去後之思者哉不惟是也甲寅歲郡判淮陽春谷葛公散俸收置學田久未聞竟其事者公推廣其惠買田二十畝有奇以成葛公之德則公作興學校之功更無既矣諸士徵予爲記暨

石中流庶來者有所歆望而堰可世世不圯也已

淨安寺記

元僧柏庭

龍江山淨安院自唐武德八年創建於縣東北龍山之前羣峯聳拔古木蕭森龍河之水縈帶紆迴殿堂隱霧樓閣連雲春則幽谷香飄夏則百草陰繁秋風桂馥冬雪梅疎四時之景無不備真仙境也寺之僧皆慕西來祖意朝經暮懺祝延萬壽普福黎民至咸亨二年歲在辛未朝廷頒行科式勅天下僧眾請給文儀修奉十方作大利益至梁唐晉漢則五代之時寺朽僧稀迨唐明宗癸巳年祖師若冰重建殿宇法堂聿新其舊至周顯德四年丁巳樓殿傾圯草生連壁藤蔓壘椽迄乎大宋開寶四年辛未僧從緣奉縣帖續創殿堂丕興厥址至宋嘉定九年丙子南泉山祖師普庵曾遊於此有鐘銘垂於寺因叙之以誌歷代興廢俾後之僧眾世承罔有極哉大德三年己亥孟夏月記

重修仰山祠記

元謝詢

予惠靈康二王姓蕭氏爲瀑淵湧躍之神雲入荒雨四極元功廣博出則爲人寰仰山其故宅也記載起晉代唐永徽至長安作兩書生附彭蠡徐璠舟輓風駕霆一日夕至分宜縣靈異變彰施集雲第一峯與小釋迦寂公作庵時聽說法卽仰山寺古廟在瀑水龍潭上今遷堵田萬載縣西半舍地名奇圃山水作麗修梁鼇駕遠浦虹流列青瑣以前馳交翠環而後覆舊有仰山二王行宮至元丁亥秋七月大旱進義副尉達魯花赤萬奴承事郎縣尹王國用進義副尉王簿李珪縣尉王仁合誠請肅甘澍隨足一邑之民以生官僚主盟重建靈宇委請陽俊胡巖孫周庚張世英李一躍袁辛張遜易寅翔李俊張佑龍阜高袁辛繼張程王發陽壽周仁徐信鄉老文興貴等幹緣修造各施貲財運木鳩工十二月庚申吉創正殿眾心輻輳真宰桴昭士庶虔祈遐邇丕應祠庭日廣楹閣雲齊像設嚴鼓鐘備修廊表廡燦碧輝金左右壽山廟前隙地一區徐信置入躬傾眾善友執鋤於四圍界內種杉松萬餘株爲後修造用仍自捐金穀辛

卯建竹渡橋甲午建潭埠橋丙申修紹江橋辛村橋壬寅修邑南浦橋瑞州府上高縣五里斜口橋下二十里端港橋處處興修源源利濟告天祝壽上報聖皇下爲生民祈禱善心充拓定力堅信可謂勇往情進福德智慧人也廬陵先生八十五歲由湘回經張函開奇圃仰山之盛特進瞻謁有捐予言信等半生精力見於祠宇橋梁神像官董其事人勗其助合有紀載以垂永遠予諗之曰予之功子之行非言可既乎惠銘之久矣如是因如是果受用無盡贊歎之至結寓記云

雲松巢記

明徵士新喻梁寅

寅與胡君志同締交五十年凡海內之士少歷江湖而老安巖谷如吾二人之相與者蓋亦罕也若於學博洽而爲性冲素家昔在洪厓之下往來經彭蠡瞻廬阜又愛夫五老之峯思爲雲松之巢而累於盛名志未之遂治職教上高遭時艱阻晚而結廬萬載之野涂谿之上乃曰白雲蒼松吾朋儔也紫厓翠谷吾

亭宇也身之安於是者心之樂於是奚必匡廬哉乃名其廬曰雲松巢而寓書於寅屬記其概寅復之曰太白之欲巢雲松也歲月之弗逮而素心之竟違君今以耆年恬處獲遂初志前人之所不得者得之矣而盍亦觀於雲中之鶴乎其翱翔乎埃垞之外超越乎溟渤之間朝與王喬俱夕與偃佺遊翔羽於扶桑揚音於丹邱樂何如也然在林之思恒不已者何也靜之欲動動之欲靜其天者然也寅與君弱歲相好白首弗渝山巖之棲時同意合方將覓雲松之巢挾丹霞以締盟指白水而旌信詎非願與君各泰其族山於華林文章翰墨之傳於時者士大夫共知姑述其高雅之尙云爾 采石門集補

書陽歸隱圖記

梁寅

敖君遂初家於萬載縣之野青陽山之傍當平時其伯父及先君以富貴文雅著稱其所居亭觀之美枕高跨深林宮石峻澗幽泉清而一時才名之士或經其鄉則必造其門遊觀之娛宴談之樂必流連意愜而後去兵興以來巨家俱

毀今朝創業雖強鎮之悉平民生之復遂而君之家竟驟矣君以嘗食前朝之祿徵至闕下於是思其山棲之樂而自號曰青陽者因求孫子林氏爲青陽之圖且屬寅記其左按圖是山在其居之西南可五里而屹然其中者曰青陽道院君之伯父玉谿翁所作也道院之左曰曾文迪之墓文迪唐末葬師楊筠松之弟子爲敖氏相葬故卒而葬於是也其右曰西爽亭以西方之爽氣爲可挹也西爽之西曰巖巖亭其前有雙石如門如亭峙乎石之上者也二亭之後其左曰白雲窩蓋周圍皆石而其中寬平可坐者也右曰鴻濛與取杉之存膚者以爲亭之材而又覆以杉之膚蓋唯樸之尚而同於古初者也又其後曰碧霄壇於是而零祭也山之北爲池池之中三石叅立者名之曰小蓬萊取其象也是山舊名觀邱而易之曰青陽本之道家言言人必受東方生氣乃可仙也山周迴十餘里其西南北三面水縈之如映葬家以爲有朝拱之象焉則宜其地之靈也寅嘗觀世之人莫不有所嗜其嗜之在是則樂之在是也凡以富以貴

以飯啖以菽博以聲伎以遊畋無非樂也而一或失焉則慍且戚其甚者至於鬱悒而或傷其生焉斯嗜慾之弊也唯君子之樂則安於命適於義故無入而不自得焉雖顛沛之甚憂患之久而樂園自若也敖君之客於京師也其於山棲之樂不可得矣而察其中則夷然以安觀其外則粹然以和與昔若無異者則所謂無入而不自得蓋庶幾乎君之得請而歸老於是山吾知其後之樂又有踰於前之樂也審矣君之家凡亭觀之美鉅公才士形之文辭者多矣而今皆泯焉况又託之畫圖而又藉後來之記述安知其不同於泯者也是可感也雖然君之知寅也久則固不可以無述此記之所以作也 采石門集補

混元經閣記

湯 熒

曜靈觀經閣乃渥元教弟子劉又元所建也觀居縣西二十里懷舊鄉緬村里紫蓋山下相傳爲謝仲初遊覽藏修之所歷唐至宋靖康觀毀後仍建焉元壬辰法堂頽敗又元懼宗風之不振憂元範之無託乃竭己力告諸好事者協力

甯工辟其地新建是閣七高三丈二尺四十有二柱上祀元帝像卽其師高敬則所塑下爲居室以禮四方往來高士左楹以祀宗師右楹以祀檀信及歷世神主辛勤十年始完吾觀又元師弟子授受之業始以正一爲名初未及混元是閣之建其下開正一法堂所尊奉經以度人爲名亦未至於混元比邂逅法師熊明德授以混元宗旨而深契其心始以是閣爲混元經閣夫學者旣以老氏爲宗老氏之言曰窈窈冥冥至道之精昏昏默默至道之極非混元而何正一之用行混元之體固具乎其中矣夫混元者雖曰氣之始實未嘗有始也亦不能無始也蓋其爲清出於未始有始之初非有朕兆可名非有聲臭可求非有形色可驗故謂之混元求混元於言語文字之間蓋日已遠矣經典云乎哉雖然學者不假乎言語文字以爲入道之門則混元之境何從而至熒儒者也萬載縣令學掾歐陽彥斌來瀏陽求碑文又元就以是記爲請余於混元之旨未悟因彥斌回質之師以求教焉或曰庶幾然後刻之可也洪武七年三月日

重修靜觀亭記

明邑教諭喻 濬

成化四年冬粵海陽陳侯琛來知萬載事下車之初慨然慕漢唐守令遺風律已嚴愛民惠越明年化行俗美百廢具興公堂之後舊有亭曰儼思乃退思之所歷年寢遠棟宇傾欹侯重葺而新之無以名亭一日因其兄崇珪示書教戒遂書之於壁欲常觀而不忘故更其名曰靜觀屬余爲記竊惟仕而優則學非學無以廣才非靜無以成德退休之暇吾知侯儼游其間俾天君泰然外絕喧囂之擾內無非僻之干心與造化俱身與神明接靜而觀乎天地則天地不過以生物爲心靜而觀乎聖賢則聖賢不過以行道爲心靜而觀乎兄之所以教戒則亦不過欲以養民爲心夫豈不可體天地之心以爲心乎豈不可體聖賢之心以爲心乎豈不可體兄之教戒我者以養民乎程子所謂觀物於靜中自有春意最可體仁予於陳侯微之矣是知昔之名爲儼思思則生於心而由手中今侯更以靜觀七則寓於目而應乎外內外交養動靜不失觀我生以觀民

生將見事修政舉本成己之德推之以新民民革舊染而從新政樂雍熙太和之治遂相生相養之天漢唐守令豈得專美於前哉因記以名亭

桐岡書屋記

明祭酒南昌舉人胡儼

萬載邑治之北二里許其地曰桐岡其土豐衍其人近厚邑人劉文忠樂室其間環龍江之水面紫蓋之峯又宅其地之勝者蓄古書教子孫際太平之興運樂邱園之閒暇所以求其志者裕也其子盡登永樂乙未進士擢刑科給事中溫厚而文雅足以見劉氏詩書之澤矣昔韋長孺能教其子傳其經並貴顯君子謂之重學司馬溫公曰積書以遺子孫子孫未必能讀君子謂之貴德世之人勤一世以治生各有其業有其業者皆欲遺子孫士以詩書農以畝畝賈以貨工以藝古今天下皆然也然子孫賢不肖不能齊雖其業有本末或傳或否則亦豈能必哉故曰不如積陰德於冥冥之中積德者後必昌有賢子孫必食其報矣嘗觀宋之時范氏積德百年而有文正公其初孤貧無聊人不能堪乃

能奮苦志於學而卒以功業顯聞又有出於韋氏上者豈假祖宗尺寸之業哉由是而言士大夫所以遺子孫者德與書不可偏廢也文忠蓄書既教其子光顯矣優游暮齡豈不可淑其孫乎由子而孫繼續承承亦豈有窮哉雖然積德與書以啟後人固在文忠至於積學術慶以顯揚先德又在子孫之自致何如耳盡來求文余未嘗一至桐岡其山川景物有可題詠屬之能賦者獨書此以爲書屋之記云

正人軒記

明上虞倪棟

余友葑石陳君治萬載期年政成構軒於廳事後而休沐其間喬柏陰翳挺如翼如請名於鄉大夫鄭公公曰古有正人如松柏當書正人軒於是陳君走价數百里屬記於余余惟世道之衰由於奸邪之亂正而邪說之肆起於正學之不明自剖判以來國家所以爲國家天地所以爲天地人心所以爲人心恃有此正而已國不正則亂家不正則亡天地不正則日月薄蝕隳谷變遷人心不

正則奔禮滅義祥惡怙侈而近於禽獸夫人將以其身理國家位天地而使之近於禽獸可不哀哉樹樹者樹松栢則貴之冀其可材亡論荆棘卽桃李春悅其華而秋啖其實巨室亦何賴焉析圭懸組之士林林不可勝計其爲國家荆棘者何限藉令朝夕奔走辦集於追呼會計之間彼自以爲庸國家且桃李視之卽亡此百輩何足慮所慮者亡正人耳貫四時歷多祀如松栢之不改節則掄材者亟收焉朝廷得一正人而以之尊郡國得一正人而以之治邊圉得一正人而以之寧所謂人紀正而地紀定天紀貞也才智之徒方其無事攘臂扼腕以爲誠得一當稷禹逢干易與耳及當利害輒如敗荷衰柳隨風而靡賢不肖之相距奚啻松柏桃李哉嗚呼端人正士衰世豈盡無之其或無救喪亂而身遠名滅反爲奸人竊笑者何也正學不明而邪正之勢不兩立也結蘇專而萊公逐臨川柄而溫公行此非較著者歟然則栽培之機亦顧上之人何如耳今天下正學昌明正者榮晉邪者退屏若秦越黑白之不相入士患不正不患

正之不行也陳君負瓊奇之材嘗與予登九峯之巔四望寥廓湖光萬頃海濤接天慨謂予曰丈夫氣岸當如此矣比洽甫期而頽聲四達諸所建白約束皆可載之令甲則其爲鄭公屬意宜也所謂栽而培之者非耶鄭公正已率人陳君附之以起所謂得一人而足者而相遇若斯豈非正道之大幸哉然則茲軒也詎直一時甘棠已歟陳君與予同邑家世廬仕以正道顯鄭公園之侯官人壬戌進士結髮事正學今爲良二千石表正於表

綠陰書屋記

明侍讀吉水進士周叙

綠陰書屋者刑科給事中郭君瑾禾仕時藏修講學之所居也其地擁月臺紫蓋諸峯崑崙逶迤而龍江之水引清紅練由虹橋以蹇平曠喬木碧樹濃鬱隱映謂之綠陰池上君祖敏齋父孟陽結屋藏書以教君招致賢師友相切磋期於有成志甚篤也君克承先志研覃弗怠旣已出爲世用階清顯恒自念所以臻是者未嘗非書之由而祖父義方之所及然牙籤插架手澤猶存而松楸雨露

之思深矣不有記焉懼世德書香之無以詔後人也乃屬言於予予惟君子之學也毋即夫寬閑雅潔世紛弗接之地然後理以靜明節以苦勵蘊之爲德行發之爲事業此昔范文正之長白石守道之岨嶮所以專意肆力而暴著於世也然二君子者猶離家庭卽鳴寂孰若君祖父處豐裕闢幽篁使其子孫居慈孝樂地成爲己之功立顯揚之本乎且君復將宏德業茂繼述彰而大引而伸之此又子孫難得於祖父而祖父難必於子孫者也可謂交賢矣雖然先民有言書者用不敝取不竭可供無窮之求者也爲君後人亦勉於斯焉則其繼君而來又未可量書屋之光榮詎有艾乎余嘉君之知所本也故記之而期於無已焉

玉虛宮記

明知府邑舉人彭 澄

按志邑有道場九仙宮舊矣基肇自唐迄元道人黃竹關解官躡元卜是棲真有覺條附八仙乘雲去因得名九仙云人以道化地以人靈道以地闢沿斯相爲弗替厥相遭詎偶哉特其地雜處闌闔意塵間其垺宇環垣尤敝圯殆甚匪惟無足起瞻式繁重貽玩嫫焉予昔讀書於茲每憾臻葺無其人使勝地萎落若此先是有道冲應者曾礪石作門予爲題其額自餘仍故轍也嗣予宦轅十數年每舉念桑梓則此地輒復往來於懷亦昔人不忘舊遊之意也頃余被命督漕淮徐間鄉先輩袁君介石等寓書予曰觀壞不修視君報記時無改今其門以內皆屬真仙之居者其觀之徒浩然既勉尤之聚幾爲殿以祀真武倚殿爲亭以列九仙顏其門曰玉虛宮欽崇卽止視昔有加參前覲後維續維肅繇門以趨通衢則又悉甃以石堅整坦夷延袤四百武許綜其費無慮百金凡皆出其禱禱所獲鑄鑒銖積勸劑量以有成宜得君一言以重之俾永勒不磨庶其有勸乎余聞之忻七爲之色喜夫浩然者其志殆亦偉矣哉恒謂今之莅官者類以其居署爲傳舍置仆立不爲意無憾焉耳乃世千金之家厥祖父畢力殫勞謀堂構以貽孫若子其孫若子曾不一再傳支分派析視其先之所

創不啻若道旁然漫不致珍惜於其間至繼黃者流誰復以成毀校之乎浩然能不嗇其私殫其力之所能速加意於人所不爲意以爲人之所不遑爲也殿爲亭神獲所冀爲逕爲塗人獲所履率爾改觀亦難矣亦難矣乃余深有望於將來之或感而興者斯舉也浩然能先之矣安知不有感而興思闢其庭廡而慨廊之者乎安知不有感而興思過遭其垣墉而環屏之者乎安知不有感而興思壯麗其樓閣俾千霄耀日者乎卽無感而興者有志如浩然又安知不思所以圖其終乎浩然慎圖之余日望之是爲記

志喜堂記

明禮部侍郎泰和王直

邦器名璉以明經取進士授刑科給事中凡三年朝夕在天子左右以近道德之光上以爲稱是職推恩以所居官贈其父母亦贈孺人錫之救命雲帶奎璧之文燦然昭映於其家邦器雖不能無感於心然深自喜余亦喜之或曰邦器得褒贈其親其喜蓋宜而子亦爲之喜何居子曰君子之喜獨以已哉蓋有同

乎人者矣夫人子之生父母見其爲男也則喜之及其稍長知讀書就筆研矣則喜之及其志之遠大而能親師取友以成其德達其才則喜之既取於有司對於大廷而登科甲之榮則尤喜及列官華近職事樞要進退周旋如在天上則喜滋甚矣而人子之於親譬如萬物之於天地其生成之德豈能異哉惟冀得祿以爲養庶幾少慰焉然而有不得者此其心當何如也遭遇聖朝褒贈之典使父母平日喜幸之心一旦而與享之雖冥冥之中且慰悅矣豈獨其子之喜凡有愛親之心者蓋莫不喜也孔子曰立身行道揚名於後世以顯父母孝之終也蓋行道者立身之本名之所以揚孝之所由顯也邦器今能顯其親矣其身益卓然自立則其名當永而所以顯其親者將不益大矣乎予於邦器不特今日喜之冀猶有大喜於後也問者唯唯而去適其鄉友禮部員外郎易節時中來求言以贈乃述志喜一首以贈之遂名其堂曰志喜堂

餘慶堂記

明侍郎欽縣汪道昆

余自謁告居邑得二丞良先後甫及三年逝以令遷去金故楚產子從家食得其人比喻少府入疆余業已目俾之矣卽吾邑宜丞甚何翩翩得此兩君居頃之所部率推轂少府一考檄至乃得整江三老謂予司馬雅謂吾邑宜少府日第能得一少府於邑宜未得少府於家要以家世不傳於人倫則祖彌之世澤厚矣祖以詩自負而處士福孳孳務明經祖繼彌言孺子何慕孳爲也古稱孝友爲政無甯逐逐以希儻來孺子已矣處士唯唯誦釋業而務承驢居常視食上下問衣燠寒有疾則衣帶必在躬湯藥必在御處士雖謝佔畢其躬行無讓齊魯諸儒於是縣博士旅舉鄉射賓之處士謝不往穆考卽位少府奉詔起澤宮人言龐公遺之以安無若處士遺之以孝友縣大夫署其堂曰孝友餘慶蓋亦以當表閭云夫列邑貢士於廷率中歲以爲次間一奉詔則舉擅場承雅由此起家於邑爲貳其以令遷者什百而一則舉擅場爲令少府皆若承蜩而掇之此非朝夕之故矣風之積也不厚則其行易闕水之積也不厚則其流易膠

輒望於飄風有餘怒腹堅於澤水有餘寒不於其身於其子孫善有餘慶言重積也少府其席此也余然其言蓋不忘其本者矣在禮大孝尊親其次弗辱其下能養乃若處士修之於家夫非善養也與哉父命之備童習而白紵辱也及命之仕波流而乾沒辱也先帝首下明詔羅異材至上方破拘攣振淹滯耽耽而欲得士無寧以一塗失之少府以彼其資會逢其適命之儒則儒術振命之吏則吏治興蓋庶幾弗辱矣比年詔求異等皆得與公車之士並徵由此譽命逮親令問顯世限已乎尊矣培之而弗辱拓之而益尊要惟善養以爲其處士之所樂也漢治最爲近古其教率以孝弟力田治蜀莫良於文翁而膏稟於躬化夫以邑則墊江爲險以政則令爲專親親長長而天下平善舜胥此道耳少府席家慶以往第與境內共之卽未及下車有不胥慶者非夫也乃今奉檄而過里門省封樹觀宗祏能無怵惕之心乎儼然如將見之祖彌且欣已有喜色矣賓客之在是堂也宜必有張仲其人幸爲我謝曰夫堂之慶未艾也

徐侯學田記

明邑教諭溫江貢生任 高

夫爲政莫先愛民而士者民之望也。越稽古循良用敷錫厥民恒先焉。康樂
鉅邑徐侯由甲第來守茲土莅政之初均徭賦弛役征敦儉素培益邦本罔不
曲盡心力尤以學校爲首務。於經義以亨蒙塞式文體以端習尚凡庶士翹望
叩宏聲颯颯乎大雅之風而咸歸於道德仁義之粹真足爲士楷範。今三年於
茲篤造近矣猶惓惓然軫念寒素如不忍釋慮月考館膳婚葬賑助之無資而
養之乎空乏無以爲教之之地也。謀於僉指俸資以置學田登諸環以稽出納
不欲報於上以開紛擾噫嘻侯之用愛亦明且溥矣而侯之心固無窮也。觀舞
者厲目矜雅者忘倦繼侯者尙有以繼侯之心而矢徽音於永嗣耶侯行將以
保分土者保王土康一隅者康天下舉民物而登諸春臺之上端可預卜於斯
矣

徐侯新學記

明府同知邑舉人彭天補

萬載有學舊矣倚官山環龍河竿架盤旋虹橋矗起蓋天造作人地也。學創於
宋崇甯間至我國朝鼎新於趙公中拓新於黃公珙歲久代更士羣聚於中睹
其瓦墁甃礧題榮栢之屬腐蝕黽亂無以時遊息而肅瞻仰翕然有飭盡之
謀次省徐侯以名進士來治吾萬悉意以撫摩其民而保之若予謹身以綜書
其事而理之若家邑時鼠鼠潛伏饑饉荐臻民心洶洶侯應猝如宿慮度遠如
周嘗時糴賑而餒孺者哺矣嚴信必而猶黠者強矣綏恤虔恪而滂沱者非有
年矣尤雅尚文學獎掖譽髦迺大辟黌宇而更新之費斥之羨役驅之義不數
月而工且竣矣今之適學者見其繡屏粉道出入縈紆深池文閣上下隱約修
廡旁翼左右輝奕又仰而觀之聖廟橈者隆境者堅金鋪相映玉題交輝廊稜
特起塵霄迴漢莫不湛英風之耳而灼珠斗之日矣於是邑博劉君銓甘君棠
蔣君世俊庠生袁伯恒彭紹美輩僉曰茲侯績也可無紀乎委記於補補弗文
安能紀侯績無已則惟侯新學之意以復我師友可乎夫人之一身髮而櫛膚

而浴手足而澡雪至几筵器盎服帷庭除積污濁則滄滄而拂除之以謀爲新而日孜孜也微而一心易染以汚新與否又已所獨知而人不及知以人不及知而自欺於獨者何限嗚呼此湯之所以銘盤而德之不修夫子深用憂也諸士始望而屏屏久且仆仆則起而植之因思吾心得毋惟欲之仆矣乎植之也宜敬則新矣又入而門門久且塞塞則治而關之因思吾心得毋惟利之塞矣乎關之也宜正則新矣游衍而泮見源不濬則流淤淤則涸可立待因思吾心得毋易盈而易涸者乎濬之也宜潔則新矣又進而廡而廟則壽所吟誦經所詠歌津津焉濡吾吭雅雍焉滌吾襟恍乎昔未能今有得也儼乎聖賢相對越相儆戒而宜闢其堂奧也惕惕乎自晝而夜自夜而晝如循環然吾之日新又新者無已也以新乎身以新乎家以新乎國與天下庶幾不負侯嘉惠後學之深意矣故擅毛廬西施之美無益於面用脂澤粉黛則倍其初今多士誠美材而仁義道德士之脂澤粉黛也尙思所以益其初而新之也哉侯名一唯號

次省楚黃蘄水人登辛未進士其所植立所闢闢所淵源藻飾馳驟皆足爲多士式者新學之舉特其善政一端云

徐司理修學記

明邑令清遠進士鍾萬祿

夫辨天下之大事者詎僅爲一人一時計哉既以必爲斷諸已又以易爲貽諸人既以可爲終其始又以能爲慮其終其謀計其猷遠其襟度非尋常可測也祿今於徐侯修學見之侯自去冬署篆萬邑蓋時祿以觀事行當道以萬爲巖邑特簡侯焉侯至卽以右學崇儒爲第一義時建鸞旆以莅學載色笑以敷教登夫子之堂環視棟宇傾頽齋居廢弛曰廟貌弗肅何以儼臨齋舍弗備何以藏息遂因士子請亟圖修葺之抑欲修之必竟其成葺之必令其固且曰余攝將代固知不能竟然亦預計可以辦此而無貽後來者難乃計工度費非百金不可時詘財匱公庭無可措手於是百方設處立簿勸義先捐俸爲募義者倡鄉有少叅張公樂侯茲舉也欣欣以十金首助後之助義者亦稍稍湊集積百

金之半先以授學博蔣君擇諸士中有學行者四人協之所得又幾二十金學博受命偕四子慎其出入勤其督課盛暑炎日未嘗離居肆所迨祿觀事回而學宮頓忽改觀甫四月而厥功告成矣今自先師殿以至儀門泮沼及明倫堂文會堂啟聖名宦鄉賢三祠整勅一新又於文會堂右構屋三厦以備成德達材諸齋俾居是室者得免昔日薰蒸暑發之苦蓋凡學宮以內若棟梁楹桷若門壁階除無不補弊舉佚修之則既成矣葺之則既固矣廟貌肅而齋居備矣夫修葺學宮此祿有司事也侯顧以身任其事毫不貽祿以設處之難且預辨於始而旋克就緒於終侯之謀何訝歟何遠而襟度何超越也祿方欲藉助義未輸者開泮以引曲水築堤以固周行令宮以外與宮以內煥然相映夫何南部之命侯下而於侯所欲爲者愧不能善承也侯諱之孟號泰巖浙之德清人登丙戌進士時祿幸廁名於末今侯先祿以倡義舉祿不能繼侯以擴德心然樂觀侯之功成則又思彰侯之盛美於不替乃因學博諸士請而述其概云

龍河橋記

明邑令靳水進士徐一唯

萬載古康樂也縣治夾水而城龍河穿城之東北欲成城必先是橋是橋也不惟利涉抑且維藩蓋自版築之初邑壽民譚鐵倡義邦建中殞於嘉靖間鐵之子登龍捐貲修之萬曆四年五月念四日龍水橫流環邑懷襄橋亦蕩沒無遺邑之士民如坐水火而余亦孔棘矣斯時也於之公帑則儲不償貲貲之與議則築室道旁令也民也將如之何譚燧又登龍子也曰是艱踵縣門告曰燧老母常氏紡績生殖薰亦有年可得數千緡合先君遺貲將爲福堂浮屠計燧籌之救災捍患愈於浮屠謀之母氏母氏以爲然請無憂焉余乃屬其耆老而告之曰善哉舉乎賢哉母也遂率官吏師生祭河伯聽其卜曰鳩工隘者充之卑者崇之虛薄者堅厚之廣一丈六尺修九尺建亭五間衛以欄楯父兄子弟亟力從事不啻經紀其家而工匠飲食之若流也夫妻子母皆無慍色五閱月而落成余以聞之當道當道下檄旌之曰善具羊酒幣帛勞之而燧且不暇當未

幾余以載觀行矣越明年予官留曹其子庠生嘉猷嘉謨走尺素來曰橋之功不足多橋之名豈可朽乎予答之曰橋成矣義在是矣予身經其事當記其實於橋亭嗟乎燠九民也無待而興捐數千緡於一橋雖賢者以爲難矣姑綴數語俾觀風者有所考云

徐侯江堤記

明知縣邑舉人龍允中

龍江北達彭蠡入江而至於海其源不可殫紀而巨者三發金鐘湖者東行百數十里而循龍山之陰以北其自竹山洞出者東放以合南浦山鵝鼻峯出者西就以合烏溪胥於儒學之南匯焉而復東北流蓋江山之勝處也學斯得矣然源既眾而流深則岸益崇而善崩於是如砥周道至不可聯輿而並轡駸七然去櫺星門直尋丈焉而勢猶未可以已也又酩酊忿怒之民往往有易險而輕蹈者次省徐公之爲吾邑既聚欲祛厲愛及而威加百廢舉眾美集矣一日循江干慨然嘆息曰政之弛民之病莫此先焉矣顧非予之責也夫遂檄其尉

林君宏字董之掄東山之良攻北碣之磐錫澤窮深以爲堤而上列欄杆工能既程朱丹斯煌阨者突而出激者紆以渟蜿蜒蜿蜒如月之恒而虹之抱經始甲戌季秋落成乙亥孟夏其財取官之贖金而眾不知其力使市之遊民而農不及蓋無因乎前而有貽於後矣休哉王制侯國之學曰類宮釋之者曰東西南有水形如半璧以至於今學必池池必泮然第掘地爲坎耳不泉及焉求其深源遠注洪流縈帶形與制準而勝自天間若斯者未之多見焉士之遊息乎斯也睹其活潑浩蕩方至而不舍於是智者契其體仁者悟其用勇者充其氣材者攬其秀其將深造淵源而增益其所未逮者豈非地勝而人賢也歟昔周單子過陳見其道弗而川澤不陂梁爰肆譏評而決喪亂向使睹公所爲將不擊節歎賞以爲先王之盛周官之守乎哉是役也蓋尊道重教之義弭害卹患之仁務先舉大之智而其高深貞固整齊華美之觀則自耆宿以及兒童由膠庠以迨田野莫不以爲無前之烈其欣喜歡愛鋪張揚厲之概油然而不可以已

者公欲止之而不能也夫作者不易而述之猶難吾夫子之道與天地則其宮廟固不悠久同耶然而物之興廢成毀恒相循而無窮已於是邑博劉君銓甘君棠蔣君世俊及諸生袁伯恒輩相率屬筆於允中以教後之人使勿替云

毓英橋記

卽康樂橋

明邑令上虞舉人陳王廷

夫橋梁之建古今人豈不同有是心哉限於力安於仍則不能盡然乃其間有奮然以創適然以圯又復圯又復創固有待於人者而其命義則各有攸歸矣萬載古康樂也距城七里爲丁田渡丁田有橋亦名康樂蓋晉時謝靈運封康樂侯於此故名其源有二一自金鐘王居洞諸水合流環抱於縣之後一自石洞白沙諸水合流襟帶於學之左皆匯入於龍江而注此以達上高蓋爲縣之水口焉夫子之宮牆瞰其流而挹其秀者此非其關鍵之大與所經由南則歐桂東西二鄉抵新昌義寧北則穀皮連香等處應輸役於縣商旅負輓絡繹其間橋固不可一日無也唐宋以來未有建者建自元至正間邑人龍曉董其事

疊石爲址架木爲梁登以甃結屋覆之高八丈廣一丈六尺長三十丈有奇屋二十八間凡一百八楹中亭有樓巋然飛閣無異浮甍沒鵲歷三百餘年無礙萬曆丙子夏洪水暴漲剝去北岸漸水二道民皇皇然如至正初未有橋時也大府鄭公憫民艱於往涉檄前萬載令徐君一唯圖所以拯民於溺令義民某任之著曰鳩工伐石購材悉指貲以終事明年秋八月廷承乏茲土見其制尙未就緒又爲申飭而廣勸之以畚以築以石易木仍屋覆之爰足其楹修廣崇高皆如舊制始事於丙子夏六月訖工於戊寅秋七月自是渡者不喧涉者不濡焉然翼然一方稱奇傑之觀而水口得以隄障諸源環萃非文明之獨鍾乎夫橋創於元之至正今復於萬曆戊寅江山信有待哉且大府嘗捐俸修學宮矣立課程諸士矣而是橋之築又屹爲一邑江山門戶則風氣所凝人文攸萃必有英偉卓犖之材繼起參翺爲此橋爭勝此水淅波也大府公之餘潤詎有窮乎廷僭新其額曰毓英蓋原公之志而望諸生以無負此橋也然則舊名

丁山志地也繼名康樂志古也余更名毓英非謂止通濟利涉亦將振起乎斯文其義各有攸取云

復修崇文堰記

明按察副使邑進士張璧

自昔聖人在上菽粟如水火而後民興於仁卽唐虞申命司徒俾眾著於君臣父子夫婦昆弟朋友之倫而不胥與比於禽獸則治水明農之餘始及焉彼其化民成俗若斯之殷也而出之有緩亟行之未嘗無次第已余萬舊有學有堰歲久日就頽圯非所以時游息聳觀瞻而振青衿之氣也殊爲缺事忽學博濮君之賓李君益陳君之垣以修學建堰問記於余曰此爾張侯嘉惠多士盛心也可無一言以志歲月余慨然曰建學育材夫非守令事耶顧今災沴頻仍所在見告吾邑土瘠民媮卽豐禋僅望半菽以飽而令營大役佐大費則力不支若夫以振作文教之事責厯羸待盡之民竭蹶以趨其將興仁於聖人之所難而司徒之命不問時之阻饑也况周禮十二荒政弛力居其一一旦二役並興

厲已之怨其何辭顧念之侯之奉公約已其瑾瑜比潔而滄溟比濶也四三年所孳孳焉噓白骨而肉之雖屬大禋不重爲菑繁士也秀出乎民侯以士之故厲若民乎其必不忍而以憂民之故遣若士乎謂師帥何故當救應持傷之不暇而宮牆有飾俎豆有數先雋崇祀之所泯滅於荒烟榛莽之中而莫可蹤跡者皆有所勸舉多士亦忘其菑而敬業其中相與議明親義序別信之理而必不肯放僻邪侈近於禽獸以蹈聖人之所禁更聚而謀曰侯誠大有造於士士則何以不侯負思昔賢科武接夫非崇文堰之濬其秀耶顧今堰善潰而力倍於創詢之堪輿家故基爲良遂毅然修復鳩工聚材不越月而堰成旱則水有所束而不至油潦則水有所洩而不至潰庶幾學宮相與不毀已余何知堪輿家言然學宮所廟祀者非孔子歟川上之歎水哉之稱則此水之關於道機蓋有取爾也侯方以興仁明倫望其民而豈徒以弄筆墨微利達爲士望必不其然無論多士不待教而興一旦入其宮睹腐缺黜黜之易其故乎何可安乎庠

陋像棟梁案櫨之美且綢乎何可不就乎高明撫川流之浩淼而不息乎何可不神遊洙泗而契孔思自茲乘昌遘會出則爲名公卿處亦不失爲明儒要之灾沴不常有而太平有道之日長雖使易世而後無愧於爲君臣爲父子爲夫婦昆弟朋友而成可封之俗是所爲不負侯是役也問之官則無羨金間之民則罷不勝役俟取諸俸之餘工計日而受之眞士有其樂而民不稱厲經始於庚寅二月之朔落成於臘月之望侯各履中宇汝用出晉陵世科其諸惠政不備書

畢令修學記

明中丞信豐進士甘士价

萬載據豫章上游屬袁郡爲臨瑞襟喉畢侯來領是邑甫下車謁先師廟升講堂議經旨因睹學宮圯漏久矣捐資恒苦訛莫之能舉其在今日乎乃度費上其事於撫臺院道咸稱善報可於是鳩工庀材選能授事自殿達楹自楹達門靡不易厥朽蠹拓厥簡陋又葺瓦蓋堂砌碑爲牆累石爲墻架木爲墀增所未

備上下競勸不期月而迄功蓋不惟廟貌一新而侯崇正學育真才之意亦蒙在士民心膺矣繼輯瑞天朝交章旌異推功第一命未下而復留之仍借民牧大殫宏養愈擅製錦之能益振鳴琴之化諸凡興作獎勸美意溢於言外無替厥初司訓劉敦李寵樂是役之成也走書屬記於予余曰畢侯鍾欽邑之奇超南宮而首出也風猷譽望嘉邇卓躒且冰蘖之操一塵無染與秋潭並清信爲諸邑先警之鵬鵬振翩陵駕九天神劍天馬射日騰空不煩追呼而公上之需給稍加撫字而元元之困蘇躬先倡導而俗滋厚興利除弊而地方寧右懿行崇實學正文藝章縫爭相濯磨而才質之造就濟濟焉學修而行端志大而趨正故無論賢侯疇昔所樹卽所汲汲於修理學宮固已握治本而導化源矣龍江素稱袁州巨邑自侯以文教倡學日漸貴性命之旨士益娓娓向方而文學繇是彬彬起比歲以來射策甲科者與列邑比肩今賢侯又復秉誥舉羸嘉惠諸士士不益廩廩鄉風哉幸生中土衣冠禮樂之鄉而又藉侯爲之鵠吾知諸

生他日精性命道德之學經術文章顯重當世蓋不啻如司馬相如王褒楊雄之徒接跡而出以光耀我國家則於賢侯貞教善俗之化庶幾無負也乎留任甫逾月王命寵召筦司樞要霖雨金甌鹽梅玉鉉康濟明世端有攸賴卽於萬載治行卜之矣是爲記

重修南米倉記

明邑令歙縣進士畢懋良

南米倉之建其來久矣至今朽敗甚幾不能以盛余捐貲庀材鳩工補葺者六畧造者二不費民間一銖一粒越月告成余聞康樂昔頗裕今所在蕭然大都苦於南運小舟苦草竊大舟苦風濤至自都石石而輸之又苦捆載所費詎可限量故事委二三糧里任之竭家以從猶且不足余益以三千石南布邑所稱大利也條陳帶解各脚耗銀給票令自催收不從官中兌發無名妄費嚴令禁革分數撥各都鄙悉予酌定不假手胥吏無偏傷之患各糧里忻乚自以爲得蘇息乃余猶以康樂瘠土之民差繁賦重雖由空力以效國賦終不若優游閭

里之爲逸也自彫敝既久豈能頓復因於修倉工竣以南解之苦及予所以優恤南解之方實言一二與爾父兄子弟永守之若立石侈談營造非予意也是爲記

重修康樂橋記

明按察使邑進士彭自新

夫橋梁之成王者重之以爲涉者利也易不曰濟川乎士君子升階泰征用比於斯萬載故袁郡巖邑人文之盛與郡邑爭雄長所從來矣乃距城七里曰丁田其地控山帶水發自西北金鐘王居洞東南石洞白沙二水并流以達省會勢頗湍駛爲水口扁鑰之處一邑風氣實需以砥之元季創自邑人龍胸名康樂橋因謝靈運襲封此以人靈地也橋巍然特立望鸞嶺而襟龍河嗣是秀穎崛起鳴珂冠蓋里閭相望人與地靈也第累石架木稍窪下水驟激輒搖動圯而修修而復圯而風氣亦闕以盛衰萬厯己酉洪濤鼓浪傾圯殆盡有識者憂之一樓屹峙若天有留焉以待歲丙辰姚侯下車問民疾苦與

諸建革計此橋受地時時病涉而往來渡費載不下數百石鄉紳父老咸謂邑之科名先達實發祥於此於是謀諸邑謀諸野僉曰逸之使而高之因也相與估貲商值而侯若燧然靡寧惟恐一木之運片瓦之移妨農功而害稼事其採取募召勿強不欲勿重不堪時躬省視間委僚屬遞董之相戒曰無擾而已邑措紳諸人士羣力靡不忻乚趨事而爭輸悉後也計累石比舊高三尺以禦水擇舊材堪用者可百計以節貲廣一丈六尺袤三十丈上覆橋楹一百三十六中構危閣計五間視昔逾宮壯焉工賁於萬歷丁巳秋仲訖於己未冬杪一時利賴而樂成者相與誦蒸紘而慶南征因問記於予予曰侯之軫恤黔黎若此侯之嘉惠疊亭若此其敏於率作又若此當侯經始未匝月卽以大計北上及還洽仔肩其事予入賀歸稱秘揣其工大其成必緩去滇無幾忽告成若有神助焉庶幾予來勿亟而成以不日耶周人以靈名臺今以靈名橋亦可備亦靈運之精氣呵而護也橋之東舊有庵庵廢址存今辛君捐貲鳩工建祠宇敞

楹中祀大士左祀侯右祀謝公後先掩映並足千古亦庶可以報侯矣猶未也侯博濟斯民之念殷其接引後學之念尤殷今秋吾黨應運而起已若符券循是而後凡志長卿之志仰侯之再造以厚其精庀其材斧藻其文章屬乚濟濟翺翔乎千仞之上而進登百尺之樓出而涉大川作舟楫以隆國家之棟石也庶不負此橋以不負侯之德意哉區區利涉蚩乚往來則曰於我何有而又烏知誰之所爲

潭頭橋記

彭自新

夫人有功德於世爲其足以垂永利愜眾望也執因果之說者酷信浮圖修崇梵塔誤以爲功德而孰知其非然也功莫大於造津梁德莫重於濟病涉以故口碑與橋碑並傳不朽湖溪李君耀芳居傍河隔一里許有潭頭山山下爲潭潭內起叢石如傘蓋狀爲一族水口山至今人文蔚起風水之說實關蔭焉潭旁一小溪泛流爲高斯湖湘通徑春水濫溢行人苦之李君集族眾之財力首

